

Siunnersuummut oqaaseqaatit

Siunnersuummut oqaaseqaatit nalinginnaasut**1. Aallaqqaasiut**

1.1 Siunnersuummut tunngaviusut

Kalaallit Nunaanni tarnimikkut napparsimasunik pinngitsaaliisummik napparsimavimmut unitsitsisinnaaneq 1980-imiilli pisarsimavoq. Tarnimikkut napparsimasut nakorsarneqarnissaannut atatillugu pinngitsaaliisummik iliuuseqarsinnaanermut tunngasoq, inatsit nr. 1406 decembarip 27-ani 2008-meersoq tunngavigalugu, 2008-mi Kalaallit Nunaannut nuunneqarpoq. Inatsimmi tassani inatsit taamanikkut attuuttoq tarnimikkut napparsimasut napparsimavimmi uninngatitaasarnerat pillugu inatsisip aprilip 13-ianni 1938-meersup Kalaallit Nunaanni atuutiinnarnissaa aalajangersarneqarpoq, Namminersorlutik Oqartussanit atuutilersinneqartunit allangortinneqarnissaata imaluunniit maleruaqqusanit atorunnaarsitsisoqarnissaata tungaanut.

Maannakkut atuuttoq Tarnimikkut nappaatilinnik nammineersinnaajunnaarsitsineq allatigullu pinngitsaaliisummik iliuuseqarneq pillugu Inatsisartut Inatsisissaat nr. 24, 3. december 2012-meersoq juulimi 2013-imi atuutilerpoq. Inatsit tassaavoq tarnimikkut napparsimasut pillugit Kalaallit Nunaanni inatsit siullerppaaq, tassani Kalaallit Nunaanni tarnimikkut napparsimasut kiffaangissusiagaanermut tunngatillugu allatigullu pinngitsaaliisummik nakorsarneqartanermut il.il. atatillugu inatsisitigut inissisimanerat sukumiisumik maleruaqqusaliorneqarpoq.

Tarnimikkut nappaatilinnik kiffaangissusiiaaneq allatigullu pinngitsaaliisummik iliuuseqarneq pillugu Inatsisartut Inatsisissaata allangortinnera pillugu Inatsisartut inatsisissaat nr. 12, 3. juni 2015-meersoq aqqutigalugu ilaatigut ilanngunneqarput Tarnimikkut Nappaatillit Maalaarutaannik Aalajangiisartut aalajangiivigisaat pillugit naammagittaalliutit Kalaallit Nunaanni Eqqartuussivimmi eqqartuussisumut ingerlateqqinneqartassasut, tamanna tikillugu eqqartuussisoqarfinnut ingerlatitseqqiisarnermut taarsiullugu. Taamatuttaaq Tarnimikkut Nappaatillit Maalaarutaannik Aalajangiisartut aalajangiivigisaannut tunngatillugu naammagittaalliutit ingerlateqqinneqarnissaannut kingusinnerpaamik piffissaliussanik ilanngussisoqarpoq.

Inatsisartut Ombudsmandianit misissuiartortitat 2017-imi aprilimi Nuummi Dronning Ingridip Napparsimavissuani Tarnikkut Napparsimasunut Immikkoortortaarfiani A1-imi

siumut nalunaaruteqaqqaarluni misissuineq ingerlappaat. Misissuiartornerup kingunerisaanik nalunaarusiortoqarpoq tassani ilaatigut Tarnikkut Napparsimasunut Immikkoortorta qarfimmi naammaginangitsut arlaqartut, aammattaaq inatsisitigut tarnimikkut napparsimasut pillugit inatsisip aamma tamanna tunngavigalugu nalunaarutit atuutilersinneqarsimasut akornanni assortuuttut uparuarneqarput. Taamatuttaaq Folketingets § 71-tilsynia immikkoortorta qarfimmi tassani 2017-imi novembarimi misissuiartorluni takusaavoq. Tamanna tunngavigalugu misissuiartortit ilaatigut apeqquteqarfigaat Peqqissutsimut Ilisimatusarnermullu Naalakkersuisoqarfiup Inatsisartut Ombudsmandiata misissuinermit nalunaarusiaani isornartorsiorneqartut qanoq iliornikkut iluarsiiiffiniarnerai.

Inatsisitigut assortuuttut uparuarneqartut iluarsiiiffineqarnissaat siunertaralugu, aammattaaq Kalaallit Nunaanni tarnimikkut nappaateqartut kiffaangissusiiagaanermut aamma pinngitsaaliissummik nakorsarneqarnermut atatillugu il.il. inatsisitigut inissisimaneri pitsanngorsarniarlugit, siunnersuut manna saqqummiunneqarpoq.

1.2 Siunnersuutip imarisai ataatsimut isigalugit

Siunnersuummi tarnimikkut napparsimasut pillugit inatsimmi atuuttumi tunngaviusut ingerlateqqinneqarput, kisianni aammattaaq allannguutinik arlaqartunik ilaqarlutik.

Siunnersuummi periarfissaliissut pisariaqartoq pilersinneqarpoq, tassa nakorsat allat Dronning Ingridip Napparsimavissuani tarnikkut napparsimasunut immikkoortorta qarfimmi nakorsaanerit peqanngitsillugit pisuni arlalinni tarnimikkut napparsimasut pillugit inatsit naapertorlugu aalajangiisinnaapput, taakkua tamatuma kingornatigut akuersissutigineqartussanngortillugit.

Tamatuma saniatigut siunnersuummi ilaavoq pinngitsaaliissummik nakorsaatitortitsinermit nakorsaatip toqqarneqartup sunniutissaata saniatigut sunniutai qanoq naleqqiunneqarnissaannut erseqqissaat.

Taamattaaq oqaaseqatigiinnik aaqqissuussisoqarpoq aamma naleqqussaasoqarluni tamatumani siunertarineqarluni inatsisip imarisaanik erseqqissaaneq aamma paasiuminarsaaneq.

2. Siunnersuutip immikkoortui pingaarnertit

2.1 Siunnersuutip tulleriiaarnera pingaarneq

Siunnersuummi tarnimikkut nappaatillit inatsit atuuttoq annertuumik ingerlateqqinneqarpoq, tassa Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarnej pillugu Inatsisartut Inatsisissaanni normu 24-mi, 3. december 2012-imeersumi aalajangersarneqartoq. Inatsimmi danskit tarnimikkut nappaatillit pillugit inatsisaat una; den danske psykiatrilov fra 2015 (LBK nr. 1160 af 29/09/2015) isumassarsiorfigineqarpoq, kisianni taamaattorli immikkoortuni arlaqartuni allaaneruvoq, taamaaliornikkut inatsit maani nunami pissutsinut naleqqussarneqarluni.

Siunnersuummi ilaapput:

Kapitali 1, inatsisip atuuffianik malittarisassiuussivoq, tak. §§ 1-2.

Kapitali 2, tassani ilaapput aalajangersakkat pinngitsaaliissummik atuinermi aalajangersakkat nalinginnaasut, tak. §§ 3-5.

Kapitali 3, tassani kiffaanngissusiiiaanermut (pinngitsaaliissummik napparsimavimmut unitsitsinermut, pinngitsaaliissummik uninngatitsinermut aamma unitsitseqqinnermut) piunasaqaatit malittarisassiuunneqarput, tak. §§ 6-12.

Kapitali 4, tassani pinngitsaaliissummik nakorsarneqarnissamut periarfissat malittarisassiuunneqarput, tak. §§ 13-14.

Kapitali 5, tassani angerlartinneqarnerup kingornatigut malinnaaffigineqarnej malittarisassiuunneqarpoq, tak. §§ 15-19.

Kapitali 6, tassani sukaterussineq il.il. malittarisassiuunneqarput (pinngitsaaliissummik sukaterussineq, nukiit atorlugit pissaanermik atuneq, sernissuiniarluni sukaterussineq, immikkut nakkutiginnineq aamma immikkoortortaqaarfimmi matunik parnaarineq), tak. §§ 20-29.

Kapitali 7, tassani allagarsianik, napparsimasut inaannik aamma pigisaanik, timimik satsaalluni misissuineq aammattaq pigisanik arsaarinnissuteqarnej aamma suujunnaarsitsineq malittarisassiuunneqarput, tak. §§ 30.

Kapitali 8, tassani malittarisassiuunneqarput pinngitsaaliissuteqarnernik nalunaarsuineq aamma pinngitsuugassaangitsumik nalilersueqqinneq, tak. §§ 31-32.

Kapitali 9, tassani malittarisassiuunneqarput napparsimasunik siunnersuisut tak. §§ 33-38.

Kapitali 10, tassani malittarisassiuunneqarput nalunaarfiginnineq aamma naammagittaalliuteqarsinnaanermut il.il. ilitersuineq, tak. §§ 39-41.

Kapitali 11, tassani malittarisassiuunneqarput naammagittaalliornissamut periarfissat aamma eqqartuussivikkut ingerlatitsisinnaaneq, tak. §§ 42-45.

Kapitali 12, tassani ilaapput atuutilersitsinermut, atorunnaarsitsinermut ikaarsaariarnermullu il.il. aalajangersakkat, tak. § 46.

2.2 Inatsimmi pineqartoq

UPA 2019/xx

PIN suliap normua 2018-15108

2.2.1 *Inatsit atuuttoq*

Inatsimmi aalajangersarneqarpoq kiffaanngissusiiaaneq aamma pinngitsaaliissummik allamik atuineq taamaallaat Dronning Ingridip Napparsimavissuani tarnimikkut napparsimasunut immikkoortortaqarfiani taamaallaat pisinnaasoq aamma taamaallaat inatsisartut inatsisaanni matumani maleruaqqusat naapertorlugit, tak. § 1.

Inatsimmi Dronning Ingridip Napparsimavissuani unitsinneqarnermut, uninnganermut aamma nakorsartinnermut atatillugu pinngitsaaliissummik atuinerit tamarmik malittarisassiuunneqarput.

Inatsimmi § 1 malillugu pinngitsaaliissummik unitsinneqarneq aamma pinngitsaaliissummik uninngatinneqarneq taamaallaat Dronning Ingridip Napparsimavissuani tarnikkut napparsimasunut immikkoortortaqarfimmi taamaallaat pisinnaasut. Taamaattorli pinngitsaaliissummik unitsitsineq peqqinnissaqarfiup suliffeqarfiini allani aallartinneqarsinnaavoq. Unitsitsinerit taamaattut Dronning Ingridip Napparsimavissuani tarnikkut napparsimasunut immikkoortortaqarfimmi nakorsaaneq aalajangerneqassapput nakorsaq unitsitsisuusoq isumaqatigalugu. Oqariaatsini peqqinnissaqarfiup suliffeqarfiini allani eqqarsaatigineqarput nunap immikkoortuini napparsimaviit aamma najukkani napparsimaviit. Taamaattumik aalajangersakkat inunnet plejehjeminiittunet imaluunniit isumaginninnermi suliffeqarfinniittunet atuutinngillat, naak taakku peqqissutsimikkut qanoq innerat siunnersuummi ilaatinneqartussatut isiginneqarsinnaagaluarpat.

Pinngitsaaliissummik unitsitsinerit aallartinneqartut pineranni Dronning Ingridip Napparsimavissuanut nuutsitsineq nalunaaquttap akunnerisa 48 tikitsinnagit ingerlanneqassaaq, imaangippat nalinginnaasumik angallannerup tamanna pinngitsoortillugu. Napparsimasumik angallassineq nalinginnaasumik aallartoq siulleg aqutigalugu ingerlanneqassaaq. Taamaalluni angallassineq angallassigasuarnerut ingerlanneqassanngilaq, naak kingusinnerpaamik piffissarititaasoq nalunaaquttap akunneri 48-t qaangerneqaraluartut, imaangippat napparsimasup qanoq innerata imaluunniit ulorianassusiata tamanna pisariaqartillugu. Naatsorsuutigineqarpat napparsimasup qanoq issusia tassangaannartumik pilluni qaangiukkiartussasoq sivikitsuinnaassasorlu taava nuutsitsineq pissanngilaq. Dronning Ingridip Napparsimavissuani tarnikkut napparsimasunut immikkoortortaqarfimmi nakorsaaneq taannaavoq, nuutsitsinerup ingerlanneqarnissaanut imaluunniit ingerlanneqanninnissaanik aalajangiisuususaq.

Siunnersuummi pinngitsaaliissummik atuineq imatut nassuiaaserneqarpoq, ilisimatitseraaluarluni taamaattorli akuersisoqarsimanngitsoq iliuuserineqartut

ingerlanneqarneratut. Taamaalilluni pinngitsaaliissummik iliuuseqarneq oqariaatsimut ilisimatinneqareerluni akuersinermut attuumassuteqarpoq. Oqariaaseq aammattaaq napparsimasut inatsisitigut inissisimanagerat pillugu Inatsisartut peqqussutaanni tunngavigineqartoq, tak. peqqussummi kapitali 2. Oqariaatsip ilisimatinneqarnikkut akuersinerup qanoq paasineqarnissaa pillugu § 2-mi immikkut oqaaseqaatit ilanngullugit innersuunneqarput.

2.2.2 Siunnersuut matumani pineqartoq, tak. kapitali 1 §§ 1-2

Siunnersuummi inatsisitigut atugassarititaasut atuuttut oqaasertai annikitsumik erseqqissarlugit ingerlateqqinneqarput.

§ 1, imm. 3-mi ilanngunneqarpoq timmikkut anniaatigisap pinngitsaaliissummik nakorsarneqarnissaa pisariaqarpat tamanna timmikkut anniaatilinnut immikkoortortaqaarfimmi ingerlanneqarsinnaasoq, tak. § 14. Ilanngunneqartumi qulakkeerniarneqarpoq tamatumunnga tunngavissaqartoqarnerata paatsuungassutigineqannginnissaa.

2.3 Aalajangersakkat nalinginnaasut

2.3.1 Inatsit atuuttoq

Inatsimmi tunngaviusumik isumaavoq pinngitsaaliissummik iliuuseqarnermik atuinerup pitsaaliornissaa aamma atorneqartannginnissaata sapinngisamik annertunerpaajutinnissaa.

Nakorsartinnissamut suugaluartumulluunniit nammineq piumassutsimik peqataaneq tunngaviuvoq pitsaanerpaaq, anguniagarlu taannaavoq ullumikkut anguniarneqareersoq. Taamaattumik pingaaruteqarpoq isumaliutigissallugu iliuutsit sorliit atussallugu tulluarnernerisut napparsimasup nammineq piumassutsiminik peqataanissaanut periarfissai anguniarlugit.

Inatsimmi ilaavoq nalinginnaasumik maleruaqqusaq nakorsap pisussaaffigisaa nammineerluni, tarnimikkut napparsimasunut nakorsarneqartunut anguniagaq aamma taakku nakorsarneqarneranni nakorsaatit atorneqartut suunerinik peqqinnissaqarfiup napparsimaviinut unitsitsinermut atatillugu, ilisimatissallugit, tak. § 3, imm. 2, imm. 1-imut ataqatigiissillugu. Iitersuinissamut pisussaaffiup qulakkiigaa tassaavoq napparsimasup isummernissaminut tamatumalu kingornatigut ilisimatinneqareerluni akuersisinnaanissaminut pisariaqartumik tunngavissaqarnissaa. Pinaveersaartitsinermut atatillugu matumani kissaatiginarpoq aammattaaq napparsimasup qaninnerpaamik qanigisai napparsimasup

nakorsarneqarnera pillugu ilisimatinneqarnissaat. Taamaattorli taamatut ilisimatitsinermi piumasaqataassaaq napparsimasup akuersissuteqarnissaa.

Dronning Ingridip Napparsimavissuani tarnimikkut napparsimasunut immikkoortortaqarfimmi nakorsaaneq pisussaaffeqarpoq tarnimikkut napparsimasunut tamanut nakorsarneqarnissaq pillugu pilersaarusiornissaq, tassani apeqqutaatinnagu napparsimavimmi pinngitsaaliissummik uninngatinneqarnerisut imaluunniit namminneq piumassutsiminnik uninnganersut, tak. § 3, imm. 3. Nakorsarneqarnissaq pillugu pilersaarusiaq sapinngisamik napparsimavimmut unitsinneqarnerup kinguinnguatiq suliarineqartariaqarpoq aamma napparsimasup pisariaqartitsinera tunngavigalugu ingerlaavartumik naleqqussarneqassalluni. Nakorsarneqarnissaq pillugu pilersaarut taamaattoq paasitinneqarsimalluni akuersissuteqarnissap anguneqarnissaanut atussallugu tulluassaaq. Nakorsartinnissaq pillugu pilersaarut pigineqanngippat taava napparsimasumit qanoq pisoqassanersoq, kiisalu pineqartup suna akuerineraa imaluunniit akerlerineraa paasineqarsinnaanngilaq.

Imatut pisoqartillugu napparsimasup nammineq piumassutsiminik peqataanissaa anguneqarnani, taava napparsimasup isumaa nalinginnaasumik ataqinneqassaaq tamatumalu kingunerissallugu napparsimavimmut unitsitsitsinissap aamma nakorsarneqarnissap aallartinneqarnissaa aallartinneqassanngitsoq. Pinngitsaaliissummik iliuuseqarnissamut piumasaqaatit pigineqarpata, tak. matuma kinguliani immikkoortumi 2.4-imi kiffaangissusiagaanermut tunngasumi, taava qulakkeerneqassaaq pinngitsaaliissummik iliuuseqarnerup taamaallaat pisariaqavissumut killilerneqarnissaa. Tamanna tassaavoq annikinnerpaamik periuseqarnermi atorneqartussatut taaneqartartoq.

2.3.2 Siunnersuut matumani pineqartooq, tak. kapitali 2 §§ 3-5

Siunnersuummi inatsisitigut atugassarititaasut atuuttut ingerlateqqinneqarput, oqaasertai annikitsumik § 4-mi erseqqissarlugit.

Kiffaangissusiaaneq tunngaviusumik inatsimmi § 71 naapertorlugu erseqqilluinnartumik inatsisitigut tunngavissaqartussaavoq. Tarnimikkut napparsimasut pillugit inatsimmi atuuttumi Dronning Ingridip Napparsimavissuani tarnimikkut napparsimasunut immikkoortortaqarfimmi nakorsaaneq inuttut arlalinnik pisinnaatitaaffilerneqarpoq ilaatigut pinngitsaaliissummik unitsitsinissamut aamma pinngitsaaliissummik nikitsaaliuinissamut atatillugu.

Kisiannili Dronning Ingridip Napparsimavissuani tarnimikkut napparsimasunut immikkoortortaqarfik sulisoqarnikkut killilimmik isumalluuteqarpoq, taamaattumik piviusumik periarfissaanngilaq nakorsaanermik tamatigut pigaartuusoqartarnissaa, tassa matuma siuliani taaneqartunik aalajangiisinnaasumik. Tamanna pisinnaatitaaffiit isumannaatsuunissaannut aamma peqqissutsikkut suliatigut eqqarsarnartoqarpoq, tassami sulisut imatut inississinnaammata toqqaasariaqalersinnaallutik pinngitsoornani aalajangiinissamut inatsisitigut pisussaaffeqarnerminnit qaffasinnerusumik inissisimasumi, imaluunniit suliassaq peqqissutsimut tunngasoq nakorsarneqarnissamik pisariaqartitsineq pisariaqartoq pinngitsuussalluni. Taamaattumik Naalakkersuisut siunertaqarluartutut isigaat inatsimmi aammattaaq isummertoqarnissaa qanoq iliortoqarnissaanut, tassa aalajangiinissamut pisinnaatitaaffik nakorsaanermut inuttut pisussanngortinneqarnerani, kisianni aalajangiineq allatut ajornartumik nakorsamit appasinnerusumi inissisimasumit aalajangerneqartariaqalerpat, soorlu assersuutigalugu napparsimasoq unnuakkut napparsimavimmukaaneparpat pinngitsaaliissummik unitsinneqarnissaa siunertarineqarluni, tassanilu periarfissaqartoqarnani pinngitsaaliissummik unitsitsinissamut apeqqut nakorsaanermut saqqummiutissallugu.

Nakorsaanerup peqannginnera soorlu assersuutigalugu aammattaaq feeriarnermik imaluunniit qinikkatut pisortanillu toqqakkatut suliaqarnermik patsiseqarsinnaavoq.

Tarnimikkut napparsimasut pillugit inatsisimmi § 5 siunnersuutip kingunerissavaa aalajangiinerit aalajangersakkami taaneqartut, soorlu assersuutigalugit pinngitsaaliissummik unitsitsinermut aamma pinngitsaaliissummik uninngatitsinermut tunngasut, nakorsaanermut inuttut aalajangerneqassasut imaluunniit nakorsaneq peqanngitsillugu taava nakorsamit, nakorsaanerup peqannginnera pissutigalugu Dronning Ingridip Napparsimavissuani tarnimikkut napparsimasunut immikkoortortaqarfimmi nakorsaanissamut tunngatillugu akisussaassuseqartumik. Aalajangersakkami qulakkeerneqarpoq tarnimikkut napparsimasut pisariaqartumik nakorsarneqarsinnaanerata, aammattaaq taamatut pisoqartillugu tamanna pisariaqarpat nakorsaanerup peqannginnerata nalaani.

Nakorsaq nakorsaanerup peqannginnerata nalaani aalajangiippat, taava nakorsaanerup *piaarnerpaamik* aamma nalunaaquttap akunnerisa 24-t qaangiutinnginnerani isummerfigissavaa nakorsap pinngitsaaliissummik iliuuseqarnissamut aalajangiinera, tassa imaappoq periarfissami siullerpaami. Nakorsaanerup isummernerata pinngitsaaliissummik iliuuseqarneq pillugu allattaavissuarmut ilanngunneqassaaq. Taamaalilluni maleruaqqusap siunnersuutigineqartup tunngaviusumik aallaaviusoq atuutsiinnassavaa, tassa taamatut

annertuumik pisoqarnissaanut aalajangiinerit tunngaviusumik nakorsaanerup pisinnaatitaaffianut ilaasut.

Malugineqassaaq nakorsaaneq tassaasoq sulii akisussaassuseqarnerpaajusoq, tassa kiffaanngissusiaanerup aamma pinngitsaaliissummik allamik atuinerup tarnimikkut napparsimasup pillugit inatsimmi maleruaqqusat naapertorlugit pisariaqartitsisoqarnera sinnerlugu atorneqannginnissanut, tak. § 32, imm. 1.

2.4 Kiffaanngissusiaaneq

2.4.1 Pinngitsaaliissummik napparsimavimmut unitsitsineq aamma pinngitsaaliissummik uninngatitsineq

2.4.1.1 Inatsit atuuttoq

Silanngajaarneq tassaavoq pinngitsaaliissummik napparsimavimmut unitsitsinissamut aamma pinngitsaaliissummik uninngatitsigallarnissamut qitiusutut piumasaqaatitut tunngavissaasoq, tak. § 5. *Silanngajaarneq* inunnut pineqartunut qanoq innerannik naliliinermi killiinissamut sapinngisamik ilisarnaatitut annikinnerpaatut isigineqartariaqarpoq, tassa ulorianassutsimut aamma nakorsartinnissamut ilisarnaatip eqquutsinneqarnissaanut atatillugu taakku tarnimikkut nappaatilinnut immikkoortorta qarfimmi kiffaanngissusiaarneqarsinnaaneritut.

Silanngajaarneq (isumaqatigaa tarnikkut perulunneq) tassaavoq tarnikkut pissuseq pisarnertut ittuunngitsoq. Siullermik ilisarnaataavoq piviusunik naliliisinnaanerpup allanngornera, napparsimasup avatangiisiminik aamma imminik misiginnissinnaanermik, nammineq qanoq innerminik aamma iliuuserisaminik naliliisinnaanermut periarfissaqarneranut "piviusunut" naleqqiussilluni akornuserneq.

Retslægerådip paasinninnera naapertorlugu suliatigut atituumik isumaqatigiittoqarpoq silanngajaarnerup (tarnikkut perulunnerup) suuneranut tunngatillugu. Tarnikkut perulunnerit assigiinngitsut suuneritut sumut killeqarnerat pillugit tarnikkut nappaateqarnerit pillugit ilinniartinnit ataasiakkaani assigiinngitsunik isumaqarneq apeqqutaatinnagu, kiisalu ajornartorsiutit imatut: tarnimigut peruluppoq – tarnimigut perulunngilaq aalajangiinissamut ajornartorsiutinut attuumassuteqartut apeqqutaatinnagit, taamaalilluni oqariaaseq tarnikkut perulunneq pingaaruteqartumik aalajangersimavoq. Pinngitsaaliissummik unitsitsinermut aamma pinngitsaaliissummik uninngatitsinermut atatillugu tarnikkut nakorsaasarnermi napparsimanerup suussusianik aalajangiinermi silanngajaarnerup saniatigut aammattaaq ilaapput *imatut pissuseqarneq tamanna silanngajaarnermut sanilliunneqarsinnaalluarluni*. Pissuseq misissuinerup nalerpiaani silanngajaarnermit allaanerusutut immikkoortinneqassanngilaq taamaattumillu aammattaaq assinganik nakorsarneqassaaq,

imaappat qanoq issusermik naliliinissamut nakorsartinnissamut aamma ulorianassutsimut ilisarnaatit tamatumunnga atatillugu eqquutsinneqarsimappata.

Piumasaqaatigineqarpat imaattoqarnera "imatut pissuseqarneq tamanna silanngajaarnermut sanilliunneqarsinnaalluarluni" taava allanneqassaaq, tamatumani pineqartoq sammisami killiussat annikitsuararsuusut. Assigiissutsip naammassinera pissutissaqavissaguni taava assigiissuseqarnissamut piumasaqaatit eqqorluinnartumik naammassinnissapput. Tamanna taamaattoqarneratut isigineqartariaqarpoq soorlu assersuutigalugu sakkortoorujussuarmik puuarrallalluni pissuseqarnermi, pissusissamisuunngitsumik tassanngaannaq iliorneq sianissutsip allangorneranik malitseqartumik, imigassamik aamma/imaluunniit tarnikkut napparsimasunut nakorsaatinik peqquteqartumik nappaateqartutut pissusilersorneq, pissutsit inuttut inuunermit attuumassutillit, noqartarnermik nappaateqarneq pissutigalugu noqarnermi pujorsuup iluaniinneq aamma neriumajunnaarnermik nappaateqarnermi – nukillaarnermik annertuumik aamma inuunerup navianartorsiortinneqarneranik kinguneqartumik.

Silanngajaarneq imaluunniit imatut tamatumunnga sanilliunneqarsinnaalluartumik pissuseqarneq pisaqarpoq – kisianni piumasaqaatit naammannngilaq – pinngitsaaliissummik napparsimavimmut unitsitsinissamut imaluunniit pinngitsaaliissummik uninngatitsinissamut.

Napparsimasoq *qanoq issusermik naliliinikkut nakorsartinnissamut* imaluunniit *ulorianassutsimut ilisarnaatit* pigissavai. Tamatuma saniatigut piumasaqaataavoq unitsinneqarneq imaluunniit uninngatinneqarneq pissasoq *nakorsarneqarnissaq siunertaralugu*. Piumasaqaat tamanna nakorsartinnissaq ilisarnaateqartillugu taamaallaat kiffaannngissusiiaanermi atorneqarnani kisianni ulorianassuseq ilisarnaateqartillugu aammattaq kiffaannngissusiiaanermi atorneqassaaq.

Napparsimasoq pissuseqarnermigut *imminnut navianartorsiortissaaq imaluunniit allanut navianarluni*. Imminnut toqunnissaq imaluunniit imminut ajoqusernissaq aarlerinarpata, taava napparsimasoq imminut navianartorsiortissinnaavoq. Allanut ulorianarsinnaaneq ilisarnaateqarpat taava periarfissiissutigineqassaaq pinaveersaartitsinermik iliuuseqarnissaq inuit allat illersorneqarnissaat piinnarnagu aammali tarnimigut napparsimasoq mianeralugu, taanna pinngitsaaliissummik unitsinneqaruni inatsisinik unioqqutitsinissaanut illersorneqassammat. Inatsisitigut unioqqutitsinerit immaqa eqqartuussisutigut malersorneqarnermik kinguneqaratarsinnaasut.

Tarnimikkut napparsisunut immikkoortortaqarfimmi kiffaannngissusiiaaganermut taarsiussineq imaattariaqannngilaq pineqartumut iliuuseqartoqassanngitsoq, imaappat ilisarnaat "allanut

navianarnej" isumakkeerneqarpat. Tamatumunnga paarlaallugu akuttunngitsumik politiinit pineqaatissinneqarnej pisinnaavoq, soorlu assersuutigalugu tigusaaneq imaluunniit isertitsivimmiitinneqarnej pinerlussimanermik, aalakooujussuarnermik imaluunniit tamat ornittagaanni akornusersuinerneqarnej pissuteqartumik il.il., tamannalu inunntut tarnimikkut nappaateqartunut aaqqiissutissatut kissaatiginarnaviangilaq.

Nakorsarneqarnissamut ilisarnaat tunngavigalugu kiffaangissusiiaaneq pisinnaavoq imaappat, *taamak iliortoqanngippat peqqissinissamut imaluunniit malunnaateqarluartumik aamma pingaarutilimmik peqqinnerulernissamut periarfissat malunnaateqarluartumik ajornerulertussaallutik*. Tarnikkut nappaatip ajorunnaarsinnaanerata ilimagineqarsinnaanera piumasarineqarsinnaangilaq, tamanna imatut paasineqassaaq napparsimasup napparsimavimmi nakorsarneqarnermi kingornatigut ajorunnaavinnissani naatsorsuutigisinnaangilaq. Taamaattorli nakorsartinneq malunnaateqarluartumik peqqinnerulernermik imaluunniit qanoq issutsip tassangaannaq ajornerulernissaata pitsaaliorneqarnera erseqqissumik tunngavissaqassapput. Nakorsartinnissamut ilisarnaatinut piumasaqaatit naammassineqartutut isigineqarsinnaapput naammaginartumik malunnaateqarluartumillu iluaallatsitsineq misigineqarpat. Piviusorsioartumik ilimagineqarsinnaavoq napparsimasup napparsimavimmi nakorsartereernermi kingornatigut ima pitsaangortigisimanissaa, nakorsartinnerup inernerisinnaallugu angerlartinneqarnej.

Tarnimigut napparsimasup matuma siuliani § 5-imi piumasaqaatit nassuiarneqartutut eqquutsinneqarpat napparsimasooq pinngitsaaliissummik unitsinneqarsinnaavoq imaluunniit pinngitsaaliissummik uninngatinneqarsinnaalluni. Pinngitsaaliissummik uninngatitsineq atuutsinneqassaaq napparsimasooq nammineq piumassutsini naapertorlugu uninngasooreerpat imaluunniit pinngitsaaliissummik uninngatinneqareerneratigut.

Napparsimasup pinngitsaaliissummik unitsinneqareernermi kingornatigut angerlartinneqarnissani kissaatigippagu Dronning Ingridip Napparsimavissuani tarnimikkut napparsimasunut immikkoortotaqarfimmi nakorsaanerup nalilissavaa § 5-imi piumasaqaatit suli atortinneqarnerisut. Taamaappat angerlarniarnej itigartitsissutigineqassaaq napparsimasorlu pinngitsaaliissummik uninngatinneqassalluni.

Pinngitsaaliissummik uninngatitsinissamut allamittaaq periarfissaqarpoq, aammattaaq Dronning Ingridip Napparsimavissuani nammineq piumassusertik naapertorlugu uninngasunik. Tassani pineqartut tassaapput napparsimasut pinngitsaaliissummik unitsinneqarnissamut inatsimmi § 5-imi piumasaqaatini pineqartut namminerlu piumassutsiminnik uninngareerlutik angerlarusuttut. Dronning Ingridip Napparsimavissuani

tarnimikkut napparsimasunut immikkoortorta qarfimmi nakorsaanerup inatsimmi § 5-imi piunasaqaatit atortinneqarnissaat nalilerpagu, angerlarnissaq itigartitsissutaasinnaavoq napparsimasorlu pinngitsaaliissummik uninngatinneqassalluni.

Silanngajaartoq nammineq piunassutsi naapertorlugu peqqinnissaqarfiup immikkoortuisa ilaasa arlaanni uninngasoq angerlarusuppat inatsimmi § 5-imi pinngitsaaliissummik unitsitsinermut piunasaqaatit atortinneqarnerat aallaavigalugu itigartinneqarpat, Dronning Ingridip Napparsimavissuani tarnimikkut napparsimasunut immikkoortorta qarfimmut § 1 imm. 2-mi maleruaqqusat naapertorlugit pinngitsaaliissummik unitsinneqarnissaa sulissutigineqassaaq.

2.4.1.2 Siunnersuut matumani pineqartoq, tak. §§ 6 aamma 10

Siunnersuummi inatsisitigut pisinnaatitaaffiit atuuttut ingerlateqqinneqarput.

2.4.2 Uninngavimminnit qimaasut pinngitsaaliissummik utertitaasinnaanerat aamma kiffaangissusiagaanerup atuukkunnaarsitaanera

2.4.2.1 Inatsit atuuttoq

Inatsimmi atuuttumi § 10 naapertorlugu uninngavimminnit qimaasunik takkutinnitsoortunillu utertitaasitsisoqarsinnaavoq. Takkutsinngitsoornerup paasineqarneraniit sapaatit akunnerata ataatsip qaangiutinnginnerani taamaallaat utertitsisoqarsinnaavoq. Takkutinngitsoornerup paasineqarneraniit sapaatit akunnera ataaseq qaangiutereersimappat unitsitsineq uninnermut atatillugu pappiaqqanik nutaanik immersuinikkut aatsaat pisinnaavoq. Aninissamut akuerineqareerluni pineqartoq takkutinnitsoorpat utertitsinissamut taamatuttaaq piunasaqaataavoq, ullut pingasut sinnerlugit unnuinertalerlugu aninissamut akuersisoqarsimannginnissaa.

§ 11 naapertorlugu kiffaangissusiagaaneq ingerlaannartumik taamaatinneqassaaq § 5-imi piunasaqaatit atuukkunnaarsimappata.

2.4.2.2 Siunnersuut matumani pineqartoq, tak. § 11-12

Siunnersuummi inatsisitigut pisinnaatitaaffiit atuuttut ingerlateqqinneqarput.

Erseqqissarneqarpoq kiffaangissusiagaanerup taamaatinneqarnissaanut nakorsaaneq kisimi aalajangiinissamut pisinnaatinneqartoq. Siunnersuummi § 12-imi oqaaseqaatigineqartut immikkut ittut innersuussutigineqarput.

2.4.3 Pinngitsaaliisummik unitsinneqarnermi periuseq

2.4.3.1 Inatsit atuuttoq

Unitsitsinermut periuseq sukumiisumik nassuiarneqarpoq §§ 6-8-imi.

Tassani ilaatigut allassimavoq pinngitsaaliisummik unitsinneqarnissap ingerlanneqarnissaanut politiit aalajangiissasut aamma tamatumunnga ikiuissasut.

Taamaalilluni tassaapput politiit nakkutigissavaat pinngitsaaliisummik unitsitsinerup ingerlanneqarnissaanut periuseq malinneqarnerseq.

Dronning Ingridip Napparsimavissuani tarnimikkut napparsimasunut immikkoortorta qarfimmi nakorsaanerup aalajangiissavaa pinngitsaaliisummik unitsitsinermut piumasaqaatit atuutsinneqarnerusut, aamma napparsimasoq tamanna tunngavigalugu tarnimikkut napparsimasunut immikkoortorta qarfimmu pinngitsaaliisummik unitsinneqarsinnaanersaq.

2.4.3.3. Siunnersuut matumani pineqartoq, tak. §§ 7-9

Siunnersuummi inatsisitigut pisinnaatitaaffiit atuuttut ingerlateqqinneqarput.

Oqaatsitigut ataasiakkaanik erseqqissaateqartoqarpoq.

2.5 Pinngitsaaliisummik nakorsarneqarneq

2.5.1 Inatsit atuuttoq

Tunngaviusumik piumasaqaataavoq nakorsamit pinngitsaaliisummik nakorsarneqarnermi tamani taamaallaat napparsimasut uninngasut pinngitsaaliisummik nakorsarneqarsinnaanerat piumasaqaataavoq. Taamatuttaaq piumasaqaataavoq napparsimasut taakku pinngitsaaliisummik uninngatitsinneqarnissaannut piumasaqaatit naammassineqarsimanissaat. Dronning Ingridip Napparsimavissuani tarnimikkut napparsimasunut immikkoortorta qarfimmi nakorsaaneq kisimi pinngitsaaliisummik unitsitsinissamut aalajangiisnnaavoq, tassunga ilanngullugit pinngitsaaliisummik nakorsarneqarnerup suunissaanik sivisussusissaanillu aalajangiilluni.

Pinngitsaaliisummik nakorsaatitortitsinertalimmik pinngitsaaliisummik nakorsarneqarneq, qupinnguallatsitsisarneq aamma pinngitsaaliisummik nerisitsineq taamaallaat Dronning Ingridip Napparsimavissuani aallartinneqarsinnaapput aamma ingerlanneqarsinnaallutik.

Qupinnguallatsitsilluni nakorsaanissamut immikkut piumasaqaataapput napparsimasup piffissami tassanerpiaq qanoq-issusia imatut inissisimassalluni inuunera navianartorsiorsinnaalluni.

Pinngitsaaliissummik nakorsaatitortitsinissaq aallartinneqassanngilaq peqqinnissaqarfiup suliffeqarfiini allani pinngitsaaliissummik unitsitsinernik aallartitserersuni. Tamatumani pingaartinneqarpoq suliffeqarfinni taakkunani ingerlaannartumik nakorsaatitortitsinissamut periarfissap atuutiinnarnissaa. Taamatut nakorsaatitortitsineq pinngitsaaliissummik ingerlanneqassappat timi atorlugu pissaanermik atuneq pillugu maleruagassani periarfissaliisoqassaaq aamma iliuuseqarnertut sakkukinnerusutut eqqissinartumik kapuummik kapitinneq atorneqarpat, tak. § 22 imm. 2. Napparsimasumik piffissami sivisuumi nakkutiginninnissaq piumasaqaataavoq sivisuumik nakorsaatitortitsinissamut pilersaarusiornissamut, tassunga ilanngullugu pinngitsaaliissummik nakorsaatitortitsinissamut periarfissaqarnissaq, tamannalu taamaallaat Dronning Ingridip Napparsimavissuani tarnimikkut napparsimasunut immikkoortortaqarfimmi illersorneqarsinnaasumik ingerlanneqarsinnaavoq.

Inatsimmi periarfissiisoqarpoq napparsimasunik pinngitsaaliissummik uninngatinneqarnissamut piumasaqaatinik naammassinnittunik timikkut anniaatinik pinngitsaaliissummik nakorsaanissamut. Taamaattorli pinngitsaaliissummik nakorsaanissamut periarfissaq tamatumani killilerneqarpoq napparsimasut inuunerat imaluunniit peqqissusiat annertuumik navianartorsiorpat. Timikkut nappaatinik pinngitsaaliissummik nakorsaanissamut aalajangiineq tarnimikkut napparsimasunut immikkoortortaqarfimmi nakorsaanerup aamma timikkut napparsimasunut immikkoortortaqarfimmi nakorsaanerup ataatsimoorlutik aalajangiiffigissavaat. Tarnimigut napparsimasoq Dronning Ingridip Napparsimavissuani tarnimikkut napparsimasunut immikkoortortaqarfimmiinnigippat maleruagassaaq taanna naapertorlugu pinngitsaaliissummik nakorsaanissamut piumasaqaataavoq, tamanna sioqqullugu pinngitsaaliissummik unitsitsinermut uppernarsaatip naammassineqarsimanissaa, aamma tarnimikkut napparsimasunut immikkoortortaqarfimmi nakorsaanerup pinngitsaaliissummik unitsitsinermut piumasaqaatit naammassineqarnerat aalajangiiffigisimappagu.

2.5.2 Siunnersuut matumani pineqartoq, tak. kapitali 4 §§ 13-14

Siunnersuummi inatsisitigut pisinnaatitaaffiit atuuttut ingerlateqqinneqarput.

Tarnimikkut napparsimasut pillugit inatsit atuuttuusoq ullumikkut ima oqaasertaqartinneqarpoq nakorsaatit misilerarneqareersimasut nalinginnaasumik annertussusilikkat annikinnerpaanillu kingunerluutitallit pinngitsaaliissummik nakorsaatitortitsinermi atorneqassapput.

Nakorsaatilli allatut sunniutigisinnaasaat assigiingisitaartuupput, oqaaseqatigiinnilu taakkuni atorneqartuni soorlu assersuutigalugu uummatikkut ajoquteqalersinnaanermut aamma nujaarunnissamut nalorninartoqarsinnaanera immikkoortinneqanngillat.

Siunnersuummi erseqqissarneqarpoq nakorsaatit allatut sunniutigisinnaasaasa amerlassusiat aalajangiisuunngitsaq, illuatungaaticullu nakorsaatit allatut sunniutigisinnaasaasa erloqinartut amerlassusiat. § 13, imm. 4-mi ilanngussap qulakkiissavaa nakorsaatit napparsimasunut annikinnerusumik ajoqusiisut atorneqassasut.

2.6 Angerlartinneqarnerup kingornatigut malinnaaffiginnineq

2.6.1 Inatsit atuuttoq

Inatsimmi § 14-imi allassimavoq Dronning Ingridip Napparsimavissuani tarnimikkut nappaatilinnut immikkoortorta qarfiimmi nakorsaanerup akisussaaffigigaa napparsimasut angerlartinneqarnermik kingorna peqqissuunissaq anguniarlugu nakorsarneqarnissamut isumaginninnikkulluunniit neqeroorutit, napparsimasup peqqissusianut pisariaqartinneqartut, pillugit namminneq saaffiginninnissaat naatsorsuutigineqanngitsunut napparsimavimmit angerlartitaanermut isumaqatigiissuteqarfigineqassasut. Napparsimasoq § 14-imit pineqartoq napparsimavimmit angerlartitaanermut atatillugu isumaqatigiissuteqarfigineqarnissamut peqataajumanngippat nakorsaanerup akisussaaffigaa napparsimasup nakorsarneqarnissamut tunngasutigut isumaginninnikkullu neqerooruteqarfigineqarnissamut ataqatigiissaakkamik pilersaarusiortoqarnissaa, takuuk § 15.

Napparsimavimmit angerlartitaanermut atatillugu isumaqatigiissuteqartoqarsimappat imaluunniit ataqatigiissaakkamik pilersaarusiortoqarsimappat tarnimikkut napparsimasunut immikkoortorta qarfiup aamma pisorta qarfiit allat, peqqinnissakkut sullissisut il.il. akornanni paasissutissanik, napparsimasup inuttut nammineq inuuneranut tunngasunik, paarlaasseqatigiittoqartarsinnaavoq.

Sullinniakkat taakkuupput napparsimasut tarnimikkut peruluutillit peqqissutsimikkut annertuumik eqqorneqartussat arlaatigut nakorsarneqarnissamut tunngasumik imaluunniit isumaginninnikkut tapersorsorneqanngikkunik. Tamatumani assersuutitut taaneqarsinnaasut tassaapput napparsimasut skitzofrenimik napparsimasut tamannalu ilutigalugu atonerluineramik ajornartorsiuteqartut imaluunniit inuttut inuuniarnerminni annertuumik ajornartorsiuteqartut.

Napparsimavimmit angerlartitaanermut atatillugu isumaqatigiissut imaluunniit ataqatigiissaakkamik pilersaarut napparsimasup maanna siunissamilu nakorsarneqarnissamut

isumaginnikkullu pisariaqartitaanik neqeroorutinik imaqartariaqarpoq. Taamatuttaaq nakorsarneqarnissamut tunngasutigut tulluurtunik neqeroorutinik oqartussaasunik pineqartunik il.il. siullermik ataatsimiinnissamut ullua nalunaaqutaalu ilanngullugit aammattaaq ilanngunneqartariaqarput. Taamatullu isumaqatigiissut eqquutsinneqanngippat kina malinnaaffiginninnissamut akisussaasuunersoq kinalu qisuariassanersoq allassimasariaqarput. Kiisalu isumaqatigiissummi allassimasariaqarpoq qaqugu isumaqatigiissut taamaatinneqassanersoq qaqugulu naliliivigineqassanersoq.

Tarnimikkut napparsimasut sanngiinneraannik ikiuineq annertusiniarlugu napparsimavimmit angerlartitaareernermit pinngitsaaliissummik malinnaaffigineqarnissamut periarfissiisoqarpoq. Napparsimasut namminneq aalajangiinnaatitaanerannut ataqqinninneq tarnimikkut peruluutillit katsorsartinnissamik annertuumik pisariaqartitsisut, nappaateqarnerminnilli paasisimasaqanngitsut, ilaginnarneqarnerannik kinguneqassanngilaq. Siunnersuummi pineqartumi taamatut tarnimikkut napparsimasunik naammaginartumik katsorsarneqarnissamut tungiorneqarnissamullu namminneerlutik ujartuisinnaanngitsunik tamanna sumiginnaanertut isigisariaqassaaq. Inatsisitigut illersugaanissaq eqqarsaatigalugu pinngitsaaliissummik malinnaaffiginninnissamut tunngavilersuutit sukangasuut atuutilersinneqarput. Tamatumuuna ajortumik ingerlasoqalinnginnissaa aamma periarfissat pisariaqanngitsumik atorneqannginnissaat qulakkeerniarneqarput. Napparsimavimmit angerlartitaanermit atatillugu pinngitsaaliissummik malinnaaffiginninnissaq pillugu tunngavilersuutit sukumiinerusut § 17-imut immikkut oqaaseqaatinut innersuussutigineqarput.

Napparsimavimmit angerlartinneqarnerup kingornatigut pinngitsaaliissummik malinnaaffiginninnissaq pillugu nakorsaanerup aalajangiinera peqqinnissaqarfium suliffeqarfiisa arlaanni nakorsaatitortinneqarnissamut takkunnissamut peqquneqarnermik taamaallaat imaqassaaq. Napparsimasoq takkutinnngippat politiit ikiorsiullugit aaneqarnissaa peqqinnissaqarfimmilu pineqartumi pinngitsaaliissummik nakorsaatitortinneqarnissaa nakorsaanerup aalajangersinnaavaa. Peqqinnissaqarfimmi pinngitsaaliilluni uninngatitsineq pineqartoq sivikitsuinnaassaaq (ulloq ataaseq). Pinngitsaaliissut tassanngaannaq pisoq taamaallaat atorneqassaaq napparsimasup, tarnimikkut nappaatilinnut immikkoortortaqarfimmit angerlareernermini, nakorsaatitortiinnarnissaa peqqissusianut apeqqutaappat, tarnimikkut napparsimasunut immikkoortortaqarfimmut unitsitseqqaarnagu pisariaqartumik nakorsaatitortitiinnarnissaanut allatigut periarfissaqavinnngippat.

Pinngitsaaliissummik malinnaaffigineqarnissap aalajangiunneqarnera qaammatit pingasut qaangiukkaangata nakorsaanermit naliliiffigeqqinneqartassaaq. Nakorsaanerup tassani nalilissavaa tunngavissaqartumik aarleqqutaasinnaanersoq aamma tunngavissaqartumik

nalorninartoqarnersoq napparsimasup qaammatit pingasut qaangiunneranni pisariaqartitamik nakorsartinnerminik unitsitsinissaa. Taamaattoqassappat nakorsaanerup aalajangersinnaavaa pinngitsaaliissummik malinnaaffigineqarnerup qaammatit pingasukkaarlugit angullugit sivitsorneqartarnissaa.

Kissaatigineqanngilaq tarnimikkut napparsimasut pineqartut inuttut kiffaanngissuseqarnerat qaqugumulluunniit atuuttussamik akuliuffigineqarnissaa. Napparsimavimmi unitsinneqarsimanerup malinnaaffigineqarnera pineqarmat, inatsimmi allassimavoq napparsimasup sivisunerpaamik qaammatini aqqaneq-marlunni pinngitsaaliissummik malinnaavigineqarsinnaanera. Taamatut napparsimasup pinngitsaaliissummik malinnaavigineqarsinnaaneranik qaffasinnerpaaffissaasumik killiliinikkut napparsimasumik piffissami sivisuallaami pinngitsaaliissummik katsorsartinnissamik pinngitsoortitsivoq. Taamaalilluni angerlareernermi pinngitsaaliissummik malinnaaffigineqarnissaq aatsaat aallartinneqaqqissinnaavoq napparsimasup matuma siuliani taaneqartut piumasagaatit naammassippagit.

Angerlareernermi pinngitsaaliissummik malinnaaffigineqarnissamat piumasagaatit pinngitsaaliissummik unitsitsinissamat aamma pinngitsaaliissummik nakorsarneqarnissamat piumasagaataasut assiginngilaat, tak. siunnersuummi kapitali 3 aamma 4. Napparsimasut silanngajaartuusut aamma kapitalit taakku naapertorlugit nakorsarneqarnissamat imaluunniit ulorianartorsiornermut ersiutinik pigisaqartut Dronning Ingridip Napparsimavissuani tarnimikkut napparsimasunut immikkoortorta qarfirmut unitsillugit suli katsorsartissinnaapput. Pinngitsaaliissummik malinnaaffigineqarnissamat siunertaavoq taamaaliornikkut taamatut napparsimasup, napparsimanerata ima ajornerulernissaa pinngitsoorniarlugu, pinngitsaaliissummik unitsitseqqinnissaq pisariaqalerluni.

Pinngitsaaliissummik malinnaaffiginninnissamat aalajangiineq inatsisitigut illersugaanerup sakkortuunik qularnaveeqquserneqarneranik malitseqartinneqarpoq. Napparsimasoq taamaalilluni automatiskiusumik siunnersortilerneqassaaq, pineqarnerlu Tarnimikkut Nappaatillit Maalaarutaannik Aalajangiisartunut, maalaarutip tiguneraniit kingusinnerpaamik ulluinnaat arfineq marluk qaangiunneranni aalajangiisussanut, maalaarutigineqarsinnaavoq. Napparsimasup maalaaruteqarnissani kissaatigippagu pinngitsaaliissummik malinnaaffiginninnissaq aallartinneqarsinnaanngilaq Tarnimikkut Nappaatillit Maalaarutaannik Aalajangiisartunit pinngitsaaliissummik malinnaaffiginninniarnepup akuersissutigineqartinnagu,. Tarnimikkut Nappaatillit Maalaarutaannik Aalajangiisartunit napparsimasoq ilalerneqarpat pinngitsaaliissummik malinnaaffiginninnissaq aallartinneqarsinnaanngilaq.

Napparsimasoq Tarnimikkut Nappaatillit Maalaarutaannik Aalajangiisartunit ilalernerqanngippat aalajangiineq eqqartuussivikkut aalajangigassanngortinneqarsinnaavoq. Pinngitsaaliissummik malinnaaffigineqarnerup sivitsorneqarneri tamaasa Tarnimikkut Nappaatillit Maalaarutaannik Aalajangiisartunut maalaaruteqartoqaqqissinnaavoq eqqartuussivikkut suliareqqitassanngortitsinermik periarfissalimmik.

Malugeqquneqarpoq angerlareernermi pinngitsaaliissummik malinnaaffigineqarnerup kingunerissagaa taamatut pinngitsaaliissummik iliuuseqarnejq siunnersuummi iliuuserisassat allat assigalugit immikkoortortaqrarfiup pinngitsaaliissummik protokolianut ilanngunneqassasoq Nunatsinnilu Nakorsaannermut nalunaarutigineqassalluni, tak. § 30.

2.6.2 Siunnersuut matumani pineqartoq, tak. kapitali 5 §§ 15-19

Siunnersuummi inatsisitigut pisinnaatitaaffiit atuuttut ingerlateqqinneqarput.

2.7 Sukaterussineq il.il.

2.7.1 Inatsit atuuttoq

Inatsisimi atuuttumi pinngitsaaliissutit tamarmik, sukaterussinerit imaluunniit najumminninnerit, pingaarnernut ukununnga immikkoortinneqarput: Pinngitsaaliissummik sukaterussineq, timi atorlugu pissaanermik atuineq, napparsimasup imminut ajoqusinnginnissaa anguniarlugu sukaterussineq, immikkut nakkutilliineq, immikkoortortami matunik parnaarsuineq kiisalu pinngitsaaliissummik timikkut eqqiluisaartitsineq.

Pinngitsaaliissummik sukaterussineq imminullu ajoqusinnginnissaa anguniarlugu sukaterussineq immikkoortinniarnissaanni sukaterussinerit arlaat iliuuserineqartoq pingaaruteqarpoq. Siunertarineqarpat ulorianartorsiornissap pinngitsoortinnissaa, napparsimasup siunertarippagu imminut avatangiisiminiittunilluunniit ajoqusiiniarnissani, taava pinngitsaaliissutit tamanna taaneqassaaq. Akerlianik illersorneqarnissaaq pineqarpoq napparsimasup ulluinnarni nalinginnaasumik suliarisartakkaminik suliarinnissinnaajunnaarluni iliuuseqarniarnermini siunertarinngisaminik timini annertuumik ulorianartorsiortippagu.

Siunertap saniatigut iliuuserisap suunera immikkoortitsiniarnermi pingaaruteqarpoq. Qitequtit, ungerutit assannut aalajangiissutit, ungerutit isikkanik aalajangiissutit aamma aaqqatit siunnersuut naapertorlugu taamaallaat pinngitsaaliissummik sukaterussineri atorneqassapput.

Pinngitsaaliilluni sukaterussineq inatsimmi § 19 naapertorlugu taamaallaat atorqeersinnaavoq pisariaqarpat napparsimasoq imminut imaluunniit allanik timikkut imaluunniit peqqissutsikkut ajoquseeriatarnissaanik pinngitsoortitsitsiniaalluni. Taamatuttaaq pinngitsaaliilluni sukaterussineq pissaaq napparsimasoq uninngaqqammunik malersuippat assigisaanilluunniit sakkortuumik ajoqusiippat imaluunniit annertuumik aserorterippat. Tamatumani piunnaasaataannilaq pineqartoq silanngajaartuunissaa imaluunniit tamatumunnga assingusumik pissuseqarnissaa.

Immikkut maleruaqqusaqqanngila pinngitsaaliisummik sukaterussinissamik aalajangiinissamat kina pinnaatitaaffeqarneris, tak. inatsimmi § 20. Inatsimmi § 21-mi allasimavoq napparsimasut qiterummik pinngitsaaliisummik sukaterussat *aalajangersimasumik pigaartoqartarnissaat pillugu* maleruaqqusaq.

Atorneqartartut pillugit piunnaasaatinut assingusunut, pinngitsaaliisummik sukaterussinermut atuuttunut, napparsimasup pineqartup *najumminissaanut* aamma pineqartup sumiiffissamat allamukaanqarsinnaanissaanut periarfissaqarpoq, tak. § 22 imm. 1, naggat siullermi. Pisuni ataasiakkaani pinngitsaaliisummik sukaterussineq imaluunniit taamaallaat timi atorlugu piunnaasermik atuinissaq pillugit apequt annikinnerpaamik iliuuserisassamat tunngavilersuutaasup qimerloorneqarnerani aalajangiiffigineqassaaq.

§ 22-mi imm. 1, naggatit aappaanni allasimavoq kiffaanngissusiagaasut inuit napparsimavimmit qimagunnissaat pinngitsoortinneqarsinnaasoq qanorluunniit timi atorlugu piunnaasermik atuinissamat piunnaasaatasut nalinginnaasut atuutinnikkaluarpata. Aalajangersakkami matut silarliit parnaarnissaat ilaatigut periarfissiissutigineqarpoq.

§ 22, imm. 2-mi periarfissaqarpoq pisariaqassappat pinngitsaaliisummik napparsimasoq eqqissiveqanngitsoq eqqissisaammik nakorsaatitortinneqarnissaa. Tamanna peqqissutsimut tunngatillugu pisariaqarsinnaavoq napparsimasup pitsaanerulernissaa ilaatigut sinilersinneratigut anguneqarsinnaasarmat. Aammattaaq iliuuserisat atorqeersinnaavoq, soorlu assersuutigalugu pinngitsaaliisummik qiteqummik allunaamik aaliangiinnermit tamanna annikinnerusumik akuliunnertut iliuuserisaammat.

§ 23-imi napparsimasup imminut *ajoqusinnginnissaanut sukaterussinermut* maleruaqqusaq ilanngunneqarpoq. Taamaaliornikkut pinngitsaaliisummik iliuuseqarneq imatut paasineqassaaq napparsimasup siunertarinngisaminik imminut annertuumik ulorianartorsiortinnissaminut illersorniarlugu iliuuserisatut.

Ullumikkut ima pisoqartarpoq napparsimavimmi sulisut nakkutilliiuaannartarlutik, tassunga ilanngullugu napparsimasup imminut toqunnissaanut imaluunniit napparsimaqatiminik ajoqusiinissaanik pinngitsoortitsiniaalluni eqqannguaniittarlutik. Taamatut periuseq, inuup kiffaangissuseqarneranut akuliunnertut taasariaqarpoq, *inummik nakkutillineq* inatsimmi § 24-mi periarfissalerneqarpoq. Inummik nakkutilliinissaq nakorsamit napparsimasumik misissuereernikkut aalajangerneqarsinnaavoq.

Ullumikkut aammattaaq pisoqartarpoq napparsimasup isumannaatsuutinissaa siunertaralugu nalilerneqartarluni *immikkoortortaqaarfimmi matut parnaarneqarnissaat*. Taamatut iliuuseqartarpoq inuup nammineersinnaanerani akuliunnertut taasariaqarpoq, tamanna inatsimmi § 26-imi immikkut periarfissalerneqarpoq.

Tarnimikkut napparsimasut imminut eqqiluisaarnissaminnut pisariaqartumik isumaginnissinnaangitsut, soorlu asattormik periarfissaliisoqarpoq taamatut *imminut eqqiluisaarnissap* pinngitsaaliissummik atuinnikkut ingerlanneqarsinnaasoq, tak. § 27.

2.7.2 *Siunnersuut matumani pineqartoq, tak. kapitali 6 §§ 20-29*

Siunnersuummi inatsisitigut pisinnaatitaaffiit atuuttut ingerlateqqinneqarput.

2.8 Allagarsianik, ininik uninngavinnik, pigisanik timilu satsillugu misissuisarneq kiisalu pigisanik arsaarinnissuteqartarpoq suujunnaarsitsisarnerlu.

2.8.1 *Inatsit atuuttoq*

Inatsimmi § 29-mi napparsimasup allagarsiaanik misissuinissamut, napparsimavimmi inaanik pigisaanillu misissuinissamut aammattaaq timaa satsillugu misissuinissamut piginnaatitsisoqarpoq. Pigisanik arsaarinnissuteqarneq aamma atortunik il.il. suujunnaarsitsisinnaaneq, inatsit naapertorlugu taamatuttaaq inatsimmi namminerimi malittarisassaliuunneqarpoq.

2.8.2 *Siunnersuut matumani pineqartoq, tak. kapitali 7 § 30*

Siunnersuummi inatsisitigut pisinnaatitaaffiit atuuttut ingerlateqqinneqarput.

2.9 Pinngitsaaliissutinik atorneqartunik allattuisarneq aamma pinngitsuugassaangitsumik nalilersueqqinneq

2.9.1 *Inatsit atuuttoq*

Inatsisissatut siunnersuummi § 30, imm. 1 naapertorlugu pinngitsaaliinikkut iliuuseqarnerit suogaluilluunniit tamarmik, inatsimmi aalajangersakkat atuuttut tunngavigalugit immikkoortortaqarfimmi pinngitsaaliissutit atorpeqartut pillugit nalunaarsuiffimmut, kiisalu iliuuserisaq aamma tamatumunnga pissutigisaaq suunersut ilanngullugit nalunaarsorneqassapput.

Nalunaarsuineq pisariaqarpoq napparsimasut ataasiakkaat inatsisitigut illersugaanerat eqqarsaatigalugu soorlu assersuutigalugu naammagittaalliutit suliarineqarnerannut atatillugu. Taamatuttaaq pinngitsaaliissummik atuisarnerit pillugu inuiaqatigiinni kisitsisitigut paasissutissanik pigisaqarnissamut nalunaarsuineq iluaqutaavoq. Pinngitsaaliissummik iliuutsit qitiusumik nalunaarsorneqarnerat napparsimasut inatsisitigut illersugaanerannut toqqammavissat pingaernerit ilagaat. Nalunaarsuineq sammisamut tunngatillugu nakkutilliinissamut aamma nakkutiginninnissamut tunngaviususaaq.

§ 31 malillugu Dronning Ingridip Napparsimavissuanik tarnimikkut napparsimasunut immikkoortortaqarfimmi nakorsaaneq pisussaavoq nakkutigissallugu, pinngitsaaliissummik iliuuseqarnerit inatsimmi periarfissalernerqartut pisariaqartitsisoqarnera sinnerlugu atorpeqannginnissaat. Tamatumunnga atatillugu nakorsaanerup piffissatut killiliussaasut tunngavigalugit nakkutigissavaa kiffaanngissusiiaanermut aamma illersuiniarluni aamma pinngitsaaliissummik sukaterussinerumut piumasaqaataasut suli eqquutsinneqarnissaat nakkutigissavaa. Napparsimasooq aamma napparsimasunut siunnersuutaasooq kiffaanngissusiiaanerup atuutiinnarnissaa pillugu aalajangernermik ilisimatinneqassapput.

Danskit tarnimikkut napparsimasut pillugit inatsisaanni ullup unnuallu ingerlanerani pingasoriarluni nalilersueqqittoqartarpoq. Kalaallit Nunaani tarnimikkut napparsimasut amerlanngitsut Dronning Ingridip Napparsimmavissuani tarnimikkut napparsimasunut immikkoortortaqarfimmi uninngasarmata, Danmarkimi pissutsinut naleqqiullugu napparsimasut ataasiakkaat qaninnerusumik attaveqarfigineqarput. Tamanna tunngavigalugu ulloq unnuarlu ataasiarluni takusaaqqittoqartarnissaa naammattutut nalilerneqarpoq. Taamatuttaaq Danmarkimi tarnimikkut napparsimasut pillugit inatsimmi piumasaqaateqarpoq nalileeqqinneq tarnip nappaataanut nakorsamit, tarnimikkut napparsimasunut immikkoortortaqarfimmi napparsimasup uninngaviani sulisuunngitsumik, ingerlanneqartassasooq, taamaaliornikkut qulakkeerniarlugu attuumassuteqanngitsumik naliliinissaaq. Kalaallit Nunaanni Dronning Ingridip Napparsimmavissuani tarnimikkut napparsimasunut immikkoortortaqarfimmi tarnip nappaataanut nakorsamik ataasiinnarmik atorfeqartoqarmat Kalaallit Nunaanni tamatumunnga assingusumik attuumassuteqanngitsumik naliliisarnissamik piumasaqaateqarnissaaq periarfissaanngilaq.

2.9.2 *Siunnersuut matumani pineqartoq, tak. kapitali 8 §§ 31-32*

Siunnersuummi inatsisitigut pisinnaatitaaffiit atuuttut ingerlateqqinneqarput.

2.10 Napparsimasunik siunnersuisartut

2.10.1 *Inatsit atuuttoq*

Inatsit malillugu pinngitsaaliisummik unitsinneqartunut, pinngitsaaliisummik uninngatinneqartunut imaluunniit pinngitsaaliisummik nakorsarneqartunut, angerlartinneqarnerup kingoratigut pinngitsaaliisummik malinnaaffigineqartunut, pinngitsaaliisummik sukaterunneqartunut, timi atorlugu pissaanermik atuinnermik pineqarsimasunut, sernissuiniarluni sukaterunneqarsimasunut, immikkut nakkutigineqartunut kipisuitsumik nalunaaquttap akunneri 24-t sinnerlugit atuuttuni, aammattaaq § 27, imm. 1, nr. 2 naapertorlugu immikkoortortaqarfimmi matut paarnaarneqarnerannut atatillugu taamatut pineqartunut tamanut napparsimasumik siunnersuisoqartitsisoqassaaq.

Napparsimasumik siunnersuisup napparsimasumik ilitsersuissaaq aamma siunnersuilluni napparsimavimmut unitsinneqarnermut, napparsimaveqarfiup napparsimaviini uninnganermut aamma nakorsartinnermut atatillugu, kiisalu napparsimasoq naammagittaalliuteqassappat tamatuminnga aallartitsinissamut aamma naammassinninnissamut atatillugu ikiuissalluni. Napparsimasumik siunnersuisup atuuffia aamma pisinnaatitaaffii inatsimmi §§ 32, 34 aamma 35-mi sukumiisumik nassuiaatigineqarput.

Toqqaanermut ingerlatseriaaseq inatsimmi § 33-mi takuneqarsinnaavoq.

2.10.2 *Siunnersuut matumani pineqartoq, tak. kapitali 9 §§ 33-38*

Siunnersuummi inatsisitigut pisinnaatitaaffiit atuuttut ingerlateqqinneqarput, taanna Inatsisartut Inatsisaat nr. 12, 3. juni 2015-imeersoq aqqutigalugu kingullermik allanngortinneqarpoq. Siunnersuummi erseqqissaatigineqarput napparsimasumik siunnersuisumik toqqaasoqassasoq pissaaneq atorlugu nakorsaammik eqqissaatitortitsisoqartillugu.

2.11 Ilisimatitsineq aamma naammagittaalliornissamut ilitsersuineq il.il.

2.11.1 *Inatsit atuuttoq*

Kiffaanngissusiiaanerup aallartinnginnerani aamma pinngitsaaliisummik iliuseqarnerup allap atorneqalinnginnerani maleruaqqusaaq pingaarneq tassaavoq napparsimasup ilisimatinneqarnissaa, pinngitsaaliissuttip atorneqarniartup suuneranik, qanoq ittuuneranik,

tunnngavigisaasumik aamma siunertaasumik. Napparsimasoq iliuserisap naammagittaalliuutigineqarsinnaanera pillugu tamatigut ilitersorneqartassaaq.

2.11.2 Siunnersuut matumani pineqartoq, tak. kapitali 10 §§ 39-41

Siunnersuummi inatsisitigut pisinnaatitaaffiit atuuttut ingerlateqqinneqarput.

2.12 Naammagittaalliornissamut periarfissaq aamma eqqartuussivitsigut misiliineq

2.12.1 Inatsit atuuttoq

Tarnimikkut Nappaatillit Maalaarutaannik Aalajangiisartunik naammagittaalliutinut suliassanngortinneqartunut aalajangiisartuupput, tamatumani pineqarput pinngitsaaliissummik napparsimavimmut unitsitsineq, pinngitsaaliissummik uninngatitsineq, utertinneqarneq, pinngitsaaliissummik nakorsarneqarneq, angerlartinneqarnerup kingoratigut pinngitsaaliissummik malinnaaffigineqarneq § 17 tunnngavigalugu, pinngitsaaliissummik sukaterussineq, timi atorlugu pissaanermik atuneq, sernissuiniarluni sukaterussineq, immikkut nakkutiginnineq, kipisuitsumik nalunaaquttap akunneri 24-t sinnerlugit atuuttut aammattaaq immikkoortortaqaarfimmi matunik paarnaarsinerit.

Aalajangiisartut tassaapput eqqartuussissuserisoq siulittaasuusoq. Eqqartuussissuserisoq pineqartoq napparsimaveqarfimmut attuumassuteqqartuussanngilaq, taamaalinikkut politikikkut attuumassuteqqannginneq qulakkeerneqassaaq. Taassuma saniatigut aalajangiisartunut ilaapput Nunatsinni Nakorsaaneqarfimmit sinniisuutitaasoq aammattaaq tarnimikkut eqqarsartaatsimikkullu nappaateqartut qanigisaasa peqatigiiffiannit sinniisuutitaasoq.

Ilaasortat Peqqissutsimut Ilisimatusarnermullu Naalackersuisumit toqqarneqassapput ilaasortanut sinniisussat taamatuttaaq taassuma toqqassavai. Toqqagaaneq ukiuni sisamani atuutissaaq aamma toqqaagaqqittoqarsinnaavoq. Suliat ataasiakkaat oqaluuserineqarneranni aamma aalajangiiffigineqarneranni aalajangiisartut ilitersuinerit attuumassuteqqanngillat.

Inatsimmi § 41, imm. 2 malillugu Nunatsinni Nakorsaaneqarfik allatseqarnikkut isumaginnittussatut toqqarneqarpoq.

Pinngitsaaliissummik iliuseqarnerit tamarmik Kalaallit Nunaanni Eqqartuussivimmut ingerlateqqinneqarsinnaapput.

2.12.2 Siunnersuut matumani pineqartoq, tak. kapitali 11 §§ 42-45

Siunnersuummi inatsisitigut pisinnaatitaaffiit atuuttut ingerlateqqinneqarput, taanna Inatsisartut Inatsisaat nr. 12, 3. juni 2015-imeersoq aqcutigalugu kingullermik allanngortinneqarpoq.

Siunnersuutip erseqqissarpaa pissaanermik atuilluni eqqissisaammik nakorsaattortitsineq aammattaaq Tarnimikkut Nappaatillit Maalaarutaannik Aalajangiisartunut saqqummiunneqarsinnaasoq.

Taamatuttaa q Tarnimikkut Nappaatillit Maalaarutaannik Aalajangiisartut aalajangiineri pillugit naammagittaalliutit eqqartuussivinnut ingerlateqqinnerat immikkut pilertortumik misiliinissamut periarfissaqartitsinermut ilaatinneqartut erseqqissaatigineqarpoq, pinerluttulerineri inatsimmi kapitali 28 naapertorlugu.

2.13 Qqaaseqatigiinnik aqqissuussinnerit

Soorlu taaneqartutut siunnersuummi tarnikkut nappaatilinnik kiffaanngissusiaasaneq allatigullu pinngitsaaliissummik iliuuseqartarneq pillugu Inatsisartut inatsisaanni aalajangersakkat arlallit ingerlateqqinneqarput. Taamaattorli siunersuummi oqaaseqatigiinnik aqqissuussisoqarpoq aamma naleqqussaasoqarluni, tamatumani siunertarineqarpoq inatsisip imarisaataa erseqqinnerulernissaa aamma paasiuminarnerulernissaa.

3. Pisortanut aningaasaqarnikkut aamma allaffissornikkut kingunerisassai

Siunnersuutip pisortanut aningaasaqarnikkut aamma allaffissornikkut kinguneqarnissaa naatsorsuutigineqanngilaq, tunngavimmigut siunnersuut tassaammat maannakkut tarnimikkut napparsimasunik nakorsaanissamut neqeroorutiniq ingerlatsitseqqinneq, tamatuma malitsigisaanik naatsorsuutigineqanngilaq missingersuutininut ilanngunneqareersimanngitsunik aningaasartuuteqarnissaaq.

4. Aningaasaqarnikkut aamma allaffissornikkut inuussutissarsiutiniq ingerlatsisunut kingunerisassai

Siunnersuutip inuussutissarsiutiniq ingerlatsisunut aningaasaqarnikkut aamma allaffissornikkut kinguneqarnissaa naatsorsuutigineqanngilaq.

5. Avatangiisinut, pinngortitamut aamma innuttaasut peqqissusiannut kingunerisassai

Siunnersuummi tarnimikkut napparsimasut ikiorneqarnissaat annertunerusumik periarfissiissutigineqarpoq, taakku naak nakorsartinnissamik pisariaqartitsigaluarlutik

namminneq ikiorneqarnissamut ujartuinissamut sapertut imaluunniit tamatuma pisariaqarneranik akuerinnissinnaanngitsut.

Siunnersuutip avatangiisinut aamma pinngortitamut malunnaateqartumik allatigut kinguneqarnissaa naatsorsuutigineqanngilaq.

6. Innuttaasunut kingunerisassai

Siunnersuut tarnimikkut napparsimasut kiffaanngissusiarneqarsinnaanerannut aamma allatut pinngitsaaliissummik iliuseqarfigineqarsinnaanerannut piginnaatitsivoq. Aallaavigineqarpoq pinngitsaaliissummik atuinissamik nakorsaaneq aalajangiisartuussasoq. Taamaattorli Dronning Ingridip Napparsimavissuani tarnimikkut napparsimasunut immikkoortorta qarfimmi nakorsaanerup saniatigut nakorsaq alla, nakorsaanerup peqannginnerani, tamanna pillugu aalajangiisinaavoq. Taamaattoqarsimappat tamatuma kingornatigut sapinngisamik piaarnerpaamik aalajangiineq nakorsaanermit akuersissutigineqassaaq.

Tamatumani siunertarineqartoq tassaavoq tarnimikkut napparsimasut pisariaqartumik nakorsarneqarnissaat, sulisutigut isumalluutit qanoq ittueneri apeqqutaatinnagit, tassa piffissami tassanerpiaq Dronning Ingridip Napparsimavissuani tarnimikkut napparsimasunut immikkoortorta qarfimiittut.

Napparsimasut inatsisitigut isumannaatsuunissaat napparsimasunik siunnersuisoqarnikkut, naammagittaalliutit suliarineqartarnerisigut aamma eqqartuussivikkut misiliinissamik periarfissatigut atuutereersutigut qulakkeerneqarpoq.

7. Sunniutaasussat allat malunnaateqarluartut

Siunnersuutip allatigut malunnaateqarluartumik sunniuteqarnissaa naatsorsuutigineqanngilaq.

8. Oqartussaasunik aamma kattuffinnik il.il. tusarniaaneq

Siunnersuut tusarniaassuteqartarnermut nittartakkamik saqqummiunneqarpoq piffissami uani xx-imiit xx-imut aammattaaq tusarniaaffigineqartuni makkunani tusarniaassutigineqarluni:

...

Siunnersuummi aalajangersakkanut ataasiakkaanut oqaaseqaatit

§ 1-imut

Imm. 1-imut

Aalajangersakkami aalajangersarneqarpoq napparsimavimmut pinngitsaaliissummik unitsitsineq, pinngitsaaliissummik uninngatitsineq aamma pinngitsaaliissummik allamik atuineq taamaallaat Dronning Ingridip Napparsimavissuani tarnimikkut napparsimasunut immikkoortorta qarfimmi ator neqarsinnaasoq.

Tamatumani pingartinneqarpoq pinngitsaaliissummik unitsitsineq aamma pinngitsaaliissummik uninngatitsineq taamaallaat Dronning Ingridip Napparsimavissuani tarnimikkut napparsimasunut immikkoortorta qarfimmi isumannaatsumik pisinnaasoq. Tassani neqeroorutigineqarsinnaapput initigut aamma nakorsartinnissamut killiussat pitsaanerpaat. Taamaalilluni sillimaffigineqareerpoq peqqinnissaqarfiup napparsimavii sinerissamiittut tarnimikkut peruluuteqarlutik napparsimasunik nakorsaanissaminnut immikkut ilinniagaqarsimasunik aamma isumalluutinik pisariaqartinneqartunik nalinginnaasumik sulisoqartanninnerat.

Imm. 2-mut

Aalajangersakkami ersersinneqarpoq napparsimasumik pinngitsaaliissut atorlugu unitsitsineq aallartinneqarsinnaasoq peqqinnissaqarfiup suliffiini allani. Aalajangersakkami sillimaffigineqarpoq napparsimasunut piffissap unitsinneqarfiusup nalaani Nuup avataaniinnerat.

Peqqinnissaqarfiup suliffiitut allatut paasineqassapput Dronning Ingridip Napparsimavissuata saniatigut nunap immikkoortuini napparsimaviit aamma najukkani napparsimaviit/peqqissutsimut qitiusoqarfiit.

Napparsimaviit inuinnarnit (privatinit) pigineqartut aammattaaq soorlu assersuutigalugit sakkutooqarfinni peqqissutsimik sullissinissamut periarfissat ilanngunneqanngillat, tassani apeqqutaatinneqanngilaq nakorsamik sulisoqarsimanissaat.

Siunnersuummi inuit napparsimaveqarfiup avataani angerlarsimaffinni uninngasut, naak tamakkua qanoq innerat siunnersuummi ilaatinneqartutut isigineqarsinnaagaluarpalluunniit. Taamaattumik aalajangersakkat inunnut angerlarsimaffinni utoqqarnik paaqqinniffiusuni imaluunniit inunnut timimikkut imaluunniit tarnimikkut annertuumik innarluutilinnut ineqarfiusunik ineqartinneqartunut atuutinngillat.

Pinngitsaaliisummik napparsimavinnut unitsitsinerni Dronning Ingridip Napparsimavissuani tarnimikkut napparsimasunut immikkoortortaqarfianut nuutsitsinnissaq nalunaaquttap akunnerisa 48-t ingerlanerini aallartinneqassaaq, tamanna nalinginnaasumik angallannermi pissutsinit akornuserneqanngippat. Tamatumani paasitinneqarpoq angallassineq nalinginnaasumik angallannermi aallarnissami siullermi ingerlanneqassasoq. Taamaalilluni angallassigasuarneq atorneqassanngilaq imaanngippat napparsimasup peqqissutsimigut inissisimanerata aammattaaq pineqartup ulorianassusiata tamanna pisariaqartikkaa.

Aalajangersagaq siunnersuummi § 8, imm. 1-imi naggammut siullermut immikkut attuumassuteqarpoq, tamanna naapertorlugu napparsimasut ulorianassuseqarnerisa ilisarnaataat (pappiaqqat aappalaartut) tunngavigalugu unitsinneqartut ingerlaannartumik peqqinnissaqarfimmi pisinneqassapput. Taamaalilluni imm. 2-mi aalajangersakkami periarfissiisoqarpoq napparsimasoq peqqinnissaqarfiup napparsimaviisa ilaanni ingerlaannartumik pisinneqassasoq, aammattaaq tamatuma kingornatigut Dronning Ingridip Napparsimavissuanut nuussinissaq aallartinneqassasoq aamma pilersaarusionerarluni.

§ 1, imm. 2-mi, naggatit aappaanni ersersinneqarpoq, utaqqiisaagallartumik unitsitsinerit aamma uninngatitsinerit taamatut ittut Dronning Ingridip Napparsimavissuani tarnimikkut napparsimasunut immikkoortortaqarfiani nakorsaannermit aalajangerneqartassasut nakorsaq unitsitsisoq isumasioqatigalugu. Tamanna ima paasineqassaaq nakorsaannerup najukkami nakorsaq isumasioqatigalugu aalajangissavaa, napparsimasup pineqartup nalinginnaasumik angallannermi aallarnissamut utaqqitinneqarnissaa illersorneqarsinnaanersoq, aammattaaq nakorsarneqarneq suna aallartinneqarsinnaanersoq. Peqqinnissaqarfiup ingerlatsivii amerlaneri tele aqqutigalugu attaveqaammik atuisinnaapput, taamaattumik Dronning Ingridip Napparsimavissuani tarnimikkut napparsimasunut immikkoortortaqarfiani nakorsaannerup napparsimasoq takusinnaavaa aamma napparsimasoq oqaloqatigalugu, tamannalu tunngavigalugu napparsimasup qanoq inneranik paasisaqarsinnaalluni.

Napparsimasup tarnimigut qanoq issusia tassanngaannartumik pisimasutut qaaniuttussatullu nalilerneqarpat, taava Dronning Ingridip Napparsimavissuani tarnimikkut napparsimasunut immikkoortortaqarfiani nakorsaannerup aalajangersinnaavaa nuussinerup ingerlanneqannginnissaa. Tamatumani ingammik pineqarpoq napparsimasup qanoq innerata pilertortumik iluarsiaartornera takuneqarsinnaalluni, kiisalu tamanna pissutigalugu nal. akunnerisa 48-t ingerlanerini angerlartinneqarnissaa ilimanarsinnaalluni. Taamaalillutik nuussinerit pisariaqanngitsut pinngitsoorneqassapput taamatuttaaq napparsimasumut pinngitsoortinneqassaaq malunnaatilimmik artorsaateqarneq, tassa avatangiisinit sungiusimasanit qimagunnermi malunniuttartoq.

Pinnngitsaaliissummik napparsimavimmut unitsitsinermik piviusumik ingerlatsineq suli politiiniippoq, tak. § 8, imm. 1.

Imm. 3-mut Aalajangersakkami aalajangersarneqarpoq, timikkut anniaatigisamik pinnngitsaaliissummik nakorsarneqarneq pisariaqarpat timikkut nappaatilinnut immikkoortortaqarfimmi ingerlanneqarsinnaavoq, § 14-imi piumasaqaataasut tamatumani isiginiarneqassapput. Napparsimasoq timimigut anniaatiminik tarnimikkut napparsimasunut immikkoortortaqarfimmi naammaginartumik nakorsarneqarsinnaappat, taava timimikkut anniaatinut immikkoortortaqarfimmut nuussineq ingerlanneqassanngilaq.

§ 2-mut

Imm. 1-imut

Aalajangersakkami pinnngitsaaliineq imatut nassuiaaserneqarpoq, ilisimatitsereraluarluni taamaattorli akuersisoqarsimannngitsoq iliuserineqartut ingerlanneqarneratut, napparsimasut inatsisitigut inissisimanagerat pillugu Inatsisartut peqqussutaanni kapitali 2 takuuk. Inatsisitigut tunngaviulluinnarpoq nakorsartinneq sunaluunniit nammineq piumassutsimik aallaaveqassasoq. Tunngavigineqartumi pineqarpoq napparsimasup nammineq aalajangiisinnaanermi pisinnaatitaaffia aamma inuup ataqqinassusia kiisalu inniminassusia. Nammineq aalajangiisinnaanermut pisinnaatitaaffik napparsimasunut tamanut pingaarnerpaajulluni maleruaqqusaavoq, tassa imaappoq napparsimasunut timimikkut anniaateqartunut taamatullu napparsimasunut tarnimikkut anniaateqartunut. Taamaalillutik paasissutissinneqareernikkut akuersineq pillugu maleruaqqusat, napparsimasut inatsisitigut inissisimanagerat pillugu Inatsisartut peqqussutaanniittut, aallaaviusutut tarnimikkut nappaatilinnut aammattaq atuupput.

Napparsimasut inatsisitigut inissisimanagerat pillugu Inatsisartut peqqussutaanni § 6-imi allasimavoq nakorsarneqarneq aallartinneqassanngitsoq imaluunniit nangingneqassanngitsoq napparsimasoq paasissutissinneqareernermigut isumaqataalluni akuersiteqqaartinnagu, tamanna inatsisini imaluunniit §§ 8-10-mi immikkut aalajangersaavigineqarsimanngippat. Paasissutissinneqareernikkut isumaqataalluni akuersineq peqqussummi imatut paasineqassaaq peqqinnissamik suliaqartup tungaaniit paasissutissinneqareerneq sukumiisooq tunngavigalugu akuersinertut.

Oqariaaseq "paasissutissinneqareernikkut akuersineq" nunani siuarsimasuni tamani peqqinnissaqarfinni atuutsinneqarpoq, ilaatigullu nunani tamalaani isumaqatigiissusiornermi atorineqartarluni.

Akuersissuteqarneq sukumiisumik paasissutissinneqarnermik tunngaveqanngitsoq naammangilaq, tamatumani nappaammik nakorsartinneq taamak annertutigisooq pineqarmat. Napparsimasooq paasissutissinneqarnissaminik kissaateqanngikkaluarpalluunniit, taava paasissutissinneqareernikkut akuersisoqarsimaneratut tamanna isigineqassaaq, naak paasissutissat amerlassusiat aamma annertussusiat napparsimasup nammineq kissaatigisaa naapertorlugu killeqarsinnaagaluartut.

Apeqqut matumunnga tunngasoq akuersissuteqartoqarsimanerata pigineqarneranik oqarsinnaaneq sioqqullugu paasissutissinneqareerluni atuuttumik akuersissuteqartoqarsimansooq, tamatumani ilaalluni isummanik qanoq erseqqitsigisumik saqqummiussisoqarsimansooq, tamanna napparsimasut inatsisitigut inissisimanerat pillugu Inatsisartut peqqussutaanni akuersissuteqartarnermut maleruaqqusat naapertorlugit nassuiarneqassaaq.

Erseqqissumik akuersissuteqarneq pigineqarpoq napparsimasup nakorsartinnissaq pineqartoq akueralugu paatsuugassaannigsumik oqaatigippagu. Tamanna oqaasiinnartigut aamma allakkatigut pisinnaavoq.

Allakkatigut akuersissuteqarneq erseqqissumik tunngavissiivoq. Pisulli amerlanersaanni nakorsartinnissamut allakkatigut akuersissuteqarnissaq pisariaqassanngilaq. Tamanna aammattaaq matumunnga atatillugu isigineqassaaq, peqqinnissamik suliaqartup allattuinnissamut maleruaqqusat naapertorlugit pisussaaffigaa allattukkanut ilanngutissallugit paasissutissat suut napparsimasumut tunniunneqarsimansut, kiisalu paasissutissat tunniunneqarsimasut tunngavigalugit napparsimasooq qanoq isummersimansooq.

Oqaasiinnartigut akuersissuteqarneq siullertut atuuttut inatsisip atuuffiani naammassaaq, tak. matuma siuliani peqqinnissamik suliaqartup allattuinnissamut maleruaqqusat naapertorlugit pisussaaffiani taaneqartut.

Oqaaseqanngikkaluarluni akuersissuteqarneq pigineqarpoq inuit ataasiakkaat ileqqulersorneratigut aamma iliuusiatigut imatut paasineqarsinnaappata, paasissutissat tunniunneqartut tunngavigalugit akuersissuteqartoq. Oqaaseqanngikkaluarluni akuersissuteqarnerup inatsimmi piumasaqaataasut taamaallaat naammassissavai,

qularnangippat nakorsartinnissamut siunnersuutaasoq il.il. imaluunniit taakku ilaat napparsimasup ileqqulersornermigut paasitissimagaa. Annertunngitsumilluunniit qularutigineqarpat, napparsimasoq nakorsartinnissap ingerlanissaanut akuersisimasoq, taava oqaasiinnartigut akuersissuteqarnej pissarsiarineqartariaqarpoq.

Napparsimasoq eqqortumik ilitsersorneqarnikkut paasissutissinneqarnikkullu killinneqarpat peqataanissamulluunniit akuersisinneqarpat, tamanna nammineq piumassuseq tunngavigalugu nakorsartinnertut aamma isigineqassaaq. Napparsimasup iliuseqarfigineqarnissamut sunianninnera nammineq piumassuseq tunngavigalugu iliuseqarnissamut, paasissutissinneqarnikkut akuersinertut naammaginnartutut isigineqarsinnaangilaq.

Napparsimasut inatsisitigut inissisimanerat pillugu inatsisartut peqqussutaanni kapitali 2-mi maleruaqqusat naapertorlugit, ukiukippallaarnikkut eqqarsartaatsikkulluunniit kinguarsimanikkut, nammineq soqutigisat pillugit aalajangeeqataasinnaanginneq pissutigalugu, paasissutissinneqarnikkut nakorsartinnissamut assigisaannullu nammineq akuersisinnaangitsoq, inatsimmik tunngaveqartumik sinniisussa qaraluarpalluunniit sapinngisaq aalajangiinnermi peqataatinneqassaaq. Inatsimmik tunngaveqarlutik sinniisussat tassaasinnaapput angajoqqaatut oqartussaassusermik tiggumminnittut, angajoqqaatut sinniisuutit imaluunniit ilaqtut qanigisat paasissutissinneqarnikkut akuersinnermi napparsimasup soqutigisaanik isumaginnittussaataasut.

Imm. 2-4-mut

Napparsimasut 15-it imaluunniit uteqqissinnaangitsumik paasissutissinneqareernikkut akuersissuteqarsinnaanermut pisinnaatitaanermut pisaqarunnaarsimasut, angajoqqaamit akisussaassuseqarnermik pigisartumit, angajoqqaatut akisussaassuseqartumit imaluunniit qaninnerpaamik qanigisanit akuersissuteqarnissamik pissarsiniartoqassanngilaq, imaappat tarnimikkut napparsimasut pillugit inatsit naapertorlugu ingerlaannartumik iliuseqarnissamik ingerlatsinissaq pisariaqarpat, inuup imminut navianartorsiortissinnaanera imaluunniit allanik timikkut imaluunniit peqqissutsikkut navianartorsiortitsisinnaanera pinngitsoortinniarlugu, imaluunniit napparsimasup annikigisassaangitsumik annertussusilimmik aserorterisinnaanera pinngitsoortinniarlugu.

Immikkut periarfissaq taanna tassanngaannartumik pisoqarnerani, aalajangersakkami kinguniusinnaasutut taaneqartut pitsaaliornissaat siunertarlugu pinasuartumik akuliuttariaqarnermi taamaallaat atorineqarsinnaavoq. Matumani naatsorsuutigineqassaaq iliuseqarnissaq sioqqullugu angajoqqaamit akisussaassuseqarnermik pigisartumit, angajoqqaatut akisussaassuseqartumit imaluunniit qaninnerpaamik qanigisanit

akuersissuteqarnissamik pissarsisoqarsinnaanginnera. Tamatuma kingornatigut taakku qanoq iliuseqarnek pillugu ilisimatinneqassapput.

Aalajangersagaq matuma siuliani pineqartoq napparsimasut inatsisitigut inissisimanerat pillugu Inatsisartut peqqussutaanni § 8 imm. 1-imi aalajangersakkamut tunngatinneqarpoq. Aalajangersagaq taanna naapertorlugu napparsimasoq 15-inik ukioqalereersimasoq paasissutissinneqarnikkut nakorsartinnissamut akuersisinnaavoq. Angajoqqaq akisussaassuseqarnermik pigisartoq taamatuttaaq ilisimatinneqassaaq aamma ukiukitsup isummerneranut akuliutinneqarluni.

Napparsimasut inatsisitigut inissisimanerat pillugu Inatsisartut peqqussutaanni § 8 imm. 2 naapertorlugu, peqqinnissamik sullissisup immikkut naliliinermini napparsimasoq 15-inik ukioqalereersimasoq isummernerup kingunissaanik paasinnissinnaasorinngippagu, angajoqqaq akisussaassuseqarnermik pigisartoq paasissutissinneqarnermigut akuersisinnaavoq. Tarnimikkut napparsimasut pillugit inatsisissatut siunnersuummi § 2 imm. 3-mi, qulakkeerneqarpoq aalajangersakkap § 2 imm. 2-miittup napparsimasunut pineqartunut taakkununga aamma atuuttuunissaa. Tassa imaappoq napparsimasunut taakkununga tunngatillugu § 2 imm. 2-mi piumasaqaatit eqquutsinneqarpata, iliuseqarnissap pineqartup aallartinnissaa sioqqullugu angajoqqaamit akisussaassuseqarnermik pigisartumit akuersissummik pissarsiaqartoqassanngitsoq.

Napparsimasut inatsisitigut inissisimanerat pillugu Inatsisartut peqqussutaanni § 4-mi, peqqinnissamik suliaqartup immikkut inatsit naapertorlugu ilinniagaqassuseq tunngavigalugu sulisinnaatitaasutut, aamma inuit taakku sinnerlugit sulisuusutut nassuiarneqarput. Tamatumani pineqarput nakorsat, aamma peqqissaasut imaluunniit inuit taakku akisussaaffigisaannik sulisinneqartut. Peqqinnissamik sullissisut aammattaaq tassaapput inuit immikkut maleruaqqusat naapertorlugit peqqinnissaqarfimmi namminnek suliasaminnik suliaqartut.

Inuit peqqinnissamik suliaqartut sorliit pinngitsaaliissummik iliuseqarnerup sorliup atorneqarnissaanut aalajangiinissaasut eqqaarsaatigalugu, siunnersuummi § 9, imm. 2, § 10, imm. 1 aamma 3, § 13, imm. 2, § 14, imm. 2, § 18, aamma § 21, imm. 1-3, § 24, imm. 2, § 25, imm. 3, § 27, § 28, aamma § 30 innersuunneqarput.

Kapitali 2-mut

*Aalajangersakkat nalinginnaasut**§ 3-mut*

Imm. 1-mut

Nakorsap pineqartup § 3, imm. 1 aamma 2 naapertorlugit pisussaaffigaa unitsitsinerup, uninnganerup aamma nakorsartinnerup siunertai aammattaaq qanoq innerup pitsanngoriarnissanut ilimagisaq pillugit pissusissamisoortumik ilitersoreerlugu napparsimasup akuersissuteqarnissaa anguniassavaa. Nakorsaq unitsitsisoq immikkoortorta qarfimmilu uninngavissami nakorsat taamatut pissussaaffeqarput.

Imm. 2-mut

Nakorsap unitsitsisup unitsitsinerup siunertaa pillugu napparsimasumik ilitersuinissaq pingaarnertut pisussaaffigaa, kiisalu suliffeqarfimmi nakorsaq napparsimavimmi uninnganeq aamma nakorsarneqarneq aallartinneqartussatut siunertaasoq pillugit pingaarnertullugit ilitersuissaaq. Napparsimasup peqqissinerusinnaaneranut tunngasoq ilitersuinermi sammineqartutut tunngavigineqassaaq. Pinngitsaaliissummik napparsimavimmut unitsitsinermut imaluunniit pinngitsaaliissummik nakorsaatitortitsinermut tunngatillugu ilitersuinissamut pisussaaffik, siunnersuummi § 39 imm. 1-imi aamma takuneqarsinnaavoq.

Imm. 3-5-imut

Aalajangersakkatut siunnersuut § 3 imm. 3-miittoq naapertorlugu Dronning Ingridip Napparsimavissuani tarnimikkut napparsimasunut immikkoorto qarfimmi nakorsaanerup, immikkoortorta qarfimmut unitsinneqartut imaluunniit peqqinnissaqarfiup immikkoortorta qarfiinut allanut unitsikkallarneqartut tamarmik nakorsarneqarnissaannut pilersaarusiunneqartarnissaat akisussaaffiga. Nakorsartinnissamut pilersaarummi nakorsarneqarnerup qanoq ittuunera aamma sunik ilaqarnera allanneqassapput. Napparsimasup namminerminik nakorsarneqarnermut peqataatinneqarnissaa sapinngisamik annertunerpaamik qulakkeerniarlugu aalajangersarneqarpoq, napparsimasoq peqataatinneqassasoq aamma pilersaarutip imarisaa pillugu tusaaniarneqassasoq pilersaarutip imarisaa pillugu ilitersorneqaannarnani. Napparsimasup pilersaarutip ingerlanneqarnissaanut akuersissuteqarnissaa anguniarneqartuassaaq.

Dronning Ingridip Napparsimavissuani tarnimikkut napparsimasunut immikkoorto qarfimmi nakorsaaneq akisussaaffimmik pisussaaffilerneqarneranut aallaaviuvoq, taassuma tarnikkut nappaatit pillugit immikkut pisariaqartumik ilisimasaqarnissaa naatsorsuutigineqarmat, tamannalu piumasaqaataavoq nakorsaanissanut pilersaarutininik illersorneqarsinnaasunik

suliaqarnissamut. Taamaalilluni nakorsaaneq pisussaaffeqarpoq isumagissallugu nakorsartinnissamut pilersaarummik suliaqartoqarnissaa, kisianni imaanngitsoq pisuni ataasiakkaani nammineerluni nakorsartinnissamut pilersaarutitik suliaqassalluni.

Pissusiviusut tunngavigalugit nakorsartinnissamut pilersaarusiornermi piumasaqaatit unitsinneqarnerup kinguninngua utaqqiisaagallartumik naleqqussakkamik pilersaarusiortoqarsinnaanerata paasineqassapput. Napparsimasup aallaqqaataani malittarinerata kingornatigut, nakorsartinnissamut pilersaarusiornissamut piumasaqaatit annertusissapput. Nakorsartinnissamut pilersaarut ingerlaavartumik naleqqussarneqartassaaq aamma tamatigut nakorsartinnerit suut ingerlanneqartut, anguniakkat, tassa piffissaq qaninnerusooq eqqarsaatigalugu piviusunngortissallugit eqqarsaatigineqartut nakorsartinnissamut piviusut atorlugit, tak. siunnersuummi § 3, imm. 4.

Nakorsartinnissamut pilersaarutip assinga napparsimasumut tunniunneqassaaq, imaanngippat pineqartup taanna piumanagu, tak. § 3, imm. 5.

§ 4-mut

Imm. 1-imut

Napparsimasup nammineq akuersinissaa anguniarlugu periarfissaasinnaasunik tamanik misileeqqaarnani pinngitsaaliisoqannginnissaa qulakkeerniarlugu, § 4 imm. 1-imi aalajangersagaq naapertorlugi napparsimasooq akuersisinniarneqassaaq, kiisalu tassangaannartumik pisoqartinnagu napparsimasooq tamatumunnga isummernissaminut piffissamik naammaginartumik eqqarsarfissaqartinneqassaaq. Tamatumani ilaatigut pineqarsinnaapput napparsimasup nammineq piumassutsiminik napparsimavimmut unitsinneqarnissaminut, nammineq piumassutsiminik katsorsaarnermut peqataanissaa imaluunniit nammineq piumassutsiminik ileqqulersornerit ilaannik pinngitsoortitsinissaanut kajumissaarniarlugu.

Unitsitsinermi tassani nakorsarneqarnissamut ersiutit takuneqarsinnaallutik tassani pissutsit qanoq ittuunerat apeqqutaatillugit, napparsimasooq nammineq piumassutsini naapertorlugi uninnissaanut piffissaq sivisuneq atorlugi kajumissaarneqarsinnaavoq. Napparsimasorli imminut allanulluunniit navianartorsiortitsinnaappat, unitsinneqarnissap kinguarsarpallaarnissaa nalinginnaasumik illersorneqarsinnaassanngilaq.

Imm. 2-mut

Napparsimasup kajumissaarneqarnera nammineq piumassutsiminik akuerissuteqarnissaa iluatsinngippat, kiisalu pinngitsaaliissummik iliuseqarnissamut apeqqut pisussanngorpat, pinngitsaaliissut anguniakkamut naapertuuttunngorlugu atorneqassaaq, tak. § 4, imm. 2. Ajornartorsiummik pisumik aaqqiiniarnermi periarfissat arlaqarpata iliuseqarneq annikinnerpamik akuliuffiusoq atorneqassaaq.

Imm. 1 tassaavoq "annikinnerpaaffissaqartitsinermik" tunngaviusup, tunngaviusut nalinginnaasut pinngitsaaliissummik atuinnermik sumilluunniit atuilersinnaani atuuttuusup, inatsisikkut aalajangersaaffigineqarnera. Tunngavissamut ilisarnaataavoq assigiimmik tunngaveqartumik sumik pisoqartillugu tamatigut iliuseqarnermi annikinnerpaamik iliuseqartarnissaanut, kiisalu iliuseqarnermi piffissaq atorneqartoq taamaallaat pisariaqavissumut killeqartinneqarnissaa anguniarlugu. Tunngaviusoq inatsisip ilaani erseqqinnerusumik saqqummiunneqarpoq soorlu assersuutigalugu pinngitsaaliissummik nakorsaatitortitsinermi § 13, imm. 4-mi, kisianni pinngitsaaliissummik atuinnermi suugaluartumi piumasaqaatini aamma qanoq iliornermi tamani suunera paasineqassalluni.

Taamaattorli nassuerutigineqartariaqarpoq tunngaviusup taassuma qanoq atorneqarnissaa ilaatigut pisuni ataasiakkaanik nalornissutaasinnaasarpoq. Periutsip suup annikinnerpaamik iliusiunera nalornissutaasarnissaa ilimanarluinnarpoq. Inatsisip aqqissuussaanaera naapertorlugu soorlu assersuutigalugu eqqissisaammik kapisineq, § 23, imm. 2-naapertorlugu, qiterut atorlugu aalasinnaajunnaarsitsineq annikinnerusumik iliuseqarnertut isigineqarpoq. Imaassinnaavoq napparsimasut ilaat allatut eqqarsartut, qiterut atorlugu aalasinnaajunnaarsitsineqarneq eqqissisaammik kapitinneq perusunnerullugu. Napparsimasoq taama kissaateqarpat, napparsimasup piumasaa avaqqullugu eqqissisaammik kapisinissamut, nakorsap pingaarutilinnik tunngavissaqartitsinissaa piumasaqaataassaaq. Tamanna nakorsartinnissamut paasissutissinneqareerluni akuersissuteqarnissap aallaavigineqarnerata pissusissamisoortumik malitsigaa.

Aalajangersakkami § 4, imm. 2-mi qitiutinneqartoq pinngitsaaliissummik atuinnerup annertussusia inatsimmi § 12-imi aamma § 32-mi piviusunngortinneqarpoq. Aalajangersakkanut taakkununnga tunngasunut oqaaseqaatit innersuunneqarput.

Imm. 3-mut

Pinngitsaaliissut aamma nakuuserneq atorlugit napparsimasunik pillaanermut tunngasut inatsisikkut maleruaqqusaliornissaat pisariaqanngitsutut isigineqarsimapput, taamatuttaaq nikanarsaalluni aamma kanngunarsaalluni nakorsaanissaq inerteqqutaapput.

Pinngitsaaliissummik iliuseqarneq sapinngisamik qajassuartumik aamma pisariaqanngitsumik kanngunarsaaneq imaluunniit ajoqusiineq atorneqassanngitsut, tamatumani pineqarpoq pillaaluni iliuseqarneq aamma nikanarsaalluni nakorsaanissaq, taakkua atorneqarnissaat inerteqqutaanerulerput, tak. § 4, imm. 3.

§ 5-*imut*

Imm. 1-2-mut

Inatsisartut inatsisaanni Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuseqarneq pillugu Inatsisartut Inatsisaanni nr. 24, 3. december 2012-imeersumi atuuttumi Dronning Ingridip Napparsimmavissuani tarnimikkut napparsimasunut immikkoortortaqarfimmi nakorsaneq arlalinnik pisussaataaffeqarpoq aamma pisussaaffeqarpoq.

§ 3, imm. 3 naapertorlugu soorlu assersuutigalugu nakorsaanerup akisussaaffigivaa, immikkoortortaqarfimmut unitsinneqartunut tamanut katsorsaanissamut pilersaarummik suliaqarnissaq, aamma napparsimasup pilersaarutip imarisaa pillugu ilitserneqarnissaa taamatuttaaq tamatuma ingerlanneqarnissaanut ingerlaavartumik napparsimasup akuersissuteqarnissaa anguniassallugu. Taamatuttaaq § 31, imm. naapertorlugu nakorsaanerup kiffaangissusiiianerup, pinngitsaaliissummik katsorsaanerup, angerlartinneqarnerup kingornatigut pinngitsuugassaannngitsumik malinnaaffiginninnerup, pinngitsaaliissummik qiterut atorlugu aalasinnaajunnaarsitsinerup, nukiit atorlugit pissaanermik atuinerup, pitsaaliiniarluni qiterut atorlugu aalasinnaajunnaarsitsinerup, inunnik assersuineq, immikkoortortaqarfimmi matunik paarnaarsisarneq, pinngitsaaliineq atorlugu inunnik eqqiluisaartitsineq, allagarsianik, napparsimasut inaannik aamma pigisanik misissuineq, inuit timaatigut satsaalluni misissuinerup, aammattaaq nakorsaatilik il.il. arsaarinnissuteqarnerup pisariaqanngitsumik annertunerusumik atorneqannginnissaat nakkutigissavai.

Oqaaseq "nakorsaneq" pineqartuni taakkunani imatut paasineqarsinnaavoq, tassa nakorsaanerup akisussaaffigivaa aalajangersakkat pineqartut tarnimikkut napparsimasunut immikkoortortaqarfimmi malinneqarnissaannut eqqortitsinissaq. Soorlu assersuutigalugu § 3, imm. 3 imatut paasineqarsinnaavoq nakorsaneq pisussaaffeqartoq isumagissallugu

napparsimasunut tamanut katsorsaanissamut pilersaarummik suliaqartoqarnissaa, kisianni imanngitsoq pinngitsoornani nammineerluni pisuni tamani katsorsaanissamut pilersaarummik suliaqassalluni.

Inatsimmi atuuttumi aalajangersakkani allani oqaaseq "nakorsaanerup" atornerarpoq aalajangiinermut atatillugu, tassa pinngitsaaliissummik atuinermi piumasaqaatit eqqortinneqarnerannut. Pineqarput §§ 1, imm. 2 aamma 8, imm. 2, pinngitsaaliissummik unitsitsinissamut aalajangiineq pillugu, § 9, immi. 1 pinngitsaaliissummik uninngatitsineq aalajangiineq pillugu, § 10, imm. 1, unitsitseqqiineq pillugu, § 12, imm. 5, pinngitsaaliissummik katsorsaanerup aallartinneqarnissaa pillugu aamma katsorsaanerup ingerlanneqarneranut pissaanermik atuneq, § 13, imm. 2, timikkut anniaatinik pinngitsaaliissummik katsorsaanerup aallartinneqarnissaa pillugu, § 17, imm. 1 aamma 3, angerlartinneqareernerup kingornatigut pinngitsoorneqarsinnaanngitsumik malinnaanissaq pillugu aamma politiinit ikiorteqarluni aallerneq pillugu, § 20, imm. 2, qiterut atorlugu aalasinnaajunnaarsitsinermut atatillugu assannut imaluunniit niunut ungerutit aammattaq aqqatit atorneqassanersut pillugit, § 20, imm. 3, pinngitsaaliissummik aalasinnaajunnaarsitsinerup peqqinnissaqarfiup napparsimaviisa ilaanni ingerlatsiinnarneqarnissaa pillugu, § 27, eqqiluisaernerup ingerlanneqarnissaanut pinngitsaaliissummik atuneq, aamma § 29, allagarsianik, napparsimasut inaannik aamma pigisanik misissuinissamut, inuit timaatigut satsaalluni misissuinissamut, aammattaq pigisanik arsaarinnissuteqarnermut aamma suujunnaarsitsinermut aalajangersaanermut tunngatillugu.

Nakorsaaneq taamatuttaaq § 31, imm. 2 naapertorlugu nakkutigissavaa kiffaangissusiaanermut piumasaqaatit inatsimmi killiussat allassimasut tunngavigalugu suli eqqortinneqarnerat, Tamatumunnga atatillugu apeqqusinneqarsinnaavoq imaannersoq oqaatsip "nakorsaaneq" pinngitsoortissinnaanera, pisinnaaneq nakorsanut allanut tunniunneqarsinnaanersoq, tassami "nakorsaaneq" pisuni taakkunani, pinngitsaaliissummik atuinermut tunngasut immikkut inatsisitigut qulakkeerinninnermut paasineqassanersut.

Naalakkersuisut paasinninnerat naapertorlugu aalajangersakkani taakkunani piumasaqaat ilanngunneqartariaqarpoq, tassa aalajangiineq nakorsaanermit namminermi imaluunniit nakorsamit, nakorsaanerup peqannginnerani nakorsaanertut inissisimasumit (taartaaneq), taamaalilluni aalajangiinissamut pisinnaatitaaneq nakorsanit sulisunit appasinnerusumik inissisimasunik ingerlanneqarsinnaanani. Tamatumunnga pissutaavoq oqaaseq "nakorsaaneq" taakkununnga atatillugu aalajangiinissamut attuumassuteqarmat, ilumut inatsimmi piumasaqaatit pinngitsaaliissummik atuinissamut eqqortinneqarsimanerannut, kiisalu

pisinnaatitaanermik nakorsaanermut inuttut tunniussineq taamaalilluni immikkut inatsisitigut qulakkeerinninnertut paasineqassalluni.

Paasinninneq taanna danskit Justitsministeriaqarfiup paasinninneranut naleqquppoq. Aalajangersakkap siunnersuutigineqartup tarnimikkut napparsimasut pillugit inatsimmi matumani § 5-imi kinguneraa aalajangiinerit aalajangersakkami taaneqartut, soorlu assersuutigalugit pinngitsaaliissummik unitsitsineq aamma pinngitsaaliissummik uninngatitsineq taakku nakorsaanermit namminermit aalajangerneqassapput, imaluunniit nakorsaanerup peqanngikkallarnerani nakorsamit nakorsaanerup peqannginnerani Dronning Ingridip Napparsimavissuani tarnimikkut napparsimasunut immikkoortortaqarfiani katsorsaanermut akisussaassuseqartumit (katsorsaanermut akisussaalluni nakorsaaneq) aalajangerneqassapput. Nakorsaanerup pisinnaatitaanera taamatut pisoqarnerani tunngaviummik nakorsanut sulisunut appasinnerusumi inissisimasunut tunniunneqarsinnaanngilaq. Taamaattorli aalajangersakkap aammattaaq kinguneraa nakorsaanerup pisinnaatitaaffianik allamut tunniussinerup kingunerissanngikkaa aalajangiinerup nakorsaanerup peqannginnerani nakorsanit allanit aalajangerneqarsinnaasoq.

Nakorsaanerup peqannginnerani nakorsaq aalajangiippat taava nakorsaaneq *piaarnerpaamik* kiisalu nalunaquttap akunneri 24-t qaangiutinnginnerani nakorsap pinngitsaaliissummik atuineq pillugu aalajangiineranut isummissaaq, tassa imaappoq piffissami siullerpaami. Nakorsaanerup isummernera pinngitsaaliissummik iliuseqarnerit pillugit allattaavissuarmut allanneqassaaq.

Aalajangersakkami qulakkeerneqarpoq tarnimikkut napparsimasut tarnikkut napparsimanermi pisariaqartumik katsorsarneqarnissaat aammattaaq nakorsaanerup peqannginnerata nalaani, taassumalu pinngitsaaliissummik iliuseqarnermut tamatumunnga attuumassuteqartumik akuersissuteqarnera pissarsiarineqarsinnaanani.

Siunnersuummi §§ 10, imm. 3-imi aamma 32-imi isummernissamut kingusinnerpaamik piffissarititaasut allatorneqarsimasut, tassa pinngitsaaliissummik uninngatitsinermit aalajangiinermit tunngatillugu aammattaaq pinngitsaaliissummik atuineq pillugu aalajangiineraniit piffissaq nakorsap pinngitsaaliissummik atuinessamut aalajangiineranit ingerlasoq, taamaalilluni sunniuteqassanngilaq nakorsaanerup tamatuma kingornatigut nakorsap aalajangiineranik akuersissuteqarneranut.

Nakorsaaneq soorlu assersuutigalugu nakorsap napparsimasup pinngitsaaliissummik unitsitsineqarnissaanut imaluunniit pinngitsaaliissummik uninngatinneqarnissaanut

aalajangiineranik atorunnaarsitsippat, kiffaangissusiiiaaneq ingerlaannartumik atorunnaarsinneqassaaq tassami tamatumunnga piumasaqaatit eqquutsinneqarunnaarmata. Pisoq tunngavimmigut pisunit allaanerunngilaq naammagittaalliorfiusumit kiffaangissusiiiaaneq inatsisinik unioqqutitsinertut nalunaarutigineqarpat, tassa pinngitsaaliissummik napparsimavimmut unitsitsinermut imaluunniit pinngitsaaliissummik uninngatitsinermut piumasaqaatit naammassineqarsimasutut isigineqannginneri pissutigalugit. Taamatuttaaq atuupput pinngitsaaliissut atorlugu akulerunnerit allat.

Malugineqassaaq tarnimikkut napparsimasut pillugit inatsimmi napparsimasut pisinnaatitaaffii qulakkeerniarlugit aalajangersakkat nalinginnaasut soorunalimi aammattaaq atuummata, tassa nakorsaanerup peqannginnerani nakorsap pinngitsaaliissummik atuinissamik aalajangiineranut tunngatillugu. Ilaatigut tamanna imatut paasineqassaaq pinngitsaaliissut sunaluunniit atorneqartillugu napparsimasooq suli ilitserneqassammata iliuuserineqartumut naammagittaalliuteqarnissamut periarfissaqarnera pillugu, aammattaaq pinngitsaaliissummik katsorsaanerumut aalajangiineq aallaavigalugu kinguartitsinissamut sunniuteqanngimmat, tak, Inatsisartut Inatsisaanni §§ 39-40. Tamatuma taamatuttaaq kinguneraa napparsimasup siunnersortianut ilisimatitsissutigineqassammata pinngitsaaliissut atorneqartoq, aammattaaq suliarnik illersorneqarsinnaasumik suliaqarsinnaaneranut pisariaqartut paasissutissaasinnaasut allat tamarmik tunniuteqassapput, tak. siunnersuummi kapitali 9.

Napparsimasup akulerunneq naammagittaalliutigippagu inatsimmi kapitali 11-imi naammagittaalliuteqarnissamut periarfissaqarnerumut aamma eqqartuussivik aqquutigalugu ingerlatsisinnaaneq aallartissapput.

Tamakku saniatigut immikkoortoq 2.3.2-mut nalinginnaasumik oqaaseqaatit innersuunneqarput.

Kapitali 3 *Kiffaangissusiiiaaneq*

§ 6-imit

Aalajangersakkamut siunnersuutigineqartumut ilaapput pinngitsaaliissummik napparsimavimmut unitsitsinermi aamma pinngitsaaliissummik uninngatitsinermut ataatsimoortumik atugassat, § 7 imm. 3, aamma § 10 imm. 1, takukkit.

Tungaviusumik piumasaqaat tassaavoq napparsimasup silanngajaartuunissaa imaluunniit silanngajaarnermut sanilliunneqarsinnaalluartumik pissuseqarpat. Silanngajaarnermut oqariaatsimut tunngatillugu aamma oqaaseqatigiinnut "imatut pissuseqarpat, tamanna tamatumunnga sanilliunneqarsinnaalluarluni" tunngatillugu immikkoortoq 2.4.1-imi nalinginnaasumik oqaaseqaatit innersuunneqarput.

Pinngitsaaliissummik napparsimavimmut unitsitsinermit imaluunniit pinngitsaaliissummik uninngatinneqarallarnissamut piumasaqaataapput silanngajaarnerup imaluunniit imatut pissuseqarpat, tamanna tamatumunnga sanilliunneqarsinnaalluarluni saniatigut nakorsarneqartariaqarnerup killinga imaluunniit navianartorsiortitsisinnaanerup killinga. Navianartorsiortitsisinnaanerup ersiutaa tassaasinnaavoq inuk imminut navianartorsiortittoq, nalinginnaasumik imminut toqunnissaminut imaluunniit imminut ajoquserujussuarnissaminut, imaluunniit allanik navianartorsiortitsinissaminut. Ulorianartorsiortitsisinnaanerup annertullunilu ilimanaateqarluinnarnissaa piumasaqaataavoq.

Katsorsartariaqarnerup ersiutaa tunngavigalugu pinngitsaaliissummik napparsimavimmut unitsitsineq aamma pinngitsaaliissummik uninngatitsigallarneq taamaallaat pisinnaavoq. peqqissinissaq imaluunniit malunnaateqarluartumik aamma pingaaruteqartumik inuup pitsanngoriarnissaa taamaattoqanngippat malunnaateqarluartumik annikillissappat. Silanngajaarluni nappaatigisap immini ajorunnaavinnissaa piumasaqaatigineqarsinnaanngilaq. Katsorsaanerulli annertuumik iluaqutaanissaa imaluunniit nappaatip ajornerulersinnaanerata pitsaaliornissaa tunngavissaqarluassaaq. Nakorsarneqarnissamut piumasaqaatit eqquutsinneqarnissaannut, malunnaatilimmik iluaallatsitsineq naammassaaq. Napparsimasup napparsimavimmi katsorsartereernermini nappaataata, angerlartinneqarnermik kinguneqartumik, pitsanngoriaateqarsinnaanissaa ilimagineqarsinnaassaaq.

Taamatuttaaq katsorsartinnissaq siunertaralugu napparsimasumik kiffaanngissusiiiaannginneq akisussaassuseqanngitsuliornertut isigisariaqarnera piumasaqaataavoq. Taamatut piumasaqaateqarnikkut aalajangersagaq taanna naapertorlugu kiffaanngissusiiiaaneq katsorsartinnissamik siunertaqartoq erseqqissarneqarpoq. Napparsimasoq imminut allanulluunniit navianartorsiortitsippat piumasaqaatip taaneqartup eqqortinneqarnera naammaginartutut isigisariaqarpoq, tassa katsorsartinnikkut ulorianassutsip iluaquserneqarnissaa naatsorsuutigineqarsinnaappat, naak tarnikkut nappaatip taamaaqataaluunniit ajorunnaarsinneqarnissaa ilimanaateqanngikkaluaq.

Aalajangersagaq siunnersuutigineqartoq pinngitsaaliissummik napparsimavimmut unitsitsinermit aamma pinngitsaaliissummik uninngatitsineq pillugit aammattaaq inunnut

nammineersinnaajunnaarsinneqarsimasunut aamma ukiukitsunut atuuppoq. Taakku saniatigut § 2, imm. 2-mut oqaaseqaatit immikkut ittut innersuunneqarput.

Pinngitsaaliissummik napparsimavimmut unitsitsineq
§ 7-imut

Imm. 1-imut

Siunnersuummi §§ 7-9-mi aalajangersakkat pinngitsaaliissummik napparsimavimmut unitsitsinermi iliuusissanik maleruaqqusaliipput. Dronning Ingridip Napparsimavissuani tarnimikkut immikkoortorta qarfirmi uninnganeq eqqaassanngikkaanni, pinngitsaaliissummik unitsitsinissami napparsimasup sumiiffia apeqqutaanngilaq. Taamaalilluni napparsimasup sumiiffianiit angerlarsimaffiuppat, najukkami napparsimaviuppat peqqissaaviuppalluunniit pinngitsaaliissummik unitsitsisoqarsinnaavoq.

Napparsimasoq Dronning Ingridip Napparsimavissuani tarnimikkut napparsimasut immikkoortorta qarfianni uninngappat pinngitsaaliissummik unitsitsineq isummerfigineqassanngilaq kisianni pinngitsaaliissummik uninngatitsilernissaq.

Qanigisat tassa imaappoq nalinginnaasumik tassaanusut aapparisaq, inooqatigisaq, angajoqqaat, qitornat inersimasut aamma inuit inoqutigiinnut ilaasut allat, pisussaaffeqarput napparsimaveqarfimmut attaveqassallutik inuk silanngajaarsorisaq nammineq piumassutsini naapertorlugu nakorsamik pisariartumik ikiorneqarnissani pillugu saaffiginninngippat, tak. § 7, imm. 1 naggat siulleq. Qanigisaasut piumasaqaammik tamatuminnga eqqortitsinngippata imaluunniit napparsimasoq qanigisaqanngippat politiit peqqinnissaqarfimmut saaffiginninngippat pisussaaffigaat, tak. § 7, imm.1 naggatip aappaa. Peqqinnissaqarfimmut tunngatillugu qitiusumik napparsimavik qaninneq, najukkami peqqissaavik imaluunniit nunaqarfimmi peqqissaasoqarfik matumani pineqarput. Pineqartumi kingullermi peqqissaasoqarfiup, napparsimasup misissorneqarnissaa siunertaralugu, nakorsamik qaninnerpaamiittumik attaveqarnissaq pisussaaffigaa.

Imm. 2-3-mut

Nakorsap aggersarneqartup napparsimasoq misissoreerlugu napparsimavimmut unitsinneqartariaqartoq paasiguniuk, siunnersuummi § 3 naapertorlugu napparsimasup napparsimavimmut unitsinneqarnissaanut akuersitinniassavaa. Napparsimasoq unikkumannngippat nalinginnaasumik napparsimasup akerliunera ataqqillugu unitsinneqassanngilaq. Pinngitsaaliissummilli unitsinneqarnissamut piumasaqaatit, tak. inatsisissatut siunnersuummi § 5 naapertorlugu eqquuppata, pinngitsaaliissummik

unitsitsisoqassaaq. Taamaattoqarpat nakorsaq ilaatigut suna nappaatigineqartutut ilimaginerlugu, napparsimasup tarnimigut pissusaa paasissutissallu navianartuusinnaanerup imaluunniit katsorsartariaqarnerup ersiutai eqquutsinneqarneranut tapersiisut, ilanngullugit uppernarsaasiussaaq, tak. § 7 imm. 2.

§ 8-mut

Imm. 1-imut

Pinngitsaaliissummik unitsitsinerup piviusumik ingerlanneqarnissaa siunnersuut naapertorlugu politiinut tunniunneqarpoq, tak. § 8, imm. 1. Politiit piumasaqartuusutut pinngitsaaliissummik unitsitsinissamut pappiaqqat atsiussavaat. Tamatumunnga atillugu politiit nakkutigissavaat periusissap eqqortup malinneqarnera, kiisalu nakorsamit uppernarsaasiinermi paasissutissat pisariaqartut pinngitsaaliissummik unitsitsinissamut tunngaviusussat ilaanersut.

Imm. 2-mut

Pinngitsaaliissummik unitsitsineq taamaallaat ingerlanneqarsinnaavoq nakorsap uppernarsaasiineranik tunngaveqarluni, tamatumani tunngavineqassaaq nakorsap aggersarneqarsimasup misissuisimanera pinngitsaaliissummik unitsitsinissamik siunertaqartut.

Eqqortumik iliuseqarnissamut piumasaqaatit naammassineqarsimassanngillat nakorsaq nammineq siusinnerusukkut napparsimasumik allamik pissuteqarluni misissuisimanini tunngavigalugu uppernarsaammik suliaqarsimappat. Tamatumani piumasaqaataavoq napparsimavimmut unitsitsinissaq siunertaralugu piviusumik misissuisoqarnissaa, tak. § 8, imm. 2, naggat siulleq.

Nakorsanit assigiinngitsunit marlunnit naliliivigineqarnissaaq qulakkeerniarlugu, nakorsaq uppernarsaammik suliaqartoq (nakorsaq unitsitsisoq), Dronning Ingridip Napparsimavissuani tarnimikkut napparsimasunut immikkoortortaqarfimmi sulisuussaannngilaq, tassunga pinngitsaaliissummik unitsitsisarneq atammat, § 8, imm. 2 naggatip aapaa.

Nakorsaq uppernarsaammik suliaqartoq pinngitsaaliissummik unitsinneqartussamut inummut attuumassuteqarpallaartutut akuliussinnaanngitsutut inissisimassanngilaq. Taamaammat nakorsap soorlu assersuutigalugu nammineq aapparisaminik imaluunniit qitornaminik pinngitsaaliissummik napparsimavimmut unitsissinnaanngilaq. Inummut attuumassuteqarpallaartutut akuliussinnaannginnermut tunngatillugu, pisortat ingerlatsineranni suliaqartat suliarineqartarnerat pillugu inatsimmi § 3 innersuunneqarpoq.

Imm. 3-mut

Nakorsap misissuinerani nutaajunngitsumik tunngaveqartumik pinngitsaaliissummik unitsitsisoqaqunagu, siunnersuummi § 8 imm. 3-mi aalajangersaasoqarnissaa siunnersuutigineqarpoq. Aalajangersagaq naapertorlugu navianarsinnaanermut ersiutaasoq tunngavigalugu pinngitsaaliissummik unitsitsinermi pilertortumik ingerlanneqartariaqartuminal. akunneri 24-t qaangiutsinnagit misissuereernikkut unitsitsisoqassaaq. Katsorsartittariaqarneq tunngavigalugu pinngitsaaliissummik unitsitsinermi ullut arfineq marluk killiliunneqarnissaat siunnersuutaavoq. Killiliussat taakku eqquutsinneqanngippata, nakorsaq misissuueqissaaq pinngitsaaliissummillu unitsitaanissamut pappiaqqanik nutaanik immersuisoqassaaq.

§ 9-mut**Imm. 1-imut**

Pinngitsaaliissummik unitsitsineq navianarsinnaanermut ersiutaasumik tunngaveqarpat, napparsimasoq pinasuartumik peqqinnissaqarfimmut unitsinneqassaaq, tak. § 9, imm.1, naggat siulleq. Dronning Ingridip Napparsimavissuani tarnimikkut napparsimasunut immikkoortortaqarfimmi taamaallaat pinngitsaaliissummik unitsitsisoqarsinnaavoq, tak. § 1, imm. 1. Napparsimasulli sinerissami peqqinnissaqarfiup immikkoortuisa arlaanniittut, Dronning Ingridip Napparsimavissuani tarnimikkut napparsimasunut immikkoortortaqarfimmut nuunneqarnissap tungaanut, sumiiffimmi peqqinnissaqarfiup immikkoortuanut pinasuartumik unitsinneqassapput, tak. § 1, imm. 2.

Nakorsarneqartariaqarnerup ersiuteqarnera tunngavigalugu pinngitsaaliissummik unitsitsinissami napparsimasoq piaarnerpaamik, ullullu arfineq marluk qaangiutsinnagit, unitsinneqassaaq, tak. § 9, imm. 1, naggatip aappaat.

Imm. 2-mut

Siunnersuummi § 9 imm. 2-mi aalajangersagaq naapertorlugu, napparsimasup pinngitsaaliissummik unitsinneqarnissaa, Dronning Ingridip Napparsimavissuani tarnimikkut napparsimasunut immikkoortortaqarfimmi nakorsaanerup allaffissornikkut aalajangiivigissavaa. Nakorsap unitsitsisup naliliineranut nakorsaaneq pituttugaanngilaq.

Imm. 3-mut

Siunnersuummi § 9 imm. 3-mi Naalakkersuisut ingerlatsinikkut pinngitsaaliissummik unitsitsinermi periusissat pillugit maleruagassiorsinnaanerat tunngavissinneqarpoq. Taamaalilluni sukumiinerusunik maleruagqusaliortoqassaaq qanigisat, Dronning Ingridip

Napparsimavissuani tarnimikkut napparsimasunut immikkoortorta qarfimmi nakorsaanerup, nakorsap misissuisup, politiit aammattaaq napparsimaviup qanoq iliorlutik suleqatigiinnissaannut tunngatillugu, tassa inuup tarnimigut napparsimasup unitsinneqarneranut atatillugu pinngitsaaliissummik unitsitsinermi piumasaqaatit eqqortinneqarnissaannut atatillugu.

Tamakku saniatigut pinngitsaaliissummik napparsimavimmut unitsitsinermit atatillugu imm. 2.4.1. aamma 2.4.2-mi nassuiaatit nalinginnaasut innersuussutigineqarput.

Pinngitsaaliissummik uninngatitsineq

§ 10-mut

Imm. 1-imut

Aalajangersakkap siunnersuutigineqartup pinngitsaaliissummik uninngatitsisinnaaneq malittarisassaliuuppaa. Tassa immappoq napparsimasumik Dronning Ingridip Napparsimavissuani tarnimikkut napparsimasunut immikkoortorta qarfimmi uninngasumik tarnimigut nappaateqarnermut katsorsarneqartumik angerlartitsinissamik itigartitsisinnaaneq.

Pinngitsaaliissummik uninngatitsineq taamaallaat pisinnaavoq § 6-imi piumasaqaatit eqqortinneqarpata. Tassa napparsimasoq silanngajaartuussaaq imaluunniit imatut pissuseqassaaq, tamanna tamatumunnga sanilliunneqarsinnaalluarluni. Tamatuma saniatigut navianartuusinnaaneranut ersiuteqarneranut imaluunniit katsorsartittariaqartuuneranut ersiuteqarneranut piumasaqaatit eqquutsinneqassapput. Pinngitsaaliissummik uninngatitsisoqarnissaanut piumasaqaatit eqquutsinneqarpata, nakorsaq napparsimasumik angerlartitsinissamut naaggaarnissaminut pisussaataavoq, tak. § 10, imm.1.

Pinngitsaaliissummik Dronning Ingridip Napparsimavissuani tarnimikkut napparsimasunut immikkoortorta qarfimmi unitsitaasimasuunnaangitsut aammali nammineq piumassuseq naapertorlugu unitsitaasimasut, piumasaqaatit eqquutsinneqarpata pinngitsaaliissummik uninngatinneqarsinnaapput. Taamaattorli napparsimasoq tarnimigut katsorsartinniarluni peqqinnissaqarfiup immikkoortorta qarfianut allamut nammineq piumassutsini naapertorlugu unitsitaasimasoq Dronning Ingridip Napparsimavissuani tarnimikkut napparsimasunut immikkoortorta qarfimmi pinngitsaaliissummik unitsinneqartariaqalerpat angerlartinnissaa itigartitsissutigineqarsinnaavoq, tamatumunnga pissutaavoq pinngitsaaliissummik unitsitsineq taamaallaat tamaani pisinnaammat.

Imm. 2-mut

Peqqinnissaqarfiup suliffeqarfiini ullumikkut matoqqasunik immikkoortortaqqanngilaq. Kisianni qaqutigoortumik pisoqartarpoq tarnimigut napparsimasoq avatangiisiminut ima navianartigisinnaalluni, Kalaallit Nunaata avataani tarnimikkut napparsimasunut napparsimavimmut nuunneqartariaqartarluni. Taama nuussineq napparsimasoq akuersinngippat pinngitsaaliissummik uninngatitsinermi maleruaqqusat naapertorlugit suliarineqartarpoq, tak. § 10, imm. 2.

Imm. 3-mut

Maleruaqqusaq § 10, imm. 3-mi naggammi siullermiittoq napparsimasup siullermeerluni angerlarumalluni qinnuteqaateqarneranut atuutiinnarnani, kisianni aammattaaq pisimasuni siusinnerusukkut napparsimasup angerlartinneqarnissaminut qinnuteqaateqarnerminut itigartinneqarsimappat tamannalu pillugu nutaamik qinnuteqaateqarpat atuuppoq.

Pinngitsaaliissummik uninngatinneqartoq napparsimasunut siunnersuisoqartinneqassappat tassa napparsimasoq siusinnerusukkut, soorlu assersuutigalugu pinngitsaaliissummik unitsinneqarsimaneq sioqqullugu pissuteqartumik imaluunniit siusinnerusukkut pinngitsaaliissummik uninngatinneqarsimaneq pissutigalugu taamaattumik peqarsimanngippat.

§ 10, imm. 3, naggatit aappaat immikkut maleruaqqusamik ilaqarpoq tassani taamaallaat, napparsimasoq pinngitsaaliissummik unitsinneqarsimasoq, pinngitsaaliissummik unitsinnerup kingornatigut ulloq unnuarluni siulleq angerlartinneqarnissaminut qinnuteqaateqartoq pineqarpoq. Taamatut pisoqartillugu pisariaqassaaq Dronning Ingridip Napparsimavissuani tarnimikkut napparsimasunut immikkoortortaqarfimmi nakorsaaneq piffissamik nakkutiginninnissamik tunineqartariaqarpoq nalunaaquttap akunnerinik 24-nit sivisunerusumik, tassani isummerfigissammagu pinngitsaaliissummik unitsinneqarsimasoq pinngitsaaliissummik uninngatinneqalissanersoq. Siunnersuutigineqarpoq pinngitsaaliissummik uninngatitsinerup aallartinneranit nalunaaquttap akunneri 48-nik taassuma sivisussuseqarnissaa.

Angerlartinneqarnissamut qinnuteqaat napparsimasup siunnersortianit saqummiunneqarsimappat taava taanna tamattutaaq aalajangiineq pillugu ilisimatinneqassaaq.

Tamakku saniatigut imm. 2.5-imi kiffaangissusiiineq pillugu oqaaseqaatit nalinginnaasut innersuussutigineqarput.

*Uninngaffimmut utertinneqarneq**§ 11-mut*

Imm. 1-2

Napparsimasunit nalunaaruteqarnatik anisimasunit aamma takkutinnigitoortunik utertitsisarnissamut aalajangersakkamik ilanngussisoqarnissaa siunnersuutigineqarpoq. Taamaattorli utertitsineq takkutinnigitoortunerup paasineqarnerata kingornatigut sapaatit akunnerata ataatsip qaangiunnissaata tungaanut pisinnaavoq. Takkutinngitsoortunerup paasineqarnerata kingorna sapaatit akunnerat ataaseq qaangiutereersimappat, pappiaqqat nutaat atorlugit aatsaat unitsitsisoqarsinnaavoq. Pineqartoq aneeqqusaanermi kingorna takkutinnigitoortunerup taamatutaaq utertitsinissamut piumasaqaataavoq unnuisinnaanerit pingasut aneernissamut akuersissutigineqarsimanerat.

Pinngitsaaliissummik napparsimavimmut unitsitaasimasut imaluunniit pinngitsaaliissummik uninngatinneqartut piffissap sivikitsuinnaap ingerlanerani utertinneqarsinnaanerannut periarfissaq, napparsimasup qanoq issusiata allanngorsinnaaneranut attuumassuteqarpoq, tassa pineqartoq napparsimaveqarfiup avataaniinnermini piffissami sivisunerusumi nammineersinnaasimappat. Taamaattoqartillugu kiffaanngissusiiaanissamut piumasaqaatit eqquutsinneqarsinnaanissaat nalinginnaasumik ilimagineqarsinnaanngilaq. Tamatuma saniatigut napparsimasunit sivisuumik napparsimaviup avataaniissimasunit piaaralutillu toqqorsimannigitsunit, pinngitsaaliissummik napparsimavimmut utertinneqannginnissamik ilimasunnginneq naatsorsuutigineqalersimassaaq.

Aalajangersakkap atuutsinneqarnerani napparsimasup immikkoortortamit qimagunnermi nalaani kiffaanngissusiagaasimanera pingaarnertut taasariaqarpoq. Tassa imaappoq pineqartoq piffissami tassani pinngitsaaliissummik napparsimavimmut unitsitaasimassaaq imaluunniit pinngitsaaliissummik uninngatinneqarluni. Napparsimasut immikkoortortamit qimagunnerup nalaani namminneq piumassutsiminnik unitsitaasimasut, aalajangersakkami pineqanngillat. Pineqartut piffissami tamatumani angerlarumallutik qinnuteqaateqarsimallutik pinngitsaaliissummik uninngatinneqartussanngorsimagaluarpataluunniit, aalajangersagaq taakkununga atuuppoq. Taamaattumik inuit taakku pinngitsaaliissummik unitsitsinermi periuseq atorlugit aatsaat pinngitsaaliissummik utertinneqarsinnaapput. Napparsimasup takkutinnigitoortunerup ilungersorluni angerlartinneqarnissamik qinnuteqaateqarsimanerit piumasaqaateqarnerit nallersuuttariaqarpoq. Dronning Ingridip Napparsimavissuani tarnimikkut napparsimasunut immikkoortortaqarfimmi nakorsaanerup

napparsimasumik unitsitsinermi pinngitsaaliissummik uninngatinnissamut (ingerlateqqinneqarnissaa) piumasaqaatit eqquutsinneqarnerat nalilertariaqarpaa, tak. siunnersuummi § 10.

Nakorsaanerup napparsimasoq pinngitsaaliissummik uninngatinneqarnissaa nalilerpagu taava napparsimasup aalajangiineq Tarnimikkut Nappaatillit Maalaarutaannik Aalajangiisartunut suliassanngortissinnaavaa. Taanna napparsimasup pinngitsaaliissummik utertinneqarnissaanut aalajangiinermuttaaq atuuppoq tak. siunnersuummi § 43. Pisut apeqquataatillugit Tarnimikkut Nappaatillit Maalaarutaannik Aalajangiisartut aalajangigaat, Kalaallit Nunaanni pinerluttulerinermi inatsimmi kapitali 28, tak. § 45, imm. 1, naapertorlugu eqqartuussivikkut suliassanngortinneqarsinnaapput.

§ 11, imm. 2-mi piginnaatitsissummik ilanngussisoqarnissaa siunnersuutigineqarpoq tamanna naapertorlugu utertitsinermut atatillugu periutsinut ingerlatsinermi maleruaqqusat aalajangersarneqassammata.

Aalajangersakkami siunertaavoq sammisamut tamatumunnga tunngatillugu maleruaqqusanik ilassutaasunik aalajangersaasoqarnissaa, tassa piviusumik tamatuma pisariaqartinneqarnera takuneqarsinnaappat.

Kiffaangissusiiagaanerup taamaatinneqarnera

§ 12-imut

Siunnersuummi § 12 naapertorlugu kiffaangissusiianeq erniinnartumik atorunnaarsinneqassaaq, kiffaangissusiiannisamut piumasaqaatit § 6 naapertorlugu eqqortinneqarnerat atorunnaarpat. Taamatuttaaq pisoqassaaq napparsimasup aalajangiineq pisussanngortissimappagu § 10, imm. 2, naapertorlugu angerlartinneqarnissaminut qinnuteqaammik saqqummiussinermigut, imaluunniit qinnuteqaat taamaattoq saqqummiunneqarsimannikkaluarpat, tak. § 32, imm. 1, tamakku kingunerisaanik nammineq aallarnikkaminik ingerlaavartumik apeqqut nalilersussavaa.

Erseqqissaatigineqarpoq nakorsaaneq tassaasoq pisinnaatinneqartoq kiffaangissusiiagaanermik atorunnaarsitsinissamut aalajangiinissamut. Taamaattorli tarnimikkut napparsimasut immikkoortortaqarfiani nakorsaq kinaluunniit nakorsaanerup peqannginnerani tamatuminnga aalajangiinissaminut pisinnaatitaavoq, tak. § 5. Tamatumani qulakkeerneqarpoq napparsimasup pisariaqanngitsumik kiffaangissusiiagaasimanissaa. Taamatut pisoqartillugu nakorsaaneq isummerpat napparsimasoq

angerlartinneqartussaasimanngitsoq, taava pinngitsaaliissummik unitsitsinissamut periuseq aallaqqaataaniit allartinneqartariaqarpoq, imaappat nakorsaaneq isumaqarluni § 6-imi kiffaannngissusiiaanissamut piumasaqaatit eqqortinneqartut, kiisalu pinngitsaaliissummik unitsitsinissaq pisariaqarluni.

Kiffaannngissusiiaaganermik atorunnaarsitsinerup kingunerisariaqanngilaa angerlartitsineq, tassami napparsimasup toqqarsinnaammagu nammineq piumassutsini tunngavigalugu napparsimavimmi uninngatinneqaannarnissani.

Kapitali 4-mut

Pinngitsaaliissummik nakorsarneqarneq

§ 13-imut

Imm. 1-imut

Tarnimikkut napparsimasunik katsorsaanermit tamatigut napparsimasup akuersisinniarnissaa nakorsap passussisuusup pisussaaffigaa, tak. siunnersuummi § 3 tassungalu oqaaseqaatit. Tamanna iluatsinngippat nalinginnaasuusaaq katsorsarneqarnissamut pilersaarutaasup aallartinneqannginnissaa, katsorsarneqartusaaq pineqartoq unitsinneqarsimanngippat pinngitsaaliissummillu uninngatitsinermit piumasaqaataasunik naammassinnipat. Taamaattoqarpat siunnersuummi § 13, imm. 1 naapertorlugu periarfissaqarpoq pinngitsaaliissummik tarnikkut katsorsaasoqarnissaanut.

Imm. 2-3-mut

Siunnersuummi § 13-imi imm. 2-mi allassimavoq pinngitsaaliissummik nakorsarneqarnissaq pillugu aalajangiineq Dronning Ingridip Napparsimavissuani tarnimikkut napparsimasunut immikkoortortaqarfiani nakorsaanermit aalajangiiffigineqassasoq.

Siunnersuummi § 13-imi imm. 3-mi allassimavoq pinngitsaaliissummik nakorsarneqarneq Dronning Ingridip Napparsimavissuani taamaallaat pisinnaasoq. Pinngitsaaliissummik katsorsaanermit eqqarsaataapput tarnimikkut napparsimasunit pinngitsaaliissummik nakorsaatitortitsineq, qupinnguallatsitsineq aamma pinngitsaaliissummik nerisitaaneq. Pinngitsaaliissummik nakorsaatitortitaanerup Dronning Ingridip Napparsimavissuani taamaallaat pisinnaaneranut piumasaqaateqarnermut tunngaviuvoq tarnimikkut napparsimasunik nakorsaatitortitsineq, tassunga ilanngullugu tamatuminnga pinngitsaaliilluni periarfissaqarneq, siunissaq ungasinnerusoq isigalugu napparsimasup pitsannguuteqarnissaanut iluaallatsitsinissaanullu pingaaruteqartumik kinguneqarsinnaanera.

Katsorsartinnerup pilersaarusioneqarnera ingerlanneqarneralu tarnimikkut napparsimasunut immikkut immikkoortortaarfimmi taamaalillutik ingerlanneqassapput.

Pinngitsaaliissummik unitsitsineq najukkami napparsimavimmi imaluunniit peqqissaavimmi ingerlanneqarnerani napparsimasoq eqqissisaammik imaluunniit sianiutigissaatitortinneqarnissamut pisariaqartitsisoqarpat, tamanna pissaq § 23, imm. 2-mi piumasagaataasut naapertorlugit.

Imm. 4-mut

Siunnersuummi § 13 imm. 4-mi allassimavoq pinngitsaaliissummik nakorsaatitortitsinermi nakorsaatit misilittarneqareersut atorneqassasut nalinginnaasumik annertussusilerlugit aamma allanik saniatigut pinartunik annikinnerpaamik sunniateqartitsisinnaasut. Maleruaqqusap qulakkiissavaa napparsimasup sapinngisamik annikinnerpaamik nakorsaammit atorneqartumit ajoquserneqarnissaa.

Siunnersuummi erseqqissaatigineqarpoq saniatigut sunniutit allat amerlassusiat pingaartinneqanngitsoq, kisianni pinartunik saniatigut allanik sunniutaasa amerlassusii pineqarlutik. Pinartunik saniatigut allanik sunniutai pillugit ilanngussinermi napparsimasup katsorsartinnermi nalaani pisariaqanngitsunik pinartunut ajoqutaasinnaasunut illersorneqarnissaa ujarorneqarpoq. § 13-imut ilanngussap taamaalilluni nakorsaatit napparsimasunut sapinngisamik pinannginnerpaamik ajoqusiisinnaasut atorneqarnissaat qulakkiissavaa.

Nakorsaatini misilittarneqarsimasunut tunngatillugu nakorsaatissat ilisimaneqarluareersut pineqarput, uani ilanngunneqareersut Sundhedsstyrelsens Specialitetsregister-imi, tak. Lægeforeningens Medicinfortegnelse og Lægemiddelkataloget. Nalinginnaasumik annertussusiliinermi pineqarpoq nakorsaatitoqqutitsinermi malittarisassat lægemiddelfortegnelsen-imi (nakorsaatit allattorsimaffianni) allassimasut kiisalu pitsaasumik nakorsatut sulinermut assingusuusoq malinneqassapput. Immikkut annertunerusumik annertussusilinnik nakorsaatitortitsineq taamaalilluni pissusissamisuunngilaq. Napparsimasunik pinngitsaaliissummik nakorsaatitortitsinermi nakorsaatit sivisuumik sunniateqartartut aallarniutigalugit nakorsaatit atorneqartariaqanngillat nappaatip suussusia tamakkiisumik paasineqanngippat, aamma napparsimasut katsorsartinnertik qanoq qisuariarfigissaneraat ilisimaneqanngippat. Kisianni nakorsaatit sivisuumik sunniateqartartut nappaataasa suussusiannik paasisaqarluarsimanikkut katsorsaannermut akuerineqarsinnaapput napparsimasut kingumut napparsimaqqilersimanerat pissutigalugu pinngitsaaliissummik unitsinneqarsimappata.

Pinngitsaaliissummik nakorsaatitortitsinermi nakorsaq tamatigut najuutissaaq. Napparsimasoq toqquullugu nakorsaatitortitsisoqassanngilaq nerisassaanut imigassaanullu akulerussinikkut imaluunniit allanut nakorsaatinut, napparsimasup iisartakkatut sungiussaanut ilanngullugit, pisassanngilaq.

Imm. 5-imut

Pinngitsaaliissummik nakorsaatitortitsinerup saniatigut pinngitsaaliissummik nakorsartinnerit allat ingerlanneqarnissaannut pisariaqartitsineq qaqutikkut pisarpoq, kisianni naleqquttuulluni soorlu assersuutigalugu qupinnguallatsitsinikkut aamma pinngitsaaliissummik nerisitsinikkut. Pinngitsaaliissummik nakorsartinnissaq Dronning Ingridip Napparsimavissuani tarnimikkut napparsimasunut immikkoortortaqarfiani ingerlanneqarsinnaavoq imaluunniit napparsimavissuarmi immikkoortoqarfimmi allami immikkut ilisimasaqarfiusumi tulluurtumilu, tassa nakorsartinnermik pitsaanerpaamik ingerlatsiviusinnaasumi.

Siunnersuut § 13, imm. 5 tunngavigalugu qupinnguallatsitsinermi allamik pinngitsaaliissummik katsorsartinnermut atatillugu immikkut piumasaqaatit arlaqartut ilanngunneqarput. Siunertaanngilaq taamatut paasinarsisissallugu qupinnguallatsitsineq taamatut allami pinngitsaaliissummik katsorsartinnermit sakkortunerusuusooq. Illuatungaatigullu qupinnguallatsitsineq pisuni aalajangersimasuni qajassuarnepaamik pinngitsaaliissummik katsorsartinnerusinnaavoq. Qupinnguallatsitsineq tassanngaannartumik pisoqartillugu inuunermillu navianartorsiortoqartillugu taamaallaat atorneqarsinnaavoq. Aalajangersakkami oqaasiliernerit taamaallutik siunertaraat inatsisitigut atuuttuusunik erseqqissaateqarnissamik siunertaqarpoq. Inatsisitigut isumannaatsuunissamat tunngasutigut mianereqquneqarput inatsimmi piumasaqaataasut allassimasuunissaat.

Qupinnguallatsitsinerup atorneqarsinnaaneranut pisumut assersuutigineqarsinnaavoq qanoq issutsimi tassanngaannartumik paatsiveerunnertut taaneqarsinnaappat. Taamatut paatsiveerunneq pilersinnaavoq ilaatigut tarnikkut nappaatip allatut pissuseqalerneratigut pilersinnaavoq. Taamatut tassanngaannartumik paatsiveerunneq takorruinernik, siniinnermik aamma eqqissiviilluni aalasalernermik malunnaateqartitsisinnaasarpoq. Piffissap sivikitsup ingerlanerani kissarneqarujussuortoqalersinnaavoq, imermik amigaateqalerluni aamma sanngiillinnermik, napparsimasoq pilertortorujussuarmik toqusinnaalluni nakorsarneqarnera aallartinneqanngippat. Tassanngaannartumik paatsiveerunneq inuunermik ulorianartorsiortitsilernermit aallarpat pinngitsaaliissummik qupinnguallatsitsinissaq paasinarsisinneqarsinnaavoq.

Annertuumik isummakkut nanertisimanerit ataasiakkaat inuunermik ulorianartorsiorititsilersinnaasarput. Napparsimasoq nukittoorujussuusinnaavoq imaluunniit immينوornissamut ulorianartorsiorluni imaluunniit ilaguutiinnaleqqalluni, inuunermut pingaaruteqartut nalorninartorsiorinneqarlutik, soorlu assersuutigalugu nerisaqannginneq aamma imertannginneq pissutigalugit. Taamatut pisoqartillugu qupinnguallatsitsineq pinngitsaaliissummik ingerlanneqarnissaa eqqarsaatigineqarsinnaavoq.

Napparsimasut inatsisitigut inissisimanerat pillugu Inatsisartut peqqussutaat tunngavigalugu napparsimasoq neriumajunnaarsinnaavoq, aalersorneqarnissi itigartitsissutigalugu, inuunermut sivitsorneqarsinnaaneranut katsorsartinnissaq itigartitsissutigalugu il.il. piumasaaqatit aalajangersimasut tunngavigalugit, tak. Inatsisartut Peqqussutaat §§ 14 – 17. Aalajangersakkat taakku napparsimasunut siunnersuummi § 6-imi ilaatinneqanngitsunut atorneqaannassapput.

Napparsimasup kissaatigippagu soorlu assersuutigalugu neriumajunnaarniarluni, tamannalu ilutigalugu niaqulaartuuppat imaluunniit qanoq issusia tamatumunnga naligiissinneqarluppat, aalajangersakkami § 13-imi pinngitsaaliissummik katsorsarneqarsinnaasoq soorlu assersuutigalugu pinngitsaaliissummik nerisinneqarneratigut. Tamatumunnga patsisaavoq pineqartup niaqulaarnera tunngavigalugu eqqarsaatigilluakkaminik iliuseqartariaqannginnera, niaqulaarninili tunngaviginerullugu iliuseqartooq.

Imm. 6-imut

Siunnersuummi § 13 imm. 6 naapertorlugu napparsimasoq pinngitsaaliissummik katsorsarneqartinnagu naleqquttumik eqqarsarfissinneqassaaq. Eqqarsarfissinneqarnerup sivilissusia nakorsamit erseqqissumik nalilerneqassaaq pinngitsaaliissummik katsorsartinnissap qanoq tassangaannartigisumik pisariaqartigineranik naliliinermik tunngaveqartooq.

Imm. 7-imut

Siunnersuummi § 13-imi imm. 7-imi aalajangersagaq manna malillugu pinngitsaaliissummik nakorsarneqarnissaq pillugu Naalakkersuisut maleruqqusaliornissaannut pisinnaatinneqarput. Taamaasilluni pinngitsaaliissummik nakorsaatitortitsinissamut, pinngitsaaliilluni nerisitsinissamut qupinnguallatsitsinissamullu sukumiinerusunik maleruagassiortoqarsinnaavoq.

§ 14-imut

Imm. 1-2-mut

Siunnersuummi § 13-imi tarnimikkut napparsimasut tarnikkut nappaataannik pinngitsaaliissummik katsorsaanissaq maleruagassiuunneqarpoq, § 14-imi pisut aalajangersimasut tunngavigalugit tarnimikkut napparsimasut timimikkut nappaatigisinnaasaannik pinngitsaaliissummik nakorsaasinnaaneq periarfissinneqarpoq.

Taama timikkut nappaatinik pinngitsaaliissummik nakorsaaneq taamaallaat pisinnaavoq, siullertut pinngitsaaliissummik uninngatitsinissamut piumasaqaatit eqquutsinneqarsimappata. Taamaattumik napparsimasoq silanngajaassaaq imaluunniit imatut pissuseqarneq tamanna silanngajaarnermut sanilliunneqarsinnaalluarluni, tamatuttaaq eqquutsinneqassapput navianartuusinnaanerup ersiutai imaluunniit katsorsartariaqarnerup ersiutai, taakkua arlaat.

Aappaattut timikkut nappaat ima peruluutaatigissaaq napparsimasup inuuneranut navianaateqarluni imaluunniit peqqissusianut annertuumik ajoqusiisinaalluni.

Kiisalu timikkut nakorsartittunut immikkoortortaqarfimmi nakorsaanerup aamma Dronning Ingridip Napparsimavissuani tarnimikkut napparsimasunut immikkoortortaqarfimmi nakorsaanerup, akunnerminni timikkut nappaatip pinngitsaaliissummik nakorsarneqarnissaanut piumasaqaataasut eqquutsinneqarneri isumaqatigiissutigissavaat, tak. siunnersuummi § 14 imm. 2.

Pisariaqarpat nakorsartinnissaq siunertaralugu napparsimasoq timimikkut nakorsartinnermut immikkoortortaqarfimmut nuunneqarsinnaavoq.

Napparsimasut timimikkut napparsimasut immikkoortortaqarfiani uninngasut Dronning Ingridip Napparsimavissuani tarnimikkut napparsimasunut immikkoortortaqarfimmiit tassunga nuutsinneqarsimanatik § 14 imm. 2-mi, naggatit aappaanni aalajangersagaq naapertorlugu tunngaviusumik aalajangersakkamut ilaatinneqanngillat, naak pinngitsaaliissummik uninngatinneqarnissamut aalajangersakkat eqquutsikkaluarlugit. Taamaalilluni aalajangersagaq taanna naapertorlugu, pinngitsaaliissummik katsorsaasinnaanermi §§ 6-8 naapertorlugit tamanna sioqqullugu pinngitsaaliissummik unitsitaasimanissaq piumasaqaataavoq.

Dronning Ingridip Napparsimavissuani tarnimikkut napparsimasunut immikkoortortaqarfimmi nammineq piumassusertik tunngavigalugu uninngasut pineqartillugit § 6-imi piumasaqaatit eqquutsinneqarpara, taakkuninnga pinngitsaaliissummik unitsitseqqaarnani pinngitsaaliissummik katsorsaasoqarsinnaavoq aamma Dronning Ingridip Napparsimavissuani tarnimikkut napparsimasunut immikkoortortaqarfiani nakorsaanerup

aalajangerpagu, pinngitsaaliissummik unitsitsinissamut piumasaqaatit eqquutsinneqartut, tak. § 9, imm. 2. Tarnimigut napparsimasoq sinerissami napparsimavimmi imaluunniit peqqissaaviit arlaanni nammineq piumassutsini tunngavigalugu uninngappat, pinngitsaaliissummik katsorsaanissami Dronning Ingridip Napparsimavissuni tarnimikkut napparsimasunut immikkoortortaarfimmi pinngitsaaliissummik unitsitseqqaarnissaq piumasaqaataavoq, tak. § 14, imm. 1, naggatit aappaat.

Napparsimasut inatsisitigut inissisimanerat pillugu Inatsisartut peqqussutaat naapertorlugu piumasaqaatit aalajangersimasut tunngavigalugit, napparsimasoq neriumajunnaarsinnaavoq, aalersorneqarnissaminut itigartitsisinnaavoq, inuuneq sivitsorsarniarlugu katsorsarneqarnissaminut itigartitsisinnaavoq il.il. tak. Inatsisartut Peqqussutaanni §§ 14-17. Aalajangersakkat taakku suli atuutiinnassapput napparsimasunut siunnersuummi § 6-imut ilaatinneqanngitsunut.

Siunnersuummi § 14, imm. 3-mi Naalakkersuisut piginnaatinneqarput aalajangersagaq tamanna naapertorlugu pinngitsaaliissummik katsorsaanissamut sukumiinerusunik maleruaqqusaliornissaminut. Taamaaliornikkut ingerlatsivimmit Dronning Ingridip Napparsimavissuani tarnimikkut napparsimasunut immikkoortortaarfik aamma timikkut nappaateqarnermut immikkoortortaarfimmi nakorsaq pineqartoq suleqatigalugit maleruaqqusat sukumiinerusut aalajangersarneqarsinnaapput, tamatumunnga ilanngullugit pinngitsaaliissummik katsorsaanerup ingerlanneqarnissanut sukumiinerusut.

Tamatuma saniatigut immikkoortoq 2.5-imi oqaaseqaatit nalinginnaasut pinngitsaaliissummik katsorsaanermut tunngasut innersuussutigineqarput.

Kapitali 5-imut

Napparsimavimmit angerlartitsinneqareernermi malittarineqarneq

§§ 15-16-imut

Napparsimavimmit angerlartitsinneqareernermi isumaqatigiissusiunneqartuni aamma ataqatigiissaanissamut pilersaarutini angorusutat tassaapput napparsimasut peruluutaasumik tarnimikkut napparsimasut, tassa malunnaateqarluartumik peqqikkunnaarnermik sunniuteqarfigineqartussat, nakorsarneqarnermikkut imaluunniit inunnik isumaginninnikkut tapersorneqanngikkunik. Napparsimasut pineqartut soorlu assersuutigalugit tassaasinnaapput tarnikkut nappaammik skitzofreniimik nappaateqarnerup saniatigut atonerluisuusut imaluunniit inuuniarnermikkut annertuumik ajornartorsiuteqartut.

Pitsaasumik ingerlatsinissamut ileqqup malittaani napparsimavimmit angerlartinneqareernermi isumaqatigiissummi imaluunniit ataqatigiissaanermut pilersaarummi ilaatinneqartariaqarput napparsimasup maannakkorpiaq aamma siunissami katsorsaaniissamut aamma inunnik isumaginninnikkut neqeroorutaasussatut pisariaqartitai. Taamatuttaaq tassani ilanngunneqartariaqarput katsorsaaniissamut neqeroorutissat tulluurtut aamma qaammatisiutit ulluat aamma nalunaaqutaq oqartussaasumik pineqartumik il.il. siullerpaamik ataatsimeeqateqarnissamut tunngatillugu. Ilanngunneqartariaqarportaaq kiap malittarinnittussatut akisussaasuunera aamma kina isumaqatigiissut eqquutsinneqanngippat iliuseqassanersoq. Naggataatigut isumaqatigiissutip qaqugu atorunnaassanersoq kiisalu qaqugu naliliivigineqarnissaa ilanngunneqartariaqarput.

Siunnersuummi § 15, imm. 2 aamma § 16, imm. 2-mi Naalakkersuisut piginnaatinneqarput napparsimavimmit angerlartitsinneqareernermi isumaqatigiissutigineqartut aamma ataqatigiissaanissamut pilersaarutit Nunatta Nakorsaaneqarfiani nalunaarsorneqarnissaannut maleruaqqusanik aalajangersaanissamut. Tamatumunnga atatillugu Naalakkersuisut maleruaqqusanit aalajangersaasinnaapput ataqatigiissaanissamut pilersaarutini aamma isumaqatigiissutigineqartuni napparsimasup kinaassusianik ilaqartinneqassanersut.

Tamatuma saniatigut immikkoortoq 2.6-imi oqaaseqaatit nalinginnaasut napparsimavimmit angerlartitsinneqareernermi malittarineqarneq tunngasut innersuussutigineqarput.

§ 17-imut

Napparsimavimmit angerlartinneqarnermut atatillugu isumaqatigiissusiortoqarsimappat imaluunniit ataqatigiissaanermut pilersaarusiortoqarsimappat, § 17-imi siunnersuutigineqarpoq tarnimikkut napparsimasunut immikkoortorta qarfiup pisorta qarfiit allat, peqqinnissamik sullissisut assigisaasalu akunnerminni paasissutissanik, napparsimasup inuttut nammineq inuuneranut tunngasunik, paarlaasseqatigiittarsinnaanerit.

Napparsimasoq sapinngisaq tamaat ikiorsinnaassagaanni tapersorsinnaassagaannilu, paasissutissanik inummut namminermut tunngasunik paarlaasseqatigiittarnissaq pisariaqarpoq. Paasissutissat inummut namminermut tunngasut ilaatigut tassaapput nappaammut tunngatillugu paasissutissat, peqqissuseq, inuup peqqinnissaqarfimmut attaveqarnera, ilaqutariinnermut tunngasut, isertitaqarnermut tunngasut il.il.

§ 18-imut

Imm. 1-imut

Napparsimavimmiit angerlartinneqareernermi pinngitsaaliissummik inuit malittarineqartussat tassaapput napparsimasut sanngiinnerpaat. Dronning Ingridip Napparsimavissuani tarnimikkut napparsimasunut immikkoortortaqarfimmi naammaginakannersumik nakorsarneqarsimallutik angerlartitaasut, tamatigut nakorsaatitornerminnik unitsitsisartut tamatumalu nassatarisaanik nappaqqillutik aamma pisariaqarpat pinngitsaaliissummik unitsinneqaaqqittariallit. Napparsimasut sanngiinnerpaat ikittuinnaat matumani pineqarput § 18-ip ilanngunneqarnera sioqqullugu anguneqarsinnaasimangitsut.

Taamaaliornikkut inatsisitigut illersugaanikkut kingunerluutilimmut saqisitsinnginninnissaq qulakkeerniarlugu periarfissallu pisariaqanngitsumik atorneqaaqqunagit, angerlartitaareernermi inunnik pinngitsaaliissummik malittarisarialinnik immikkoortitsisussanik, maleruaqqusanik piumasaaqatitalinnik sisamanik ilanngussisoqarnissaa siunnersuutigineqarpoq. Piumasaaqatit tamarmik eqquutsinneqarpata aatsaat napparsimavimmiit angerlartitaareernermi pinngitsaaliissummik malittarinnittoqarsinnaavoq.

Siullermik napparsimavimmit angerlartitaareernerup kingorna, peqqissutsimut pingaarutilimmik nakorsartinnerup malittariunnaarnissaanik *annilaanngateqarneq tunngavissaqassaaq ilimanaateqarluinnassallunilu.*

Taama piumasaaqateqarneq napparsimavimmi uninnganermut pineqartumut tunngassuteqassaaq. Tassa imaappoq napparsimavimmi uninnganerup nalaani pissutsit suut tunngavigalugit, napparsimasup angerlareernermi kingorna pisarialimmik nakorsartinnerminik taamaatitsinissaata ilimanaateqarluinnarnera nalunaarneqassaaq. Napparsimasut pineqartut napparsimavimmit angerlareernermik kingorna, nappaat utersaaqqunagu nakorsaanerup pisariaqartutut naliligaanik, nakorsartinnermik malittarinninniarnatik, namminneq oqaatiginnittuusinnaapput. Imaluunniit allamik tunngaveqarluni soorlu assersuutigalugu napparsimasup uninnganermi nalaani nakorsartinnini pillugu suleqatiginninnissamut piumassusia tunngavigalugu, nakorsartinneq pillugu atasinnaasumik suleqatigiinnissamut isumaqatigiissuteqanngippat, taamaammallu napparsimasup angerlareernermi kingorna nakorsartinnerminik taamaatitsinissaata annilaanganaateqarnera ilimanarluinnarneraluunniit, nakorsaanermit nalilivigineqarsinnaavoq.

Taamaalillutik nappaateqarnermik paasinninneq annikitsoq aamma nakorsartinnissat kajumissuseqarneq annikitsoq, napparsimasup angerlareernermi kingornatigut

nakorsartinnerup taamaatinneqarsinnaaneranut annilaangassutissaqarnermut qulakkeerinneqataasinnaapput.

Tamatuma saniatigut napparsimasut sanngiinnerpaat angerlareernerмик kingornatigut pinngitsaaliissummik malittarineqarnissamut, maleruagassat malillugit pineqarnissaat qulakkeeriarlugu, pineqartut immikkoortissinnaanissaannut aalajangiinermi tunngaviusussat piviusut eqqortinneqassapput.

Napparsimasup ukiut kingulliit pingasut ingerlanerini ikinnerpaamik ataasiarluni pinngitsaaliissummik napparsimavimmut unitsitaasimanissaa imaluunniit pinngitsaaliissummik uninngatinneqarsimanissaa siullermik piumasaqaataapput, tak. § 18 imm. 1, nr. 1.

Tamatuma saniatigut ukiut pingasut kingulliit taakku ingerlanerini ikinnerpaamik ataasiarluni angerlartinneqarnermut atatillugu isumaqatigiissummi imaluunniit ataqatigiissumik pilersaarummi nakorsartinnissamik malittarinnissimannginneq piumasaqaataavoq, tak. § 18, imm. 1 nr. 2. Taamaalilluni angerlartitaanermut atatillugu isumaqatigiissusiorsinnaaneq imaluunniit ataqatigiissumik pilersaarusiorsinnaaneq misilinneqarsimassaaq.

Napparsimavimmiit angerlartitaanermi isumaqatigiissutit imaluunniit ataqatigiissaanermut pilersaarusiata taamaallaat katsorsartinnermut tunngasoq napparsimasumit malinneqarsimassanngilaq.

Taamaammat angerlartitaanermut atatillugu isumaqatigiissutip imaluunniit ataqatigiissaanermut pilersaarusiap isumaginninnermut tunngasortaata napparsimasumit malittarineqarsimannginnera, pingaarutilittut isigineqarsinnaanngilaq. Inuit pineqartut kisiisa immikkoortissinnaajumallugit, napparsimasup uninnganermi matumani pinngitsaaliissummik unitsitaasimanissaa imaluunniit pinngitsaaliissummik uninngatinneqarsimanera pinngitsoorani piumasaqaataavoq, tak. § 18 imm. 1, nr. 3. Immikkoortitsineq tamanna qulakkeerinneqataavoq pinngitsaaliissummik malittarinninnerup taamaallaat napparsimasunut, napparsimavimmut uninnermi tassani pineqartumut atatillugu silanngajaarsimasunut imaluunniit tamatumunnga sanilliunneqarsinnaalluartumik pissuseqarsimasunut tunngavoq, tassanilu pineqartumit katsorsaanissaq siunertaralugu kiffaangissusiiaannginneq imminut illersorneqarsinnaanani.

Imm. 2-mut

Siunnersuummi § 18, imm. 2-mi takuneqarsinnaavoq angertartinneqareernermi pinngitsaaliissummik malittarinninnissamut nakorsaanerup aalajangiinera taamaallaat napparsimaveqarfiup immikkoortuisa arlaannut nakorsaatitortartarnissamik imaqsarsinnaasoq. Napparsimasut angertartinneqareernerminni pinngitsaaliissummik malittarineqartussat, namminneq ineqaraluarpata isumaginnittoqarfiulluunniit ataani inissinneqarsimagaluarpata, angertarsimaffigisaminni katsorsartissinnaanngillat. Nakorsaatitortitaanerup peqqinnissaqarfiup immikkoortuani pinissaanut piunasaqaateqarnek, napparsimasut sineriak tamakkerlugu peqqinnissaqarfiup immikkoortuini katsorsagassanngorlugit angertartitaasarnerinik tunngaveqarpoq.

Napparsimasumik nakorsaatitortitsineq matumani kisimi pineqarpoq. Taamaalillutik katsorsaariaatsit soorlu pinngitsaaliissummik nerisinneqarnek aamma qupinnguallatsitsisarnerit angertartinneqareernermi pinngitsaaliissummik malittarinnermut atatillugu ingerlanneqarsinnaanngillat. Soorunami naatsorsuutigineqarpoq napparsimasumut, napparsimasutulli allatut nakorsaatinik katsorsaanerup saniatigut, katsorsaanissamut allanik neqeroorfigineqarnissaat tamanna naleqquppat, tamatumunnga ilanngullugit oqaloqatigiittarluni katsorsaaneq aamma allatigut katsorsaanerit.

Imm. 3-mut

Napparsimasoq takkutinnigippat, tak. imm. 2, siunnersuummi § 18, imm. 3 naapertorlugu, napparsimasup pinngitsaaliissummik najukkami peqqinnissaqarfiup immikkoortuani nakorsaatitortinneqarnissaa siunertarlugu politiinit aaneqarnissaa pillugu nakorsaaneq aalajangiippat pinngitsaaliinikkut nakorsaatitortitsisoqarsinnaavoq. Taamaalilluni nakorsaatitortitsinissamut pissaanermik atuinissaq piviusunngorsinnaavoq. Tamanna taamaallaat peqqinnissaqarfimmi pisinnaavoq, taamaaliornikkut tarnikkut nappaatit pillugit immikkut ilisimasalinnik sulisulimmi aammattaq pinngitsaaliissummik nakorsaatitortitsinermi periarfissagissaarfiunerusumi tamatuma ingerlanneqarnissaa qulakkeerneqassaaq.

Napparsimasoq politiinit ikiorteqarluni aaneqassappat, pisariaqanngitsumik ajuallatsitsiumanani ajoqusiiumananilu, sapinngisaa tammaat naliliisinnaassuseqartumik malunnaarsaartumillu ingerlanneqassaaq.

Taamatut pisoqarnera pinngitsaaliissummik napparsimavimmut unitsitsinertut ingerlanneqassaaq. Napparsimasumik pinngitsaaliissummik uninngatitsineq tamanna sivikitsuinnaassaaq (ulloq ataaseq). Naatsorsuutigineqarpoq pinngitsaaliissummik nakorsaatitortitsiartorneq tamanna taamaallaat atorneqassasoq napparsimasup tarnimikkut

napparsimasunut immikkoortortaqarfimmit angerlartinneqarnermi kingornatigut suli nakorsaatitortinneqarnissaminut pisariaqartitsineratigut, aamma tarnimikkut napparsimasunut immikkoortortaqarfimmut unitsitsitsinngikkaluarluni nakorsaatitortitsinissamut periarfissat allat tamarmik pisinnaajunnaarsimappata.

Napparsimasoq § 18, imm. 2 naapertorlugu nammineq piumassutsini tunngavigalugu takkunnermini imaluunniit § 18, imm. 3, naapertorlugu politiit ikiortigalugit takkunnermini ima napparsimatigippat, napparsimavimmut uninnissaq imaluunniit pinngitsaaliissummik unitsinneqarnissaa pisariaqarluni, tamanna pinngitsaaliissummik unitsitsinermi maleruaqqusat naapertorlugit ingerlanneqassaaq. Taamaalillutik angerlartitaareernermi pinngitsaaliissummik malittarinninnermut maleruaqqusat pinngitsaaliissummik unitsitsinermut maleruaqqusanit taarserneqanngillat.

Imm. 4-mut

Siunnersuummi § 18, imm. 4 naapertorlugu napparsimavimmit angerlartinneqareernermi pinngitsaaliissummik malittarineqarnermut atatillugu nakorsaatitortitaanermi, nakorsaatit napparsimasumut sunniutaat nakorsaanermi ilisimaneqartut ilaatigut piffissami sivisuumi sunniusimasartut atorneqassapput. § 4 naapertorlugu annikinnerpaaffimmiitsitsinissaq eqqarsaatigalugu taamatut aalajangersaasoqarpoq. Taamaattumik napparsimasumut annikinnerusumik akuliunnertut tunngaviumik aallaavigineqartariarpoq ullut tamaasa nakorsaatitortitaanermiit soorlu assersuutigalugu ullut 14-it allortarlugit sivisuumik sunniusimasartumik nakorsaateqarnek. Sivisuumik sunniusimasartunik nakorsaateqarsinnaanerup, napparsimavimmit angerlarnermiit pinngitsaaliissummik malittarineqarnissami, pissutsinik immikkut ittunik tunngaveqarnera oqaatigineqassaaq.

Imm. 5-imut

Siunnersuummi § 18, imm. 5-imi siunnersuutigineqarpoq pinngitsaaliissummik malittarineqarnerup ikinnerpaamik qaammatit pingasut allortarlugit nakorsaanermiit naliliivigineqartarnissaa.

Imm. 6-imut

Tamatuma kingornatigut siunnersuummi § 18, imm. 6-imi siunnersuutigineqarpoq qaammatit pingasut qaangiunneranni nakorsaanerup nalilissagaa, annilaangassuteqarnissamut tunngavissaqarnersoq aamma nalorninartoqarsinnaanersoq pisariaqartumik katsorsaanermik napparsimasup unitsitsinissaanut. Taamaattoqassappat pinngitsaaliissummik malittarinninnerup qaammatit pingasukkaarlugit sivitsorneqartarnissaa, nakorsaanerup aalajangiivigisinnaavaa.

Tarnimikkut napparsimasut pineqartut nammineersinnaassusaannik ataavartumik arsaarinninnissaq kissaatigineqanngilaq. Napparsimavimmi uninngareernermi malittarinninnerummat napparsimasup sivisunerpaamik qaammatini aqqaneq marlunni malittarineqarnissaa siunnersuutigineqarpoq. Napparsimasumik pinngitsaaliissummik malittarinninnissamut qaangerneqarsinnaanngitsumik killiliinikkut, napparsimasup sivoorsuarmik pinngitsaaliissummik katsorsartissinnaanera pinngitsoortinneqassaaq. Taamaalilluni siunnersuut naapertorlugu piumasaqaatit eqquutsinneqarpata, aatsaat napparsimavimmit angerlareernerup kingorna pinngitsaaliissummik malittarinnittoqarsinnaavoq.

Napparsimavimmit angerlartinneqareernerup kingornatigut pinngitsaaliissummik malittarinninnermut atatillugu immikkoortoq 2.6-imi oqaaseqaatit nalinginnaasut taamatutaaq innersuussutigineqarput.

§ 19-imut

Siunnersuutip § 19-iani Naalakkersuisut pisinnaatinneqarput ingerlatsinikkut angerlartinneqareernerup kingornatigut pinngitsaaliissummik malittarinnermut atatillugu § 18-imi aalajangersakkanut sukumiinerusumik maleruaqqusanik suliaqarnissaminnut, tamatumunnga ilanngullugu politiinit ikiorteqarluni aallertarnermut tungasunut. Malugeqquneqarpoq Naalakkersuisut politiinik ikiorneqarnissamut tunngatillugu aalajangersakkanik suliaqarnissaminnut pisinnaatinneqannginnerat Justitsministeriamit akuersissuteqartoqartinnagu, tak. Kalaallit Nunaanni pinerluttulerinermi inatsimmi § 61, imm. 2.

Kapitali 6-imut

Pinngitsaaliissummik sukaterussineq

§ 20-mut

Imm. 1-imut

Siunnersuummi § 20-mi pineqarpoq pinngitsaaliissummik sukaterussineq illersuiniarluni sukaterussinerup akerlianik, tamatuma atorneqarnera § 24-mi malittarisassaliuunneqarpoq. Pinngitsaaliissummik sukaterussinerup aamma illersuiniarluni sukaterussinerup akornanni

immikkoortitsinermut tunngatillugu immikkoortoq 2.7-imi oqaaseqaatit nalinginnaasut innersuunneqarput.

§ 20, imm. 1-imi ilaapput pinngitsaaliisummik sukaterussinermi suut atorneqarsinnaasut sukumiisumik allattorsimanerat, taakku imm. 2-mi piumasaqaatini allassimappata. Qiterut, paffinnut singernullu ungerutit aammattaq aaqqatit kisimik taamaallaat pinngitsaaliisummik sukaterussinermi atorneqarsinnaapput. Pinngitsaaliisummik sukaterussinermi atortut ataqatigiissillugit imaluunniit immikkoortillugit artorneqarsinnaapput, tamatumani § 4-mi annikinnerpaaffeqartitsinissamut tunngaviusoq isiginiarneqassaaq.

Imm. 2-mut

Aalajangersakkami pinngitsaaliisummik sukaterussinerup qanoq atorneqarnissaanut piumasaqaatit aalajangersarneqarput.

§ 20, imm. 2, nr. 1-imi timikkut imaluunniit peqqissutsimi ajoqusernissamut qaninnerpaamik navianarnerpaat takuneqarsinnaapput. Matumani inuit illersorniakkat amerlanerupput. Pinngitsaaliisummik sukaterussinermit maleruaqqusami inuk pineqartoq kisimi pineqarnani, kisianni aammattaq napparsimavimmi uninngaqtatit, sulisut, pulaartut imaluunniit allat napparsimavimmiittartut pineqarput.

Navianartorsiortitsisinnaanermut ersiut pineqarpoq. Navianartorsiortitsisinnaaneq ilimanaateqarluinnartutut nalileneqarsinnaavoq tamanna piviusuuppat, maannakkut pisinnaalluni aamma navianartorsiutit takuneqarsinnaalluni. Iliuseqannginnermili navianartorsiortitsisinnaaneq ajoqusiinermik kinguneqartitsereersimasariaqanngilaq. § 20 imm. 2, nr. 2-mi pineqarput iliuseqarnerit sakkortuallaanngitsut aammattaq inunnut sammisut. Taamaattorli inuit illersorniakkat tassaaginnarlutik napparsimavimmi uninngaqtatit.

Peqqarniisaarnerli immikkut sakkortuppat taava tamanna pissutsit naapertorlugit navianartorsiornermik kinguneqassaaq, tamannalu normu 1-imut ilaatinneqarpoq tamatumalu kingunerisaanik pinngitsaaliissutit atorneqarnissaat, aalajangersagaq taanna naapertorlugu pissutissaqassapput.

Malersuinerit imaluunniit peqqarniisaarnerit ilaatigut kinguaassiutinut sammisutut qaninniaaerusinnaasarput, suaarnerit, sakkortuumik qinngasaarnerit imaluunniit allat piinik innimiilliornerit tigusinerillu. Ilaatigulli uninngaqtaminut napparsimasoq peqqarniisaartoq allamut nuutikkallarsinnaaneragut ajornartorsiummik qaangiisinnaaneq eqqarsaataasinnaavoq tak. § 4 (annikinnerpaaffimmiititsinissamik tunngaveqarneq).

Naggataatigut § 20, imm. 2, nr. 3-mi pinngitsaaliissummik sukaterussinissamut periarfissiisoqarpoq tamatumani pisariaqarpat napparsimasup annikigisassaanngitsumik aserorterinissaa pinngitsoortinniarlugu. Annikigisassaanngitsumik aserorterinermik naliliinermi pigisat qanoq naleqarneri kisiisa isiginiarnagit, kisianni aammattaq aserorterinerup annertussusia aamma qanoq sivisutiginera isiginiarneqassapput. Pinngitsaaliissummik sukaterussinermi annikinnerusumik iliuuseqarnikkut aserorterineq unitsinneqarsinnaappat annikinnek toqqarneqassaaq tak. § 4.

Tamatuma saniatigut immikkoortoq 2.7-imi oqaaseqaatit nalinginnaasut innersuussutigineqarput.

§ 21-mut

Imm. 1-2-mut

Aalajangersakkami siunnersuutigineqartumi ilaavoq kina pinngitsaaliissummik sukaterussinerep atorineqarnissaanut aalajangiinissamut pisussaataaffeqarnerisooq.

§ 21, imm. 1-ip kingunerisaanik pinngitsaaliissummik sukaterussineq nakorsap napparsimasumik takusaareernermigut tamanna aalajangissagaa.

§ 21, imm. 2, naapertorlugu qiterusiinerup saniatigut paffinnut imaluunniit singernernut ungerutit aqqatillu atorineqarnissaannut, taamaattorli Dronning Ingridip Napparsimavissuani tarnimikkut napparsimasunut immikkoortortaqaarfimmi nakorsaaneq aalajangiisuussaaq.

Imm. 3-mut

Aalajangersakkami takuneqarsinnaavoq pinngitsaaliissummik sukaterussineq allartinneqarsimasooq peqqinnissaqarfiup immikkoortuisa arlaanni nalunaaquttap akunneri aqqaneq marluk sinnerlugit sivisussusilik imaluunniit sivisussuseqassanganneqartoq, pinngitsaaliissummik sukaterussinerep ingerlatiinneqarnissaanut aalajangiineq Dronning Ingridip Napparsimavissuani tarnimikkut napparsimasunut immikkoortortaqaarfimmi nakorsaanermi aalajangiivigineqassaaq. Dronning Ingridip Napparsimavissuata avataani pinngitsaaliissummik sukaterussinerni nalunaaquttap akunnerinik aqqaneq marlunnik maleruaqqusaqarnikkut qulakkeerneqassaaq, nakorsap katsorsaasup nuna tamakkerlugu napparsimavimmut isumasiuinissaa sivisunerusumik pinngitsaaliissummik sukaterussisoqartillugu. Tamatuma saniatigut sivikitsumittaaq pinngitsaaliissummik

sukaterussinermi, pisariaqarpat nakorsap immikkut ilisimasalimmik naliliisitsinissaa naatsorsuutigineqarpoq.

Nalunaaquttap akunnerinik aqqaneq marlunnik maleruaqqusaqarnerup pinngitsaaliissummik sukaterussinerni nalunaaquttap akunneri aqqaneq marluk sinnerlugit sivisussuseqarnissaa nalunaarunnaarpat, ataasiarluni siunnersortinnissaaq piumasqaataavoq. Tamatuma kingornatigut napparsimasup peqqissusianik aamma pinngitsaaliissummik sukaterussinerup sivitsorneqarnissaanik naliliisarnerni, Dronning Ingridip Napparsimavissuani tarnimikkut napparsimasunut immikkoortotaqarfimmi nakorsaanerup immikkut ilisimasalittut naliliisinnissaanut pisariaqartitsineq, nalinginnaasumik nakorsap nammineq naliliinera naapertorlugu aalajangiivigineqassaaq.

Imm. 4-mut

Aalajangersagaq naapertorlugu qanoq iliuuseqarnissamut tamanna sioqqullugu nakorsap peqqusineragut pisinnaanera immikkut pinasuartumik iliuuseqarfigisarialinni avaqqunneqarsinnaavoq. Tamatumani piumasqaataavoq pisoq tassaassoq timikkut imaluunniit peqqissutsikkut ajoqusersinnaanerup ilimanaateqarluinnarnerani, pinngitsaaliissummik qitequsiilluni sukaterussinerup nakorsap takkunnissaata tungaanut kinguartinneqarnerata, isumannaallisaanikkut illersorneqarsinnaannginnera. Immikkoortotaqarfimmi imaluunniit peqqissaavimmit pisoqarfiusumi pigaartoqarnikkut pissutsit, ullup qanoq ilinera nakorsallu aggersarneqarnerani ilisimatitsissutigineqartut eqqarsaatigalugit, nakorsap takkunnissaata tungaanut piffissap sivisussusissaa naliliivigineqassaaq. Qitequsiinnermit annikinnerusumik iliuuseqarsinnaaneq, pingaartumik nakorsap takkunnissaata tungaanut inummik allamik ilaqartinneqarnerup, pisariaqarpallu uninngatinneqarnerup naammassinnaanera, naliliiviginninnermi ilaatinneqassaaq.

Taamatut pinasuartumik iliuuseqarfigisarialinni qitequsiilluni sukaterussinissamut t aalajangiinissamut piginnaatitaaneq peqqinnissamik sullissisuniippoq, tassa imaappoq peqqissaasoq pigaartuusoq imaluunniit taassuma taartaa, imaluunniit qaqutigunnaq peqqinnissamik suliaqartoq tamaaniittoq.

Pinngitsaaliissummik sukaterussinerit taamatut ittut piaartumik isummerfigineqassapput, tassa pinngitsaaliissummik atuinerup unitsinneqarnissaanut tunngatillugu. Taamaattorli qaqugukkulluunniit peqqinnissamik sullissisut pinngitsaaliissummik sukaterussinerup unitsitinneqarnissaa pisussaaffigaat, taamatut iliorneq pisariaqarunnaarpat.

§ 22-mut

Siunnersuummi § 21-imi napparsimasoq qitequserlugu pinngitsaaliisummik sukaterunneqarsimasoq aalajangersimasumik nakkutilliisoqarnissaa piumasaqaataavoq.

Maleruaqqusami pingaarnertut siunertaavoq pinngitsaaliisummik qiteqummik sukaterussinerup annertuumik sunniuteqarluni kingunerlunnissaata sunniuteqarnerata annikillisinneqarnissaa, tassa sukaterussinermut aamma kisimiinnermut atatillugu. Tamatuma saniatigut aalajangersimasumik nakkutilliisoqarnerup pinngitsaaliisummik qiteqummik sukaterussinerup atornerqarnera killilerneqarsinnaammat, ingammik piffissap sivisussusiata taamaalilluni sivikillineratigut.

Aalajangersimasumik nakkutilliisuutitaq tassaavoq paaqqinnittoq, peqqissaasoq, imaluunniit sulisoq alla piginnaasaqartoq, tamatumunnga ilutigitillugu suliassanik allanik suliaqartussaangitsoq taamaallaat napparsimasunik pinngitsaaliisummik qiteqummik sukaterunneqarsimasunik isumaginnittusaaq, tassa pineqartup aalajangersimasumik nakkutigisarisaminik. Napparsimasup piumasai, inuttut naleqassusaa imminullu qanoq isiginera ataqqillugit pissutsillu aallaavigalugit, inuttut nammineq inuunissamut pisinnaatitaaffeqarnissaa eqqarsaatigalugu, nakkutilliineq ingerlanneqassaaq.

Nukiit atorlugit pissaanermik atuineq

§ 23-mut

Imm. 1-imut

Nukiit atorlugit pissaanermik atuinnermut piumasaqaatit tassaavoq napparsimasumik najummisaqarneq aamma isersimaffimmut allamut ingerlatsinerusinnaavoq, taakku pinngitsaaliisummik sukaterussinermi § 20, imm. 2, naapertorlugu piumasaqaatit ippit. Pinngitsaaliisummik katsorsaanermut atatillugu nukiit atorlugit pissaanermik atuineq pisariaqarpat tamatumunnga periarfissiisutit § 13, imm. 2-mi takuneqarsinnaapput.

Nukiit atorlugit pissaanermik atuinnermi suup atornerqarneranut apeqquq, tassa pisuni ataasiakkaani atornerqartussamut tunngatillugu annikinnerpaaffiutitsinissamut tunngaviusoq tak. § 4 isiginiarneqassaaq. § 20, imm. 2-mi aamma § 23-mi aalajangiinnermut tunngaviusut paasineqarneranni qanoq annertusiartortitsisoqarnera isiginiarneqartariaqarpoq, taamaaliornikkut piumasaqaatit annertusiartussammata, iliuuserisami akuliunnerup annertussusia apeqqutaatillugu.

Aalajangersakkami § 23, imm. 2, naggatit aappaanni ilaapput nukiit atorlugit pissaanermik atuinissamut periarfissat napparsimasut kiffaanngissusiagaasimasut immikkoortortaqarfimmit anitsaaliornissaat qulakkeerniarlugu. Maleruaqqusap ilaatigut Dronning Ingridip Napparsimavissuani tarnimikkut napparsimasunut immikkoortortaqarfimmi nakorsaanermik pisinnaatitsivoq immikkoortortaqarfiup matuisa silarliit paarnaarsimaannarnissaannik aalajangiinissamut. Tamanna atuuppoq naak § 20, imm. 2, naggammi siullermi piumasagaatit eqqortinneqanngikkaluartut.

Imm. 2-mut

Maleruaqqusap napparsimasumik annertuumik eqqissiviitsumik eqqissisisimanerulersitsiniarluni kapuummik eqqissisaatitalimmik atuinissamut pisinnaatitsivoq. Tamanna peqqinnissamut tunngaveqartumik pisariaqarsinnaavoq tassami napparsimasup qanoq innera pitsaanerulissappat ilaatigut pisariaqarsinnaavoq pineqartup sinilernissaa. Taamatuttaaq pissutsit qanoq ittuunerat naapertorlugi eqqissisaammik atuneq annikinnerusumik iliuuseqarnerusinnaavoq, napparsimasup piffissami sivikinngitsuusinnaasumi najumminissaanut imaluunniit qiterut atorlugi pinngitsaaliissummik sukaterussinermut sanilliussilluni. Qanoq pisoqarnera tunngavigerpiarlugu naliliinermi suup atorneqarnerata annikinnerpaatitsisoqarnissaanut tunngaviunersoq toqqarneqassaaq. Tamatumunnga ilutigitillugu nakorsaatit ilaat eqqissisaatit sianitigissaatit atorneqarsinnaapput. Aalajangersagaq tamatut oqaasertaqqarnermigut tamatumunnga killilersuutaanngilaq.

Pinngitsaaliissummik nakorsaatitortitsinermi, nakorsarneqarnissamut pilersaarummi kapisarnerit ilaatinneqarpata, tamanna taamaallaat pisinnaavoq § 13 naapertorlugi, tamatumani Dronning Ingridip Napparsimavissuani tarnimikkut napparsimasunut immikkoortortaqarfimmi nakorsaaneq akuersissuteqassaaq. Taamaattorli nakorsap pigaaatuusup § 23, imm. 2, tunngavigalugu pisinnaatitaavoq qaqutigut pinasuartariaqarnermi kapuummik eqqissisaatitalimmik atuinissaminut pisinnaatitaavoq, tamatumani annikinnerpaaffimmiititsinissaq siunertarineqassaaq. Eqqissisaammik kapisinermi nakorsaq najuutissaaq.

Tamatuma saniatigut immikkoortoq 2.7-imi oqaaseqaatit nalinginnaasut innersuussutigineqarput.

Sernissuiniarluni sukaterussineq

§ 24-mut

Imm. 1-imut

Sernissuiniarluni sukaterussinerup aamma pinngitsaaliissummik sukaterussinerup akornanni immikkoortitsinissamat tunngatillugu immikkoortoq 2.7-imi nalinginnaasumik oqaaseqaatit innersuussutigineqarput.

Napparsimasumik piumassusiata akerlerisaanik sukaterussineq taamaallaat pisinnaavoq ajoqusinnginnissaa siunertaralugu tamanna pisariaqarpat, pineqartoq taamatut pinianggikkaluarluni imminut annertuumik navianartorsiortippat. Iliuserineqartoq pinngitsaaliissummik pisutut isigineqassaaq napparsimasoq toqqaannartumik akerliulluni oqaaseqarpat. Taamatuttaaq pinngitsaaliissutitut isigineqassaaq pineqartoq imatut ileqqulersorpat sernissuiniarluni atorneqartumit inuk pineqartoq peerniarsarippat. Napparsimasoq nammineerluni peersinnaappat tamatumunngalu akornusersorniarneqarnani, taava tassani tamanna sernissuiniarluni sukaterussinertut isigineqassanngilaq, kisianni iluaqutissatut ikiorsiissutitut.

Sernissuiniarluni sukaterussinermi assersuutit pingaarnertit piviusut tassaapput nerriviup saavanut napparsimasoq issiavimmut ingitsillugu, taamaalilluni napparsimasoq nammineerluni nikuissinnaajunnaarsillugu nerriviup sukaterussinermut immikkut suliaasup atoneratigut. Napparsimasoq siniffimmini innangatillugu qipiata qaavatigut tungimik imaluunniit ungerutissiamik annoraaminermik qajannaarlugu, uffarnermi, perusersartarfimmi imaluunniit issiavimmi qiterut atorneqarsinnaavoq taamaaliornikkut napparsimasup nikuinnginnissaa uppillunilu anninnginnissaa qulakkeerniarlugu.

Imm. 2-mut

§ 24, imm. 2 naapertorlugu sernissuiniarluni sukaterussinerup nakorsap peqqusinera naapertorlugu, qanoq annertutigisumik qanorlu pisoqartillugu atortup sorliup atorneqarnissaanik innersuussisumik tunngaveqarnissaa piumasaqaataavoq. Tamatumunngalu ilutigitillugu qanoq ilinerani inassuteqaatip nalilivigineqaaqqinnissaa pillugu aalajangersaasoqassaaq, sisamariarlunili peqqussuteqareernerup kingornatigut tamanna sapaatit akunnerisa sisamat qaangiunnerini pisassaaq, tak. § 32, imm. 2.

Dronning Ingridip Napparsimavissuani tarnimikkut napparsimasunut immikkoortortaqarfimmi nakorsaanerup sernissuiniarluni sukaterussinerup sapinngisamik pisariaqartitsineq naapertorlugu annertunerusumik atorneqannginnissaa akisussaaffigaa aamma nakkutigisussaallugu, tamatumani napparsimasup isumannaatsuunissaa mianerineqassaaq, tak. § 32, imm. 1.

*Qanimut nakkutilliineq**§ 25-mut***Imm. 1-imut**

Inatsisissatut siunnersuummi § 25, imm. 1-imi qanimut nakkutilliineq, sulisup ataatsip imaluunniit arlallit napparsimasup eqqaaniiginnavinnerattut nassuiarneqarpoq. Eqqaaniiginnarneq imatut paasineqassaaq napparsimasup ataavartumik nakkutigineqarneratut, tamatumunnga ilanngullugit perusersarnerani aamma uffarnerani taamaaliornikkullu sulisut ingerlaannartumik iliuuseqarsinnaassallutik.

Napparsimasup nakkutigineqarnissani akuerippagu, napparsimasut inatsisitigut inissisimanagerat pillugu Inatsisartut peqqussutaanni paasissutissinneqareernikkut akuersinermut maleruuaqqusat naapertorlugit taama pisoqarsinnaavoq. Napparsimasoq akuersinngippat, qanimut nakkutiginninneq tassa napparsimasoq ataavartumik nakkutigineqarluni, tamanna inuit ataasiakkaat innarligassaangissusianut ima annertutigisumik akulerunnerussaaq, taamaalilluni inatsisitigut tamanna inatsisitigut maleruagassiortariaqarluni.

Imm. 2-mut

Siunnersuummi § 25, imm. 2 naapertorlugu qanimut nakkutiginninneq pisariaqartumik pinngitsoortitsiniarnermut atorneqarsinnaavoq, napparsimasup imminut toqunnissaa imaluunniit allatut nammineq allaluunniit peqqissusiannik annertuumik innarliisinnaappat, imaluunniit uninngaqatiminik malersuippat imaluunniit allatut ajoqusersuippat.

Pineqartut tassaasinnaapput napparsimasut ingerlaaruusaartut eqqissiveerusimaannarlutik, allanullu ileqqulersornerat akulerunnertut aamma akornusersuinertut isigineqarsinnaalluni, soorlu assersuutigalugit napparsimasut ingasannermik pissuseqartut, allat piinik tigussukartut, kinguaassiutinut sammisutut qaninniartut il.il. Aammattaaq pineqarsinnaapput tarnimikkut napparsimasut neriumajunnaarnermik nappaateqartut.

Annikinnerusumik nakkutilliinerit/nakkutiginninnerit aalajangersakkami matumani pineqanngillat.

Imm. 3-mut

§ 25, imm. 3-mi allassimavoq napparsimasup akuersissutiginnigisaanik qanimut nakkutilliineq nakorsamit takuniaareersimasumit aalajangiivigineqassasoq.

Qanimut nakkutigineqarnek nalunaaquttap akunneri 24-t sinnerlugit sivisussuseqarpat, aalajangiineq pinngitsaaliissummik iliuuseqarnermi nalunaarsuivimmu ilanngunneqassaaq, tak. § 31. Taamaattoqartillugu napparsimasup § 43 naapertorlugu Tarnimikkut Nappaatillit Maalaarutaannik Aalajangiisartunut aalajangiineq maalaarutigisinnaavaa. Taamatuttaaq napparsimasooq § 33 naapertorlugu siunnersortissalerneqarsinnaavoq.

§ 26-mut

Siunnersuummi § 26-p malitsigisaanik napparsimaveqarfimmi oqartussaasut immikkoortortaqrarfiit aaqqissuuneqarnerat pillugu ilisimatitsinissaq pisussaaffigaat. Tamatumunnga atatillugu immikkoortortami immikkut nakkutilliiveqarpat, tamatuma angissusaa aaqqissugaaneralu ilisimatitsissutigineqassapput. Ilisimatitsineq sapinngisaaq tamaat napparsimasup immikkoortortaqrarfimmut uninneranut atatillugu pissaaq. Napparsimasup qanoq innera pissutigalugu taama pisoqarsinnaanngippat, piaarnerpaamik immikkoortortap aaqqissuusaanera pillugu ilisimatinneqassaaq. Dronning Ingridip Napparsimavissuani tarnimikkut napparsimasunut immikkoortortaqrarfiani immikkoortumik ataatsimoortumik pilersitsisoqarnissaa pisariaqarsimavoq. Tamanna imatut paasineqassaaq immikkoortoq ammasutut taamatullu matoqqasutut atorneqarsinnaasut, tassa immikkoortortaqrarfiup ilaa immikkoortuulluni (qanimut nakkutiginniffik), tassunga matu pisariaqartitsineq naapertorlugu paarnaarneqarsinnaalluni.

§ 27-mut

Imm. 1-imut

Aalajangersagaq naapertorlugu aalajangersaasoqarsinnaavoq immikkoortortaqrarfimmi matut paarnaarneqarnissaanut, tassa napparsimasunut kiffaanngissusiiagaasimasunut tunngatillugu, tak. inatsimmi kapitali 3. Pineqartut tassaapput napparsimasut pinngitsaaliissummik unitsinneqarsimasut, pinngitsaaliissummik uninngatinneqartut imaluunniit pinngitsaaliissummik utertinneqarsimasut.

Siunnersuummi § 27, imm. 1 nr. 2 naapertorlugu taamatuttaaq aalajangersaasoqarsinnaavoq matunik paarnaarsisoqarnissaanut, napparsimasunut imminnut annertuumik navianartorsiortinnissaminnut aarlerinaateqartunut tunngatillugu. Napparsimasut tassani pineqartut tassaapput sernissuiniarluni sukaterussanut ilaasut, tak. § 24.

Napparsimasunut taakkununga ilaasunut aalaavigineqarpoq inuit puiguttormik nappaateqartut, kisianni aammattaaq inuit silaqassutsimikkut ajornartorsiutillit imaluunniit paatsiveerusimaartut, imaluunniit ularussisimasutut ittut aalajangersakkamut ilanngunneqarsinnaasut. Paarnaarsinermut siunertaavoq illersuiniarluni iliuuserineqartoq taamaalilluni siunertamit, § 27, imm. 1-imi tunngaveqartumit paarnaarsinermut tassani pineqartut tassaapput napparsimasut kiffaanngissusiagaasimasut, allaaneruvoq.

Imm. 2-mut

§ 27, imm. 2 naapertorlugu taamatutaaq matunik paarnaarsisoqarsinnaavoq napparsimasunut imm. 1-imi ilaatinneqanngitsunut tunngatillugu, imaappat tamanna napparsimasumit noqqaassutigineqarluni. Napparsimasup apeqquteqaateqarneratigut paarnaarsimatitsineq atorunnaarsinneqassaaq.

Imm. 3-mut

§ 27, imm. 3 naapertorlugu napparsimasut tamarmik immikkoortortaqarfimmiittut ingerlaannartumik ilisimatinneqassapput, imm. 1 aamma imm. 2 naapertorlugit paarnaarsinissamut aalajangerneqarnerata kingornatigut.

§ 28-mut

Pinnngitsaaliissummik napparsimasup timimigut pinnngitsaaliissummik eqqiluisaarneqarnissaa pillugu aalajangiineq Dronning Ingridip Napparsimavissuani tarnimikkut napparsimasunut immikkoortortaqarfimmi nakorsaanermit aalajangiiffigineqassaaq, tamatumani tunngavigineqassaaq piviusumik misissuineq aamma napparsimasup eqqiluisaarnermut tunngatillugu qanoq inissisimanerata nalilerneqarnera. Nakorsaanerup aalajangiinera tunngavilersuutigineqartullu napparsimasooq pillugu allattugaatinut nalunaarneqassapput, tak. § 13 nakorsat pillugit inatsimmi, (Nakorsat sulinerat pillugu inatsisip Kalaallit Nunaannut atortuulersinneqarnera pillugu peqqussut nr. 860, 18. december 1991-imeersoq).

Aalajangersagaq naapertorlugu napparsimasup timimigut eqqiluisaannginnera tarnimigut nappaataanik patsiseqartinneqarsinnaassaaq. Timip eqqiluutsuutinnissaanut assersuutaasinnaasut tassaapput uffarneq, qulinneq, kigutigissarneq aamma atisanik taarsiineq. Taamatutaaq soorlu assersuutigalugit puiguttortuni nangit nalequttallu taarserneqartariaqarsinnaapput.

Pinngitsaaliissummik timikkut eqqiluisaartitsisoqarsinnaavoq napparsimasup peqqissusaa eqqiluisaannginnermik patsiseqartumik soorlu assersuutigalugit aseruttoorsinnaaneq assigisaallu peqputigalugit navianartorsiorpat. Kisianni aammattaarli napparsimasup eqqiluisaannginnera uninngaqaatanut sulisunullu ajoqutaappat, pineqartup pinngitsaaliissummik uffartinneqarnissaa ipiitsunillu atisitinneqarnissaa allatulluunniit eqqiluisaartinneqarnissaa nakorsaanerup aalajangersinnaavaa.

Annikinnerpaaffissaaniititsinissamut tunngaviusoq, tak. § 4, pinngitsaaliissummik timikkut eqqiluisaarnissaq pillugu aalajangiissagaanni eqqarsaatigineqassaaq. Napparsimasup nammineq piumassutsini naapertorlugu peqataanissaa sapinngisaaq tamaat anguniaqqaarlugu aatsaat taamaaliortoqarsinnaavoq, pissutsillu ajornartitsinngippata napparsimasooq periarfissaqarpat naammaginarumik eqqarsarfissaqartinneqassaaq. Pinngitsaaliissutaasoq aammattaq anguniakkamut naapertuuttuussaaq, annikinnerusumillu akuliunnikkut iliuseqarnerit naammaginarpata, tamakku qinerneqassapput.

Pinngitsaaliissummik timikkut eqqiluisaartitsineq sapinngisamik mianersortumik ingerlanneqassaaq napparsimasorlu sapinngisamik mianersuulluarlugu, taamatut pisariaqanngitsumik misigissutsimigut innarlerneqarsinnaanera ajoqusersinnaaneralu pinngitsoortinniarlugit, tak. siunnersuummi § 4 imm. 3.

Pinngitsaaliissummik eqqiluisaartinneqarneq pillugu maalaarutaasinnaasut napparsimavimmi pisortanut ingerlatinneqassapput.

§ 29-mut

Siunnersuummi § 29-imi Naalakkersuisut pisussaatinneqarput pinngitsaaliissummik sukaterussineq, nukiit atorlugit pissaanermik atuineq, napparsimasut imminnut ajoqusinnginnissaannut sukaterussineq, qanimut nakkutigineqarneq aamma immikkoortortaqarfimmi matunik parnaarsuineq pillugit maleruaqqusanik aalajangersaasinnaanissaminnut.

Pinngitsaaliissummik iliuseqarnerit assigiinngitsut pillugit ersarinnerusunik maleruagassiortoqarnissaa, taamatullu sulisut paasinarsakkanik maleruagassiuunneqarnissaat pisariaqartinneqalersinnaavoq.

Kapitali 7-imut

*Allagarsianik, pigisanik timilu satsillugu misissuisarneq aamma pigisanik
arsaarinnissuteqartarneq aamma suujunnaarsitsisarneq*

§ 30-mut

Imm. 1-imut

Aalajangersakkamut ilapput napparsimasup allagarsiaanit misissuinissamut, napparsimasup inaanik aamma pigisaanik misissuinissamut aammattaaq napparsimasumik timaatigut satsillugu piginnaatitsineq. Pigisanik arsaarinnissuteqarsinnaanerup aamma suujunnaarsitsisinnaanerup assigisaasalu inatsimmi sulii maleruagassaqartinnissaat siunnersuutaavortaaq.

Napparsimasup nakorsaatini, aanngajaarniutini sakkunilluunniit navianaatilinnik imminut uninngaqatinullu ajoqutaasinnaasunik pigisaqarsinnaanerata pissarsisinnaanerataluunniit pitsaaliorsinnaanissaa, aalajangersakkami eqqarsaataavoq. Nakorsaatit, aanngajaarniutit, sakkunilluunniit navianaatillit napparsimasumut apuunneqarsimanerannut apuunniarneqarnerannulluunniit *pasitsaassineq tunngavissaqarpas*, iliuuseqarnissaq Dronning Ingridip Napparsimavissuani tarnimikkut napparsimasunut immikkoortortaarfimmi nakorsaanerup aalajangiivigisinnaavaa. Pissutsit suut pasitsaassinermi tunngaviusut, napparsimasumut allattuiffimmut ilanngunneqassapput.

Taamatuttaaq pisuni ataasiakkaani napparsimasup pasilliutigisanik il.il. pigisaqarsinnaanera immikkut naliliivigineqartassaaq. Taamaamat immikkoortortaarfimmi napparsimasunut ataasiakkaanut ataatsimoortunulluunniit aalajangersimasunik periuseqartoqarsinnaanngilaq.

Aalajangersagaq naapertorlugu napparsimasup *nakorsaatini, aanngajaarniutini sakkunilluunniit navianartuniki* pigisaqarnera misissorneqarsinnaavoq. Pineqartut immikkoortortaarfimmiippata napparsimasumut namminermut, soorlu imminorsinnaasumut allanulluunniit navianaateqarsinnaapput. Pineqartut saviusinnaapput imaluunniit sakkut kisianni aammattaaq atortuusinnaapput nalinginnaasumik ulorianangitsutut isigineqartartut, soorlu assersuutigalugit sannatit, meqqutit imaluunniit puiaasat gassimik imallit il.il. Anngajaarniutinut pineqartut soorlu assersuutigalugu taaneqarsinnaapput imigassaq aamma ikiaroorartoq. Nakorsaatit nakorsamit allagartaligaasinnaapput pisiassaasinnaallutilluunniit.

§ 30, imm. 1, nr. 1-ip malitsigisaanik piginnaatitsissuteqartoqarpoq napparsimasup allagarsiai ammarneqarsinnaanerannut aamma aalajangersakkami taaneqartuniki ilaqarnersut

misissornissaannut. Allagarsiat taamatuttaarlu poortukkat misissorneqarsinnaapput. Allagarsiat taamaallaat aalajangersakkami taaneqartunik atortunik, nakorsaatinik aamma angajaarniutunik missisuiffigineqassapput. Allagarsialli oqaasertaannik atuarnissamut piginnaatitsisoqanngilaq. Napparsimasumut nassiussat taamaallaat pineqarput, akerlianik napparsimasup nammineq allagai aamma nassiussai tamatumunnga ilaatinneqanngillat.

§ 30, imm. 1, nr. 2 naapertorlugu napparsimavimmi inigisap pigisallu misissuivigineqarnissaat pillugu aalajangiisoqarsinnaavoq. Soorlu assersuutigalugu inigisami sikaaviit amusartullu misissuivigineqarsinnaapput, kisianni aammattaaq napparsimasup nammineq pigisai pooqattat pigisaaalu allat misissuivigineqarsinnaapput.

§ 30 imm. 1, nr. 3 naapertorlugu napparsimasup timaa satsillugu misissuivigineqarsinnaavoq. Aalajangersakkap immikkoortuisa appaat naapertorlugu, qaneq ilanngullugu timip ammarnigisa misissuivigineqarnissaat inerteqqutaavoq. Annikinnerpaaffissaaniititsinermik tungavissap § 4-miittup kingunerisaanik iliuuseqarneq sapinngisamik mianersornerpaamik aamma sapinngisamik annertunerpaamik napparsimasoq mianeralugu ingerlanneqassaaq, taamaaliornikkut pisariaqanngitsumik narrunarsaaneq aamma persaqusersuineq pinngitsoorniarlugit.

Imm. 2-mut

§ 30, imm. 2 naapertorlugu ajornangippat napparsimasoq isigitillugu allagarsiai ini uninngavigisaa pigisaaalu misissuiffigineqassapput. Naatsorsuutigineqarpoq misissuinerit taamaattut napparsimasoq peqataatinnagu taamaallaat ingerlanneqarsinnaasut, napparsimasup qanoq issusia imaappat pineqartup misissuinerimi peqataasinnaanani. Pissutsit allat soorlu assersuutigalugu napparsimasoq misissuinerup nalaani immikkoortorta qarfirmiinngippat, misissuinnisaq napparsimasup immikkoortorta qarfirmut uternissaanut utaqqisinniartariaqarput.

Imm. 3-mut

Dronning Ingridip Napparsimavissuani tarnimikkut napparsimasunut immikkoortorta qarfirmi nakorsaanerup aalajangiivigisinnaavaa nakorsaatinik, aanngajaarniutit aamma atortut ulorianartut misissuinerimi taaneqartuni nassaarineqartut arsaarinnissutaanissaat. Naatsorsuutigineqarpoq pigisat tamakku immikkoortorta qarfirmi toqqortarineqarnissaat, tamakku illersorneqarsinnaasumik napparsimasumut tunniunneqarsinnaalernerisa tungaanut, soorlu assersuutigalugu napparsimavimmit angerlartinneqarnermut atatillugu. Nakorsaatinik, aanngajaarniutit sakkullu navianaatillit

inatsisit nalinginnaasut ikiaroorartut pillugit inatsit ilanngullugu unioqqutillugit pigineqarnerisa aalajangiivigineqarnissaat, nakorsaanerup politiinut suliaassanngortissinnaavaa. Politiit nassaarineqartut suujunnaarsinneqarnissaat aalajangiiffigisinnaavaat.

Nakorsaanerup aalajangigaa pineqartoq pillugu allattugaatinut nalunaarneqassaaq.

Allagarsianik, napparsimavimmi inigisamik, pigisanik timilu satsillugu misissuinerit kiisalu pigisanik suujunnaarsitsineq, arsaarinnissuteqarneq aamma suujunnaarsitsineq assigisaallu pillugit maalaarutaasinnaasut, napparsimavimmi pisortanut ingerlatinneqarsinnaapput.

Imm. 4-mut

§ 30, imm. 4-mi Naalakkersuisut allagarsianik, pigisanik, timi satsillugu misissuineri kiisalu pigisanik arsaarinnissuteqarnermi suujunnaarsitsinermilu maleruaqqusaliornissamut piginnaatinneqarput. Iliuuseqarneq pillugu erseqqinnerusumik maleruaqqusaliortoqarnissaa taamatullu sulisut paasinarsakkanik maleruaqqusaliuunneqarnissaat pisariaqartinneqalersinnaavoq.

Kapitali 8-mut

Pinngitsaaliissuteqarnernik nalunaarsuineq aamma pinngitsuugassaannngitsumik nalilersueqqinneq

§ 31-mut

Imm. 1-2-mut

Siunnersuummi § 31, imm. 1 naapertorlugu pinngitsaaliissummik iliuuseqarnerit pillugit aalajangersakkat naapertorlugit, pinngitsaaliissummik iliuuseqarnerit suulluunniit pillugit paasissutissat nalunaarsorneqassapput. Napparsimasut ataasiakkaat inatsisitigut illersugaanerit, soorlu assersuutigalugu naammagittaalliutinik suliaqartarneq eqqarsaatigalugu, nalunaarsuinissaq pisariaqarpoq. Taamatuttaaq pinngitsaaliissummik atuisarnerit pillugu inuiaqatigiinni kisitsisitigut paasissutissanik pigisaqarnissamut nalunaarsuineq iluaqutaavoq. Pinngitsaaliissummik iliuutsit qitiusumik nalunaarsorneqarnerat napparsimasut inatsisitigut illersugaanerannut toqqammavissat pingarnerit ilagaat, kinguneqarluartumillu nakkutilliinissamut pisariaqarluni.

§ 31, imm. 2-mi Naalakkersuisut pisinnaatinneqarput ingerlatsinikkut pinngitsaaliissummik atuinermut allattuiffiit, tamatumunnga ilanngullugit pinngitsaaliissummik atuinermut

immersugassat qanoq isikkoqarnissaanut maleruaqqusat, taakkua qanoq immersorneqarnissaanut aammattaaq Nunatsinni Nakorsaannermut nalunaaruteqartarnermut sukumiinerusumik maleruaqqusaliornissaminut.

§ 32-mut

Imm. 1-imut

Aalajangersakkami siunnersuutigineqartumi siunertaavoq kiffaangissusiagaaneq allatullu pinngitsaaliissummik iliuseqarnerup annikinnerpaaffimmiitinnissaa tunngavigalugu ingasaassinnginnissap qulakkeerneqarnissaa. Tamatuma eqquutsitsineqarnissaa Dronning Ingridip Napparsimavissuani tarnimikkut napparsimasunut immikkoortortaqarfimmi nakorsaannerup pisussaaffigaa.

Aalajangersakkap pinngitsaaliissummik atuinerit sulluunniit tamarmik immikkoortortaqarfiup pinngitsaaliissummik atuinerminut allattaavissuanut ilanngunneqartarnissaanut tunngasup, tamatumunnga ilutigitillugu nalunaarsuinissamat maleruaqqusat atuuttut eqqortinneqarnissaat pinngitsoortinngilaa, taamaattumik immikkoortortaqarfiup pinngitsaaliissummik atuinerminut allattaavissuanut ilanngunneqartut taamatuttaaq napparsimasoq pillugu nalunaarsuineranut allattaavimmut ilanngunneqassapput.

Imm. 2-3-mut

Siunnersuummi § 32, imm. 2 maleruaqqusamik immikkut ilaqarpoq tassa pinngitsuugassaangitsumik nalilersueqqinnissamat tunngasumik, tassa nammineersinnaajunnaarsitaanissamat piunasaqaatit sulii atuutsinneqarsinnaanerannut tunngatillugu nalilersueqqinnissaq. Dronning Ingridip Napparsimavissuani tarnimikkut napparsimasunut immikkoortortaqarfimmi nakorsaannerup § 32, imm. 1, naapertorlugu namminneerluni aamma ataavartumik nakkutigissava kikkuluunniit piffissami pisariaqartinneqartumit siviunerunngitsumik nammineersinnaajunnaarsinneqannginnissaat. § 32, imm. 2-mi maleruaqqusamik kissateqarnermut tunngaviusoq tassaavoq ingerlaavartumik nalilersueqqinnissap aaqqissuussaannerusumik ingerlanneqartarnerata ilaneqarnissaa.

Maleruaqqusaq naapertorlugu nakorsaannerup inummut nammineersinnaajunnaarsinneqarsimasumut tunngatillugu nammineerluni iliuseqarnermigut nammineersinnaajunnaarsitsinerup sulii ingerlatiinnarneqarnissaanut apeqqut nalilersoqqissavaa aalajangersakkami akuttussusissatut allanneqarsimasut tunngavigalugit. Taamaalillutik napparsimasut pinngitsaaliissummik unitsinneqarsimasut, pinngitsaaliissummik uninngatinneqartut imaluunniit pinngitsaaliissummik utertinneqarsimasut matumani pineqarput. Pinngitsuugassaangitsumik nalilersueqqinnerup

tamatuma inernera pinngitsaaliissummik atuineramik allattaavissuarmut ilanngunneqassaaq aalajangiinermut tunngavilersuutit sukumiissut ilanngullugit.

Nakorsaanerup nammineersinnaajunnaarsitsinissamut piunasaqaataasut atuukkunnaarsimasut paasiguniuk, nammineersinnaajunnaarsitsineq ingerlaannartumik atorunnaarsissavaa, tak. § 12. Imatut pisoqarpat nakorsaanerup nammineersinnaajunnaarsitsineq sulii pisariaqartuusoq taava § 32, imm. 3-p malitsigisaanik, napparsimasumut siunnersortaasoq aamma taamatuttaaq napparsimasooq, aalajangiineq pillugu ilisimatinneqassapput.

Napparsimasup nammineq sukkulluunniit angerlartinneqarnissamik qinnuteqarsinnaanera, suleriaatsimi pineqartumi akornuserneqanngilaq, tak. § 10 imm. 3.

Imm. 4-mut

Siunnersuummi § 32, imm. 4-mi ilaavoq immikkut aalajangersagaq sernissuiniarluni sukaterussinerup akuerineqarneranut nalilersueqqinnermut tunngasumik. Sernissuiniarluni sukaterussinerup pisariaqartitsinermut naleqqiussilluni sivilunerusumik atorneqannginnissaa qulakkeerniarlugu siunnersuutigineqarpoq, nalilersueqqinnermik nutarterisoqartarnissaa ullut pingasut, qulit, 20-t aamma 30-t siullermik akuersissuteqarnerup kingornatigut, tamatumalu kingornatigut sapaatit akunneri sisamakkaarlugit. Piffissani taakkunani nakorsamit akuersissuteqartoqarnera nutarterneqanngippat aalajangersaaneq atorunnaassaaq, taamaalilluni sernissuiniarluni sukaterussinermik atuinissamut tunngavissaarutissaaq.

Imm. 5-imut

Aalajangersakkami ilaapput pinngitsaaliissummik sukaterussineq pillugu immikkut maleruaqqusat. Pinngitsaaliissummik sukaterussineq ingerlatiinnarneqassappat taava nakorsamit nalilersoqqinneqassaaq pinngitsaaliissummik sukaterussinermut ingerlatiinnarneqarnissaanut apeqquut, taamaattorli ikinnerpaamik ullup unnuallu ingerlanerani ataasiarluni. Taamaaliornikkut pinngitsaaliissummik sukaterussisarnerup qanoq annertutigisumik atugaanera, nakorsamit nakkutigineqarnissaa sukannerulerinneqarpoq.

Tamakku saniatigut immikkoortoq 2.9-mi oqaaseqaatit nalinginnaasut innersuussutigineqarput.

Kapitali 9-mut

Napparsimasunik siunnersuisartut

§ 33-mut

Imm. 1-2-mut

Maannakkut akissarsiaqarlutik napparsimasunik siunnersuisartoqarnermik aaqqissuussinerup ingerlatiinnarneqarnissaa siunnersuutigineqarpoq.

Siunnersuummi § 32 imm. 1 aamma 2 naapertorlugu automatiskiusumik aamma pinngitsoorneqarsinnaanngitsumik napparsimasunik siunnersuisartut ilanngutsinneqassapput nammineersinnaajunnaarsitsinermik atuinerup aallartinneqarnerani aamma aalajangersakkami pinngitsaaliissutinik allanik atuinerni. Erseqqissaatigineqassaaq timi atorlugu pissaanermik atuneq aammattaaq ilaatinneqarmata pissaaneq atorlugu eqqissisaatitortitsineq. Tamatuma kingunerisaanik napparsimasunik siunnersuisartoq ilanngutsinneqassaaq pissaaneq atorlugu eqqissisaatitortitsinermi.

Pinngitsaaliissummik atuneq soorlu sukaterussineq il.il. pinngitsaaliissummik unitsitsinermut imaluunniit pinngitsaaliissummik uninngatitsinermut atatillugu arlalitsigut pisassaaq, tassani napparsimasumik siunnersuisoq ilanngutsinneqareersimassalluni. Napparsimasumik siunnersuisoq taanna soorunami pinngitsaaliissummik atuinernut allanut atatillugu atorneqarsinnaassaaq.

Imm. 3-mut

Siunnersuummi § 33, imm 3-mi napparsimasumik siunnersuisup suliassai ilaapput, taakkua nalinginnaasumik sapaatit akunneranni ataatsimi nalunaaquttap akunnerini sisamat arfinillillu akornanni sivisussuseqartussatut naatsorsorneqartut.

§ 33, imm. 3, nr, 3 naapertorlugu napparsimasumik siunnersuisoq maalaarutip Tarnimikkut Nappaatillit Maalaarutaannik Aalajangiisartunit suliarineqarnerani sapinngisamik najuuttassaaq. Aalajangersakkap oqaasertalernerisa Tarnimikkut Nappaatillit Maalaarutaannik Aalajangiisartut oqarasuaatikkut ataatsimiissinnaanerak akornutissaqartinneqanngilaq.

Tamakku saniatigut immikkoortoq 2.10-mi oqaaseqaatit nalinginnaasut innersuussutigineqarput.

§ 34-mut**Imm. 1-imut**

Qinnuteqaatit tunngavigalugit napparsimasunut siunnersortit Nunatta Eqqartuussivianit atorfinitsinneqassapput. Napparsimasunut siunnersortit eqqartuussisumit nalunaarsorneqartut

Dronning Ingridip Napparsimavissuani tarnimikkut napparsimasunut immikkoortorta qarfirmut nassiunneqassapput.

Napparsimasunut siunnersortit pingaartumik peqqinnissaqarfimmi inunnillu isumaginnittoqarfimmi sulisut akornanni sulisussarsiarineqarnissaat eqqarsaataavoq. Soqutiginnittulli allat soorlu assersuutigalugu palasit, ilinniartitsisut, tarnip pissusaanik ilisimasallit (psykolog) immikkut tulluurtutut isigineqartariaqarput. Qinnuteqartut pisariaqartitanit amerlaneruppata, qinnuteqartunit piginnaasaqarnerusorisat eqqartuussisumit atorfinitsinneqassapput. Qinnuteqartup atorfimminut atatillugu napparsimasunut siunnersorta anissamut naapertuuttutut isigisarialimmik, immikkut paasisimasaqarnera misilittagaqarneraluunniit, naliliinermi ilaatinneqartariaqarput.

Napparsimasunut siunnersortinngortut suliamik ingerlatsinissaq pillugu pikkorissarneqassapput. Tarnimikkut napparsimasut pillugit inatsisip matuma imaanik paasissutissiinissaq inatsisillu piumasaqaatitai tunngavigalugit sullissinissaq, napparsimasunut siunnersortinik pikkorissaanermi pingaarnertut anguniagaassaaq. Pinngitsaaliissummik iliuseqarnerit sivilisunerusumik ingerlanneqartut taamaallaat Nuummi pisinnaammata, napparsimasunut siunnersortinik arfineq pingasut qulillu akornanni amerlassusilinnik atorfinitsitsisoqarnissaa eqqarsaataavoq. Napparsimasunut siunnersortit Nuummi najugaqartuussapput Dronning Ingridillu Napparsimavissuani tarnimikkut napparsimasunut immikkoortorta qarfirmi atorfeqartuussanatik.

Imm. 2-mut

§ 34, imm. 2 naapertorlugu siunnersuisussanngortitsinermi, napparsimasunut siunnersortit nalunaarsuiffianni tullinnguuttoq, peqqissaasumit pigaartuusumit toqqarneqassaaq. Siunnersuisussanngortitsineq nalinginnaasumik oqarasuaatikkut nalunaarutigineqassaaq, kisianni tamatuma kingornatigut peqqissaasumit pigaartuusumit nalunaarlugu uppernarsaaserneqassalluni. Nalunaarsuiffik naapertorlugu kikkut siunnersuisussanngortinneqarnerisa nalunaarsuiffimilu killiffiup malinnaaviginissaat, peqqissaasup pigaartuusup pisussaaffigaa.

Pinngitsaaliissummik napparsimavimmut unitsitsinermi pinngitsaaliissummik iliuseqalernermi siunnersuisussanngortitsisoqassaaq. Nammineq piumassutsiminnik napparsimavimmut unittunik pinngitsaaliissummik uninngatitsilernermi Dronning Ingridip Napparsimavissuani tarnimikkut napparsimasunut immikkoortorta qarfirmi nakorsaanerup angerlarnissamik itigartitsinera tunngavigalugu siunnersuisussanngortitsisoqassaaq. Nammineq piumassusertik naapertorlugu napparsimavimmut unittunik pinngitsaaliissummik katsorsaanermi imaluunniit napparsimavimmit angerlartinneqareernerup kingornatigut

pinngitsaaliisummik malinnaavinnilernermut atatillugu, tak. § 18, pinngitsaaliisummik katsorsaalernermut imaluunniit pinngitsaaliisummik nakorsaatitortitsilernermut atatillugu siunnersuisussannngortitsisoqassaaq.

Imm. 3-mut

Nalunaarsuiffimmi nalunaarsukkat arlaannik allamik siunnersuisoqartinneqarnissamut napparsimasup qinnuteqaataa, sapinngisaaq naapertorlugu akuersissutigineqassaaq tak. § 34, imm. 3. Siunnersuisussannngorsaaareersup nalunaarsuiffimmiittumik allamik taarserneqarnissaa kissaataappat, tunngavilersuutaasut naammaginarpata aatsaat akuerineqarsinnaasariaqarpoq.

Imm. 4-mut

§ 34, imm. 4-p malitsigisaanik nalunaarsuiffimmi nalunaarsimannngitsumik siunnersuisoqarnissaaq napparsimasumit kissaataappat, tamanna ilaatigut akuerineqarsinnaassaaq. Taama siunnersuisussannngortitsineq, Nunatta Eqqartuussiviani eqqartuussisup aalajangiivigisassaraa. Taamatulli pisoqarnerani utaqqiisaagallartumik tullinnguuttumik siunnersuisussannngortitsineq, peqqissaasumit pigaartuusumit isumagineqartussaassaaq, tak. § 34, imm. 2.

Taamatut piumasaqaateqarnerup akuersissutaanissaanik naliliinermi piumasaqaatip naammaginarlumik tunngavilersorneqarsimanera siunnersuisussannngortinniakkallu piukkunnassusaa pingaartinneqartariaqarput. Qanigisat ikinngutillu napparsimasup tatigisatuarisinnaavai. Taakkununggalu napparsimasunut siunnersortaasartut ilisimasassaattut naatsorsuutigineqartut immikkut paasisimasaaqarfiginissaat piumasaqaataasinnaanngilaq. Taamaattorli taama suliaqarnerup piumasaqaatitaanik paasisimanninnissaaq piumasaqaataasinnaassaaq. Eqqartuussisup siunnersuisussannngortitsineq pillugu aalajangigaa pisortaqaarfimmut allamut ingerlateqqitassannngortinneqarsinnaanngilaq.

Tamakku saniatigut immikkoortoq 2.10-mi oqaaseqaatit nalinginnaasut innersuussutigineqarput.

§ 35-mut

Imm. 1-imut

Napparsimasup siunnersuisuatalu attaveqatigiinnerannut tunngasoq aalajangersakkami maleruagassiuunneqarpoq. Napparsimasooq peqqinnissaqarfiup immikkoortuani Nuup avataaniittumiippat, ataqatigiinneq oqarasuaatikkuq qarasaasiarluunniit atorlugu attaveqatigiinnikkut ingerlanneqassaaq. Sapaatit akunnerata qaangiunnerani napparsimasooq

sumiiffimmi Nuup avataaniittumii ginnarpat, aalajangersagaq naapertorlugu pulaarnissaq qarasaasiaq atorlugu attaveqatigiinnermik taarserneqassaaq.

Napparsimasut napparsimavimmit angerlarnermik kingorna pinngitsaaliissummik malittarineqarnerminnut atatillugu siunnersuisoqartinneqartut, siunnersuisuminnut attaveqarniarneranni qarasaasiaq atorneqarnerussaaq. Napparsimasut napparsimavimmit angerlartitaanerminni Nuup avataani najukkaminnut utertut, peqqinnissaqarfiullu immikkoortuani pinngitsaaliissummik nakorsaatitortinneqartut, matumani pineqarput. Peqqinnissaqarfimmi immikkoortoq pinngitsaaliissummik nakorsaatitortitsiviusoq, oqarasuaammik atukkiinikkut imaluunniit qarasaasiakkut attaveqaat Skype atorlugu attaveqartitsisinnanermut ikiutissaaq.

Imm. 2-mut

Aalajangersagaq naapertorlugu napparsimasumut siunnersortaasoq akeqanngitsummik akornuserneqarnanilu nammineq takkunermigut, allakkatigut, oqarasuaatikkullu napparsimasumut attaveqarnissamut pisinnaatitaaffeqarpoq. Taamaasilluni napparsimasoq Dronning Ingridip Napparsimavissuaniippat, napparsimasunut siunnersortip, soorunami katsorsartinnerup ilaatigut killiliisinnaanera apeqqutaatillugu, sukkulluunniit napparsimasoq pulaarsinnaavaa. Oqarasuaatikkut napparsimasumut attaveqartarnissaq napparsimasunut siunnersortip pisinnaatitaaffigaattaq, taamaammallu allakkatigut taamaallaat attaveqartarnissaa innersuussutaasinnaanngilaq.

Aalajangersakkap oqaasertaliornera naapertorlugu napparsimasunut siunnersorti napparsimasumik attaveqarnissamut pisinnaatitaaffeqarpoq. Pissutsit piviusut maleruaqqusallu patsisaallutik killiliisoqarsinnaanera, soorlu assersuutigalugu napparsimasup piffissap qanoq ilinerani siunnersortiminut oqarasuaatikkut attaveqarsinnaanera ajornaquteqartinneqanngilaq. Napparsimasup immikkoortortaqarfimmi oqarasuaammik imaluunniit akiliilluni oqarasuaammik atuinikkut siunnersortiminut attaveqarsinnaaneranut naammaginarumik periarfissinnissaa, immikkoortortaqarfimmi sulisut isumagissavaat.

§ 36-mut

Napparsimasumik siunnersortaasup suliassani isumagisinnaassagunigit napparsimasoq pillugu paasissutissanik naapertuuttunik, napparsimasumit namminermit pissarsiaannaanngitsunik pisariaqartitsivoq. Napparsimasulli nammineq kissaataasa nakorsanullu nipangiussisussaataanerit ilanngullugit eqqarsaatigineqarnissaat pingaaruteqarpoq.

Napparsimasunut siunnersorti soorlu assersuutigalugu pinngitsaaliissummik iliuuseqarnernik nalunaarsuiffimmi paasissutissanik, napparsimasoq akerliugaluarpalluunniit, atuarsinnaassaaq. Taamatut pisoqassappat allamik siunnersortitaartitsinikkut napparsimasup allamik isumataartinneqarsinnaanera pillugu, Dronning Ingridip Napparsimavissuani tarnimikkut napparsimasunut immikkoortortaarfimmi nakorsaaneq paasiniaasariaqartassaaq, taamaassappallu tamatuminnga suliassanngortitsisinnaassalluni.

Paasissutissanut isertuussanut pissarsiarisartakkanut pissusissamisoortumik napparsimasunut siunnersortit Pisortat ingerlatsineranni suliassat suliarineqartarnerat pillugu Inatsisartut inatsisaat nr. 8, 13. juni 1994-imeersumi § 27-imi aamma Kalaallit Nunaanni pinerluttulerinermi inatsimmi nr. 306, 30 april 2008-meersumi § 50-imi maleruaqqusat naapertorlugit nipangiussisussaataapput.

Naak napparsimasoq nalinginnaasumik nammineq pillugu nalunaarsuiffimmi allattukkanik paasitinneqarnissaminut pisinnaatitaaffeqarluartoq, taava napparsimasumik siunnersortaasup nalunaarsuiffimmi allattukkanik paasitinneqarnissaanut napparsimasup akuersissuteqarnissaa piumasqaataavoq.

§ 37-mut

Siunnersuummi § 37 naapertorlugu pinngitsaaliissummik iliuuseqarfigineqarneq siunnersuisoqartitsisoq taamaatinneqarpat, napparsimasumut siunnersuisutut atuunneq unitsinneqassaaq. Napparsimasulli pinngitsaaliissummik iliuuseqarfigineqarsimanini maalaarutiginiarneraa siunnersortip paasiniassavaa, taamaassappallu tamatuminnga ikiorlugu. Napparsimasumut siunnersortaasup maalaarutit suliarineqarlutik aallartereersut naammassineqarnissaannut ikiuutissaaq.

§ 38-mut

Aalajangersakkami siunnersuutigineqartumi Naalakkersuisut pisinnaatitaapput ingerlatsinikkut napparsimasunut siunnersortinik atorfinitsitsinermi aamma siunnersuisussanngortitsinermi, taakku suliassat aamma pisinnaatitaaffii sukumiinerusut aammattaaq akissarsiai pillugit sukumiinerusumik maleruaqqusaliornissaminnut

Kapitali 10-mut

Ilisimatitsisineq aamma naammagittaalliorsinnaanermut ilitsersuineq il.il.

*§ 39-mut**Imm. 1-2-mut*

Aalajangersakkami aalajangersarneqarpoq napparsimasoq nalunaarfigineqassasoq aamma paasissutissani assigiinngitsunik pissarsitineqassasoq kiffaanngissusiagaanerup imaluunniit pinngitsaaliissummik iliuserineqartup allap aallartinneqannginnerani. Tamanna atuuppoq napparsimasup paasissutissanik taakkuninnga pissarsinissaminut piumasaqarsimanninnera apeqqutaatinnagu.

Taamaattorli sioqqutsilluni nalunaarfiginninneq taamatut ittoq immikkut ittumik pinasuartumik pisoqartillugu pinngitsaaliissummik sukaterussinerup aamma timi atorlugu pissaanermik atuinerup atortariaqalernerani pinngitsoorsinnaavoq, tak. 39, imm. 2. Tamatumani eqqarsaatigineqarput tassanngaannartumik pisoqartillugu allat pisinnaasut ulorianarnerusinnaasut pinngitsoortinniarlugit pinngitsaaliissummik atuinerit. Taamatut pisoqartillugu ilimanangilaq aamma qanoq pisoqarnerani illersorneqarsinnaassanngilaq iliuseqarnissap pinnginnerani, imm. 1-imi nalunaarfiginninnissamut pisussaaffik eqquutsinneqassapat. Taamatut pisoqareerpat iliuseqartariaqarnermut tunngavilersuutaasut nalunaarutigineqassapat.

Pinngitsaaliissummik iliuseqarnissamik aalajangerneq, pisortat ingerlatsineranni suliassat suliarineqartarnerat pillugu inatsimmi aalajangiinertut innissaat naatsorsuutigineqassammat, ilaatigut tamatuma kingunerisaanik pisortat ingerlatsineranni suliassat suliarineqartarnerat pillugit inatsimmi maleruaqqusat, piumasaqaateqartoqarnera tunngavigalugu allaganngorlugu tunngavilersuuteqarnissaq, atuutsinneqarnissaat.

*§ 40-mut**Imm. 1-imut*

Pisortat ingerlatsineranni suliassat suliarineqartarnerat pillugu inatsimmi § 25-imi naammagittaalliornissamut ilitsersuineq pillugu aalajangersagaq, taamaallaat aalajangiinernut allaganngorlugit nalunaarutigineqartunut atuuppoq. Taamaattorli pisortat ingerlatsineranni suliassat suliarineqartarnerat pillugu inatsimmi § 7 ilitsersuinissamut pisussaaffik nalinginnaasoq, pisariaqarpat aalajangiineq oqaasiinnakkut nalunaarutigineqaraluartoq, aamma maalaaruteqarnermi ilitsersuinissamik nassataqarpoq. Pisortat ingerlatsineranni suliassat suliarineqartarnerat pillugu inatsimmi § 7a naapertorlugu, napparsimasup aalajangiinerup kalaallisut imaluunniit danskisut pissarsiarinissaa pisinnaatitaaffigaa.

§ 40-mi aalajangersagaq erseqqissoq siunnersuutigineqarpoq, taanna naapertorlugu pinngitsaaliissummik sumilluunniit atuisoqartillugu, taava napparsimasoq aalajangiineq pillugu allakkatigut naammagittaalliuteqarnissamut periarfissaqarneq pillugu ilitersorneqassaaq. Taamaalilluni napparsimasoq aalajangiinerup Tarnimikkut Nappaatillit Maalaarutaannik Aalajangiisartunut allagangorlugu naammagittaalliutigisinnaaneranut ilitersorneqassaaq, tak. siunnersuummi § 43.

Aalajangersakkami aalajangiiffigineqanngilaq piffissap qanoq ilinerani naammagittaalliornissamut ilitersuisoqassanersoq. Taamaattorli tamatigut naammagittaalliornissamut ilitersuisoqassaaq pinngitsaaliissummik katsorsaanerup aallartinneqannginnerani, imaappat kinguartitsinissamut tamatuma sunniuteqarsinnaanera periarfissaappat, tak. § 40, imm. 3. Tamanna taamatuttaaq § 18 naapertorlugu angerlartinneqareernerup kingornatigut pinngitsaaliissummik malittarineqarnissamut aalajangiinermut tunngatillugu atuuppoq,

Imm. 2-3-mut

Naammagittaalliuteqarnissamut periarfissamik atuineq kinguartitsisoqarsinnaaneranut nalinginnaasumik sunniuteqanngilaq, tak. siunnersuummi § 40, imm. 2. Taamaattorli pinngitsaaliissummik katsorsaasoqartillugu immikkut maleruaqqusaq atuuppoq, tak. inatsissatut siunnersuummi § 40, imm. 4. Tassani naammagittaalliorneq kinguartitsinissamut nalinginnaasumik sunniuteqarpoq, imaanngippat katsorsaanerup ingerlanneqarnissaata ingerlaannartumik aallartinneqarnissaa pisariaqarluni napparsimasup inuunerata imaluunniit peqqissusiata annertuumik navianartorsiortinnissaa pinngitsoorniarlugu, imaluunniit napparsimasoq allanik timaatigut imaluunniit peqqissusiatigut annertuumik navianartorsiortitsinissaanera pinngitsoorniarlugu. Taamaalilluni piumasaqaataavoq allatut iliorsinnaajunnaarnikkut pinngitsaaliissummik nakorsaasoqarnissaata ingerlattariaqalerneranut, tassa napparsimasup imaluunniit napparsimasumut siunnersuisup pinngitsaaliissummik nakorsarneqarneq pillugu naammagittaalliummik saqqummiussisimappat. Taamaattorli navianartorsiornermut ersiut inuunermik navianartorsiortitsineranut killeqaannangilaq, tassami peqqissutsip ajornerulernissaata nalorninartorsiortinneqarsinnaanera aamma taaneqarmat taamaattumillu ilaatinneqarluni navianartorsiortitsinerup periataarsinnaanera nalilerneqarpat.

Tarnimikkut Nappaatillit Maalaarutaannik Aalajangiisartut aalajangiinissaat utaqqinagu pinngitsaaliissummik katsorsaaniissamut periarfissaq taanna aammattaaq atuuppoq, naammagittaalliutip saqqummiunneqarnermini kinguartitsinissamut sunniuteqartutut

nalilerneqarpat, kisiannili napparsimasup qanoq innera ajornerulersimalluni aalajangiisartut aalajangiinerata tiguneqarnera sioqqullugu.

Pinngitsaaliissummik malittarineqarneq pillugu naammagittaalliuteqarneq § 18 naapertorlugu taamatuttaaq kinguartitsinissamut sunniuteqassaaq.

§ 41-mut

Aalajangersakkami Naalackersuisut piginnaatinneqarput ingerlatsinikkut sukumiinerusumik maleruaqqusaliornissaminnut qaqugu aamma kimit ilisimatitsisoqarnissaanut tunngatillugu, aammattaaq pinngitsaaliissummik iliuseqartoqarneranut atatillugu naammagittaalliuteqarnissamut ilitsersuineranut atatillugu.

Kapitali 11

Naammagittaalliuteqarsinnaaneq aamma eqqartuussivilersuussisinnaaneq

§ 42-mut

Imm. 1-2-mut

Kalaallit Nunanni napparsimasut naammagittaalliutaannik aalajangiisartunik eqqartuussissuserisumik, Nunatsinni Nakorsaannermik aamma napparsimasut peqatigiiffiannit tarnimikkut napparsimasunut sinniisumik ilaasortalimmik pilersitsisoqarnissaa, aalajangersakkami siunnersuutigineqarpoq. Naalackersuisut naammagittaalliuteqarnermut aalajangiisartut pilersissavaat.

Siulittaasup (eqqartuussissuserisup) napparsimasup pisinnaatitaaffiisa eqquutsinneqarnissaat qulakkiissavaa, kisianni nalinginnaasumik paasinninneq tunngavigalugu napparsimasumut eqqartuussissuserisuunngilaq. Nunatsinni Nakorsaannerup ilinniagaqassuseq tunngavigalugu peqqinnissakkut sullissisut sinniisuuffigissavai. Tarnimikkut napparsimasunut sinniisooq soorlu assersuutigalugu Tarnimikkut eqqarsartaatsimikkullu nappaateqartut qanigisaasa peqatigiiffiannit Sugisaaq toqqarneqarsinnaavoq.

Imm. 3-4-mut

Ilaasortat aamma sinniisussat ukiuni sisamani atasussatut toqqarneqassapput. Taamaallitutik ilaasortat aalajangiisartut sulineranni misilittagaqalersinnaapput. Akerlianik periarfissaqarpoq toqqaasoqarnerani tulliuttumi naaggaarnissaminut periarfissaqarpoq, tamanna ilaasortap kissaatiguniuk. Ilaasortat namminneq aamma Peqqissutsimut Ilisimatusarnermullu Naalackersuisup tamanna kissaatigippagu.

Imm. 5-imut

Napparsimasut naammagittaalliutaannit aalajangiisartut Peqqissutsimut Ilisimatusarnermullu Naalackersuisoqarfimmut attuumassuteqannginnera erseqqissarniarlugu oqaatigineqarpoq, suliat ataasiakkaat oqaluuserineqarneranni aamma aalajangiiffigineqarneranni aalajangiisartut ilitsersuinernut attuumassuteqanngitsut.

Imm. 6-imut

§ 42, imm. 6-mi ersersinneqarpoq Nunatsinni Nakorsaaneqarfiup Tarnimikkut Nappaatillit Maalaarutaannik Aalajangiisartut allatseqarnikkut isumagisassarai. Nunatsinni Nakorsaaneqarfik, Sundhedsvæsenets Disciplinærnevni i Danmark, timikkut nappaatit pillugit naammagittaalliutinut tunngatillugu, allatseqarfioreerpoq, taamaattumik pissusissamisoorpoq pinngitsaaliissummik atuinermut naammagittaalliutit pillugu allatseqarfik aamma tassaniippat.

Imm. 7-imut

Peqqissutsimut Naalackersuisoqarfiup aalajangiisartut ingerlatsinerannut aningaasartuutit, tamatumunnga ilanngullugit aalajangiisartuni ilaasortat ajunngitsorsiaat, akilertassavai.

Tamakku saniatigut immikkoortoq 2.12-mi oqaaseqaatit nalinginnaasut innersuussutigineqarput.

*§ 43-mut***Imm. 1-imut**

Aalajangersakkami siunnersuutigineqarpoq napparsimavinni oqartussaasut pinngitsaaliissummik atuinernut naammagittaalliutit tamaasa Tarnimikkut Nappaatillit Maalaarutaannik Aalajangiisartunut ingerlatitsisarnissaat. Naammagittaalliut napparsimasumit namminermit imaluunniit napparsimasumik siunnersuisartumit pisinnaapput.

Napparsimavinni oqartussaasut tassaapput napparsimavissuarmi/napparsimavimmi imaluunniit peqqissaavimmi napparsimasup uninngaffigisimasaani imaluunniit uninngaffigisaani oqartussaasut. Peqqinnissaqarfiup ingerlatsiviata pisussaaffigaa naammagittaalliutip Tarnimikkut Nappaatillit Maalaarutaannik Aalajangiisartunut

saqqummiunneqarnissaa, taassuma peqqinnissaqarfimmi sulisunut tunniunneqarata imaluunniit saqqummiunneqarnerata kinguninnguutigut. Peqqinnissaqarfiup ingerlatsiviata, aalajangiisartut allattaa paasissutissat piumasai tamaasa, tunniutissavai. Periaaseq naleqquttoq tassaavoq paasissutissat katersorneqassapput Peqqissutsimut Pitsaaliuinernullu Aqutsisoqarfimmut nassiunneqarlutik, tassanngaanniit Tarnimikkut Nappaatillit Maalaarutaannik Aalajangiisartunut ingerlateqqinnissallutik.

Imm. 2-mut

§ 43 imm. 2-mi naammagittaalliornissamut kingusinnerpaamik piffissarititaasoq pisup naammagittaalliutigisap pineraniit qaammatinut arfinilinnut killileqarpoq. Kingusinnerpaamik piffissaliussaq taanna aalajangiunneqarpoq taamaanngippat napparsimasup aamma peqqinnissaqarfimmi sulisut, pinngitsaaliissummik atuinnermut suna tunngaviusimanersoq pillugu paasissutissanik tunniussisinaanerat ajornarsinnaammat. Naak pinngitsaaliissut pillugu nalunaarsuiffimmut aamma peqqissutsimut paasissutissanut allatuiffimmut allattuisoqaraluartoq, pisoq pillugu immikkuualuttui tamaasa ilanngullugit allanneqartanngillat. Taamatuttaaq kingusinnerpaamik piffissaliussaq aalajangerneqarneranut tunngaviuvoq napparsimasup naammagittaalliteqarnermut ingerlanerani napparsimasumik siunnersuisumik pisariaqartumik tapersersorneqarnissaa eqqarsaatigalugu, taassuma isumagissavaa naammagittaalliutip sapinngisamik pilertortumik suliarineqarnissaa.

§ 44-mut

Imm. 1-imut

§ 44-mi aalajangersagaq Tarnimikkut Nappaatillit Maalaarutaannik Aalajangiisartut suliassaminnik ingerlatsinerannut maleruaqqusanik ilaqarpoq. Peqqissutsimut Pitsaaliuinernullu Aqutsisoqarfiup suliassaq Tarnimikkut Nappaatillit Maalaarutaannik Aalajangiisartunut saqqummiutissavaa. Tamannali imatut paasineqassanngilaq napparsimasoq imaluunniit napparsimasunik siunnersuisartuq toqqaannartumik Aqutsisoqarfimmut naammagittaalliummik saqqummiussissasoq. Napparsimasup imaluunniit napparsimasunik siunnersuisartup naammagittaalliut immikkoortortaq nakorsaannut, peqqissaasuinut aamma peqqissutsimik sullissisunut allanut napparsimasumik katsorsaanermtuq peqataasunut tunniussinnaavaat. Immikkoortortami nakorsaasut, peqqissaasuusut imaluunniit peqqissutsimik sullissisut allat tamatuma kingornatigut pisussaaffeqarput sapinngisamik piaartumik tamanna Peqqissutsimut Pitsaaliuinernullu Aqutsisoqarfimmut ingerlateqqissallugu. Soorunami aammattaaq napparsimasoq imaluunniit napparsimasunik siunnersuisoq periarfissaqarput soorlu assersuutigalugu pinngitsaaliissummik

iliuseqarfigineqarnermut naammagittaalliut Tarnimikkut Nappaatillit Maalaarutaannik Aalajangiisartunut saqqummiussinnaallugu.

Peqqissutsimut Pitsaaliuinernullu Aqutsisoqarfiup, aalajangiisartut oqartussaassuseqarfiannut tunngasumik naammagittaalliortoqarsimasoq paasiguniuk, taava suliassamut tunngassut taakkununga ilanngullugu naammagittaalliutigineqartup allannera, kiisalu Dronning Ingridip Napparsimavissuani tarnimikkut napparsimasunut immikkoortorta qarfimmi nakorsaanerup aamma/imaluunniit nunap immikkoortuani pineqartumi nakorsap uppersaanera Tarnimikkut Nappaatillit Maalaarutaannik Aalajangiisartunut nassitutissavai. Aalajangiisartut paasissutissanik amerlanerusunik kissaateqarunik tamatumunnga aalajangiisartut namminneq iliuseqassapput. Soorlu assersuutigalugu tassaasinnaapput nakorsamit paasissutissanut ilassutissat imaluunniit immikkoortorta qarfiup peqqissutsimik sullissisuinit oqaaseqaatit.

Suliamut tunngatillugu illuatungeriit tassaapput sumiiffimmi peqqinnissaqarfimmi oqartussaasut aamma napparsimasoq. Naammagittaalliuteqarnermi pinngitsaaliissummik atuineq kisimi pineqarnani kisianni aammattaaq peqqissutsimik sullissut peqataasimasut ilanngunneqarlutik, taava taakku aammattaaq naammagittaalliuteqarnermi suliassamut illuatungiuussapput.

Imm. 2-mut

Napparsimasup aamma napparsimasunut siunnersuisut oqaasiinnakkut imaluunniit nalunaarasuartaatikkut atassuteqarneq atorlugu suliaq aalajangiisartunut saqqummiussinnaavaat, tak. § 44, imm. 2. Napparsimasoq nammineq ornigulluni peqataaniaruni angerlartinneqareersimaguni, Tarnimikkut Nappaatillit Maalaarutaannik Aalajangiisartunut Nuummumut angalanissani nammineq aqqissuutissavaa aningaasartuutigalugulu. Napparsimasup nalunaarasuartaatikkut atassuteqarneq atorlugu attaveqarnissani kissaatigippagu, sumiiffimmi peqqinnissaqarfiup immikkoortorta Skype assigisaaluunniit atorlugu attaveqarnissamut ikiuussinnaavoq. Napparsimasoq Dronning Ingridip Napparsimavissuani uninngappat, taava naatsorsuutigineqassaaq Aalajangiisartut napparsimavissuarmi ataatsimiinnissaat. Napparsimasoq suliap Aalajangiisartuni suliassannagortinneqarnerata nalaani peqqinnissaqarfiup immikkoortuisa arlaanniikkuni, sumiiffimmi tassani nalunaarasuartaatikkut attaveqaatasut atorsinnaavai.

Immikkut ittunik pisoqartillugu napparsimasoq suliassap Aalajangiisartuni oqaluuserineqarnerani tamakkiisumik ilaannakortumilluunniit peeqataatinneqanngitsoorsinnaavoq, tak. § 44, imm. 2, oqaaseqatigiit aappaat.

Taamaattoqarpat napparsimasup peqataatinneqannginnerata taamaalilluni tunngavilersorluagaanissaa piumasqaataavoq.

Peqqinnissaqarfimmi oqartussaasunut sinniisuutitaasup, immikkoortortaqarfimmi nakorsaaneq, aammattaaq peqqinnissakut sullissisut allat pineqarsinnaapput taakku suliamikkut naammagittaalliornermut attuumassuteqarunik napparsimasutulli, Tarnimikkut Nappaatillit Maalaarutaannik Aalajangiisartunit naammagittaalliutip oqaluuserineqarnerani najuunnissamut aamma peqataanissamut pisinnaatitaaffeqarput.

Illuatungeriit najuunnermikkut aamma suliamut tunngatillugu pisut saqqummiunneqarnerini peqataanissamut pisinnaatitaaffeqarnerisa kinguneraa, taakku nassuiaatinik pissutsit pillugit, Tarnimikkut Nappaatillit Maalaarutaannik Aalajangiisartut nalilersugaannut tunngasunik saqqummiussisinnaapput. Aalajangiisartut taamatutaaq peqqissutsimik sullissisut attuumassuteqartut allat qinnuigisinnaavaat Aalajangiisartunut nassuiaassummik saqqummiusseqqullugit. Nassuiaassutit sukkulluunniit inatsisit tunngavigalugit eqqortumik oqaluttussaataaannermik tunngaveqartinneqanngillat.

Tarnimikkut Nappaatillit Maalaarutaannik Aalajangiisartut ataatsimiinneri tamanut ammasuussanngillat aamma Aalajangiisartuni ilaasortat nipangiussisussaataapput.

Imm. 3-mut

Aalajangersakkap nassatarisaanik Tarnimikkut Nappaatillit Maalaarutaannik Aalajangiisartut pinngitsaaliissummik iliuseqarfigineqarneq aamma napparsimavimmit angerlareernerup kingornatigut pinngitsaaliissummik malinnaaffiginninnermut tunngasunut naammagittaalliutitut suliassanngortinneqarsimasunik, kinguartitsinissamut sunniuteqartunik aalajangiisartussaapput, tak. § 40, imm. 3, naammagittaalliutip tiguneqarnerata kingornatigut ullut arfineq marluk qaangiutsinnagit aalajangiisoqassaaq. Suliassanut allanut tunngatillugu Aalajangiisartut sapinngisamik pilertortumik aalajangiissapput. Tamatuma kingunerisaanik nalinginnaasumik piviusumik naammagittaalliutip tiguneqarneranit ullut 14-it nallertinnagit. Ullunik 14-inik killiliineq qaqutiguinnaq eqquutsinneqanngikkaluarpat Aalajangiisartut napparsimasooq aamma napparsimasumik siunnersuisartoq tamatumunnga patsisaasoq pillugu ilisimatissavaat, kiisalu aalajangiinerup qaqugu pisinnaaneranut tunngatillugu.

Aalajangiisartut aalajangigaat pinngitsaaliissummik iliuseqarsimanerup akuerineqarneranit imaluunniit iliuseqarnerup eqqunngitsuusimaneranik, soorlu assersuutigalugu inatsimmi taamatut iliortoqarnissaanut piumasqaataasut naammassineqarsimanngippata, inerineqarsinnaapput. Naammagittaallimmi iliuserineqarsimasooq kisimi pineqarsimanngippat

kisianni aammattaaq peqqissutsimut sullissisut, taamatut pinngitsaaliissummik iliuseqarsimanermut peqataasimasut pineqarlutik taava tamatumunnga ilutigitillugu Aalajangiisartut isummerfiggissavaat, pineqartut/peqartup isornartorsiorneqarnissaanut tamanna tunngavissaqarnersoq.

Immikkut pinngitsaaliissummik iliuseqarneq § 13 naapertorlugu aamma angerlartinneqareernerup kingornatigut pinngitsaaliissummik malinnaaffiginninnermut § 18 naapertorlugu oqaatigineqassaaq, Aalajangiisartut piginnaatitaanerati iliuseqarnermut piunasaqaataasut ilumut eqquutsinneqarsimanerisa misissuinnermut killilerneqanngilaq, tak. § 13, imm. 1, aamma § 18, imm. 1, kiisalu pinngitsaaliissummik katsorsaanermut tunngatillugu pinngitsaaliissummik atorpeqartumik naliliinnermut, tak. § 13, imm. 2, naggatit aappaat. Aalajangiisartut taamatutaaq aalajangersaasinnaatitaapput katsorsaanermi nakorsap atugarisimasaanut, tamatumunnga ilanngullugit nakorsaat toqqarneqartoq aamma qanoq annertutigisumik atuisimanermut tunngatillugu, tak. § 13, imm. 4, aamma § 18, imm. 4, aamma § 4.

Tamakku saniatigut siunnersuummi § 40, imm. 3 malugeqquneqarpoq, taanna naapertorlugu pinngitsaaliissummik katsorsaanerup aallartinnera sioqqullugu naammagittaalliut saqqummiunneqarpat, tamatuma kingunerissavaa iliuserisap aalajangiisartut aalajangiinissaata tungaanut kinguartinneqarnera, imaanngippat nakorsarneqarnissap ingerlaannartumik aallartinneqarnissaa pisariaqarluni ilaatigut napparsimasup inuunerata imaluunniit peqqissusiata malunnaateqarluartumik navianartorsiornissaa pinngitsoorniarlugu.

Aalajangiisartut pisinnaatitaaffiisa avataaniipput naammagittaalliutit nakorsartinnermut tunngasut, tassani pinngitsaaliissummik iliuseqarnerit atorpeqarsimanngippata. Naammagittaalliutit taamaattut Peqqinnissaqarfiup aquneqarnera, aqqissuussaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaat nr. 27, 18. november 2010-meersumi maleruaqqusat naapertorlugit suliarineqartarput.

Imm. 4-mut

§ 44, imm. 4-mi Naalakkersuisut pisinnaatinneqarput Tarnimikkut Nappaatillit Maalaarutaannik Aalajangiisartut suleriaasissaannik aalajangersaanissamut. Aalajangiisartuni sulianik ingerlatsineq tassani nassuiaaserneqassaaq.

§ 45-mut

Imm. 1-4-mut

Tarnimikkut Nappaatillit Maalaarutaannik Aalajangiisartut napparsimasup imaluunniit napparsimasumik siunnersuisup qinnuteqarneratigut aalajangiinerit taaneqartut Kalaallit Nunaanni Eqqartuussivimmut suliassanngortissavai, Kalaallit Nunaanni pinerluttulerinermi inatsimmi kapitali 28-imi maleruaqqusat naapertorlugit. Aalajangiinernut tunngavigineqassaaq § 44 naammagittaalliutinut § 43-mit tunngaveqartunut.

Pinerluttulerinermi inatsimmi kapitali 28 immikkut pilertortumik aamma napparsimasumut pisariitsumik eqqartuussivimmi misiliinissamut periarfissiivoq. Aalajangiineq kiffaangissusiagaanermut tunngasoq iliuuserisaq imatut annertutigaaq inatsisitigut isumannaatsuutitsinissaaq pissutigalugu eqqartuussivimmi misilittariaqarluni. Eqqartuussivikkut misililineq immikkut ittuummat suliassaaq eqqartuussivimmit sapinngisamik piaarnerpaamik suliarineqassaaq.

Siunnersuummi imm. 1 naapertorlugu suliap Kalaallit Nunaanni Eqqartuussivimmut tunniunneqarnissaanut Tarnimikkut Nappaatillit Maalaarutaannik Aalajangiisartut aalajangereernerisa kingornatigut sapaatit akunnerisa sisamaanissaat aallaaviuvoq. Piffissarititaasoq suliap sapinngisamik pilertortumik eqqartuussivimmut suliassanngortinneqarnissaanut tapertassaaq. Taamaalilluni napparsimasup aammattaaq pisimasooq eqqaamalluarsinnaavaa suliap qanoq ingerlasimanerata qulaajarneqarneranut atatillugu.

Tamatumunnga ilutigitillugu pisariaqarpoq immikkut ittumik pissutissaqartillugu kingusinnerpaamik piffissarititaasup saneqqunneqarsinnaanera, taamaaliornikkut napparsimasooq pinngitsaaliissummik iliuuseqarsimanerup inatsimmik unioqutitsinertaqarsimannginneranik misiliinissaminut periarfissaajarneqassanngimmat, naak naammagittaalliut sapaatit akunnerisa sisamat qaangiutereersut tunniunneqaraluartoq. Taamaattumik immikkut tunngavissaqarpat Kalaallit Nunaanni Eqqartuussivimmi eqqartuussisup qaqutigugaluartoq akuersissutigisinnaavaa Tarnimikkut Nappaatillit Maalaarutaannik Aalajangiisartut aalajangeereernerisa kingornatigut qaammatit arfinillit angullugit naammagittaalliutip tunniunneqarsinnaanera. Naammagittaalliut Tarnimikkut Nappaatillit Maalaarutaannik Aalajangiisartut aalajangeereernerisa kingornatigut qaammatit arfinillit qaangiutereersut tunniunneqarpat naammagittaalliut suliarineqarsinnaassanngilaq.

§ 45, imm. 2-mi allassimavoq Napparsimasut Maalaarutaannik Aalajangiisartut napparsimasup kiffaangissusiagaanissaa akuerippassuk, angerlartinneqarnissamut apeqqut

aalajangiisartut aalajangiinerisa kingornatigut qaammatit marluk qaangiutereerpata, aatsaat tamanna Tarnimikkut Nappaatillit Maalaarutaannik Aalajangiisartunut nutaamik oqaluusereqqullugu qinnuteqaatigineqarsinnaavoq. Apeqqutip kiffaanngissusiagaanermut tunngasup unioqqutitsinerunnginnera eqqartuusivimmut ingerlatinneqarsimappat, tak. imm. 1, piffissaliussaq taaneqartoq eqqartuusiviup aalajangiineranit aallartittutut isigineqassaaq.

Unioqqutitsisumik kiffaanngissusiagaanermut oqartussaasunit taarsiiffigineqarnissamut piumasqaat qinnuteqarneq tunngavigalugu eqqartuusivimmi suliaqarnermi aalajangiiffigineqassaaq, kiffaanngissusiagaanerup unioqqutitsinerusimannginnera pillugu, tak. pinerluttulerineri inatsimmi § 292-imi maleruaqqusat.

Tamakku saniatigut naammagittaalliornissamut periarfissanut il.il. tunngatillugu immikkoortoq 2.12-mi oqaaseqaatit nalinginnaasut innersuussutigineqarput.

Kapitali 12

Atuutsitsilerneq aamma ikaarsaariarnermi aalajangersakkat

46-mut

Imm. 1-imut

§ 46-mi aalajangersakkami qaammatisiutit ulluat atuutilersitsiffiusoq allanneqarpoq kiisalu ikaarsaariarnermi aalajangersakkatut siunnersuutigineqarput, maleruaqqusat nutaat tamarmik aalajangiinernut atuutsinneqassasut, tassa qaammatisiutit ulluata atuutilerfiusup kingornatigut, tamatuma akerlianik aalajangiinerit pisoqaanerusut Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut Inatsisissaat nr. 24, 3. december 2012-imeersoq naapertorlugu nalilersorneqassapput.

Qaammatisiutit ulluat atuutilerfissatut xx.xxx 2019 aalajangiunneqarpoq.

Imm. 2-mut

§ 46, imm. 2 naapertorlugu inatsisip atuutilerneratigut Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut Inatsisissaat nr. 24, 3. december 2012-imeersoq atorunnaarsinneqarpoq.

Imm. 3-mut

Nalunaarutit aamma maleruaqqusat allat Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut Inatsisissaat nr. 24, 3. december 2012-imeersoq, kiisalu Inatsisartut Inatsisissaat nr.

12, 3. juni 2015-imeersumi allanngortinneqarsimasoq tunngavigalugit aalajangersarneqarsimasut aamma atuutsinneqarsimasut, atorunnaarsinneqarnissamik tungaannut atuutiinnassapput.